

WANTOK

NIUSPEPA BILONG YUMI OL PAPUA NIUGINI STRETI - 27 YIA NAU

28 pes Namba 1,230 Wik i stat long Fonde Januari 22, 1998 50 toea

INSAIT

• Vanimo plis haitim OPM man na givim i go long Indonesia. p2

• Sekim nupela 'Subscription Rate' bilong Wantok. p3

• Nu Silan PM tokim PNG na Bogenvil lida long wokhat na painim gutpela sindaun. p4

• Dokta Wesley Kigasung em nupela hetbisop bilong ELC-PNG. p7

Gavman rausim tambu long ol BRA mausman

ABBY YADI long Nu Silan i raitim

PRAIM Minista Bill Skate long asde moning i tokim ol PNG na Bogenvil lida long kibung long Lincoln Yunivesiti Nu Silan olsem gavman bilong em bai stretim ol pepa wok long ol Bogevil pipel i stap ausait long PNG long kam bek.

Em i autim dispela long tok klia long posisen bilong PNG long dispela kibung. Dispela tokorait kamapim tu BRA mausman Martin Miriori, husat em kantri i rausim em na i stap nau long Hague long Netelens.


Ol arapela lida husat i ken kam bek long Bogenvil o PNG aninit long dispela disisen em Moses Havini, husat i stap nau long Sidni, Ostrelia na planti tausen arapela Bogenvil pipel husat i stap long Solomon Ailans na ol arapela kantri.

Gavman i tokaut tu olsem long sait bilong em, em bai givim amnesti long olgeta pati i stap insait long dispela Bogenvil hevi. Dispela i min olsem gavman i no inap long kotim ol Bogenvil lida na pipel husat i pait egensim em long dispela hevi, maski trabel ol i mekim i ken kalabusim ol long planti mun na yia.

Gavman i yesa tu long ol Bogenvil lida na arapela manmeri long kisim PNG paspot gen long go kam long ol ovasis kantri. Na tu long rausium olgeta tambu long ol Bogenvil pipel i ken muv i go i kam long ailan yet, na tu long ol arapela hap bilong PNG na ovasis kantri wantaim.

Gavman i tokaut tu olsem em bai rausim dispela prais mani em olpela gavman i bin makim long het bilong sampela Bogenvil lida olsem Francis Ona, Sam Kauona na Joseph Kabui.


Skate i tokaut tu olsem ol PNG na Bogenvil lida i mas kisim dispela hevi i



• Moses Havini.

go insait long han bilong ol yet. Na wokhat long painim gutpela sindaun na amamas gen. "Mi mas tokaut gen olsem noken ting ol pren bilong mipela olsem Ostrelia, Nu Silan na Fiji na Vanuatu bai sapatim mipela yet long ol wok em mipela yet ken mekim. Laik na tingting bilong sanap long strong bilong mipela yet i min olsem mipela i redi long helpim mipela yet," em i tok.

Praim Minista bilong Nu Silan Jenny Shipley i tokaut long Mande Janueri 19 taim em i opim kibung olsem PNG na Bogenvil yet i mas go pas long wok bilong stapim olgeta pait, na bringim bek gutpela sindaun na amamas long Bogenvil ailan. Bikos Nu Silan na ol arapela kantri klostu i no inap long givim yet sapat olsem ol i givim nau.



• Martin Miriori.

Long wanem ol i gat hevi blong ol yet tu. Skate i tok i gat bikpela sapat long Truce Monitoring Grup i stap yet long Bogenvil. Tasol kwiktai mas i gat ol pipel yet long lukautim ailan.

BRA i sapatim ol dispela muv bilong nesenel gavman. Tasol BRA i toktok strong olsem bikpela samting em long ol Bogenvil pipel yet i mas mekim disisen long bihain taim bilong ol.

Wanpela BRA lida na mausman Joseph Kabui i tok strong olsem ol i laik bruk lusim PNG. Em i tok tu olsem dispela kibung long Nu Silan i mas las wan long kamap long ausait kantri. Em i laikim olgeta kibung long bihain taim i mas kamap long Bogenvil ailan yet. - Moa ripot long pes 4

MUTRUS KANAGE
BILONG DISPELA WIK
KATIM NA SALIM I KAM

KANAGE

"Em nau, narapela wik bilong mi ken"

■ Kanage em wanpela gred 6 dropout. Na save stap tasol long ples. Yu save, ples mangi ya. Olsem na em i no save gut long tok inglis.

Long krismas bikpela brata i kisim malolo long wok na kam holide long ples. Na long wanpela Fraide bikpela brata i amamas na sautim bia long ol mangi wantaim Kanage long klap long ples. Yu save, pasin bilong spak ya, ol kainkain politik bilong ples i kamap nau.

Mekim i go na Kanage wantaim bikbro i wok long resis long toktok. Na Kanage kirap na kros long bikbro bilong em. Baga i holim nek bilong bikbro na bikmaus long tok inglis: "Yu no mi! Yu no mi, ah?"

Bikbro painim hat long kisim win bikos Kanage holim nek bilong em, na bekim isi tasol: "Yes I know you." Kanage holim yet nek bilong bikbro na bikmaus gen: "I brek you down, I weld you back! You no mi, ah?" Man olgeta spakman i lap indai stret long paul inglis bilong Kanage.

WINA BILONG DISPELA WIK EM SYLVER=STER G. MAPEO RABAU


Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long WANTOK NIUSPELA,

P. O. BOX 1982, BOROKO PNG.

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kamaut long wanwan wik so noken lus tingting long baim Wantok niuspepa na painimaut!

SEKIM NEM BILONG TUPELA ARAPELA WINA LONG PES 13 NA 15.



MUTRUS

MAJOR SPONSOR BILONG RUGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOT

LAE: Plis long Lae i holim wanpela boi long plis sel long wanpela nait bikos em i bin pundanin skin bilong pinat long graun. Yangpela boi ya em Sipili Eralia bilong Erave long Sauten hailans provins. Lae Siti Atoriti sekuriti gad i holim em na sasim em long baim K14 long tromol pipia. Taim mama bilong em i kamap na komplem, ol i pretim em na laik lokim em tu long sel.

Papa bilong boi ya i bai kisim kot long dispela pasin bilong ol sekuriti gad.

• I gat bikpela belhat i stap nau long Wau taun bihain long ol spakman i bin sutim wanpela spesel plisman wantaim naip. Spesel plisman ya em Peter Siaman na em i bin laik stapim wanpela pait namel long ol spakman tasol ol i putim naip long em. ol plisman i kisim em i go long bikpela haussik long Angau we em i kisim marasin.

• Plis i holim wanpela yangpela boi long Finsafen long karim wanpela hom med sotgan wantaim em na stap klostu long PNGBC benk. Plis i holim na kisim wanpela hom med gan na pistol long hanbek bilong em. Plis i bin kisim sampela ripot pastaim long dispela olsem na ol i bihainim na kamap holim yangpela boi ya stret.

WEWAK: Telikom opis bai salim sampela wokman bilong em na ol plisman i go long Daguala Sepik provins na sekim ol bagarap i bin kamap long ol masin bilong telepon. I bin gat ol bagarap we ol man i bagarapim ol sampela samting bilong masin we i save mekim wok bilong telepon i ron gut namel long Wes Sepik na arapela priovins na tu long ovasis. Dispela bagarap i bin kamap las yia long krismas i kam na i bagarapim wok bilong telepon sevis insait long Wes Sepik provins.

SENTREL: Ol asples manmeri bilong Hood Lagoon insait long Sentrel provins i salim pinis wanpela petisen pepa o belhevi pepa i go long Gavana Ted Diro bikos long ol raskel pasin we i save kamap planti long haiwe bilong ol long Magi haiwe. Dispela raskel pasin i save kamap we ol i save hensapim ol manmeri i ron long PMV i go long ples. Ol manmeri bilong Sentrel provins i no inap wanbel moa long dispela pasin na ol i askim Gavana long mekim sampela samting.

Ripot long dispela wik i tok Gavana Ted Diro i tok namba wan eksen bilong em long mekim insait long dispela hevi em long rausim Kwikila setelmen. Dispela setelmen i gat planti kain kain lain i stap na i save gat planti bikhet pasin i kamap long hap.

HAILANS: Ol sampela bikpela ka kampani insait long Lae i autim wari long bikpela raskel pasin we i save kamap long ron bilong ol haiwe trak bilong ol i go antap long hailans haiwe.

Dispela em wanpela bikpela hevi ol bikpela haiwe trak kampani husat i save karim ol kago na saplai i go long hailans i save bungim olgeta taim long ron bilong ol.

Dispela ripot i kamap bihain long planti raskel pasin i bin kamap pinis we ol bikhet man i rausim ol kaikai, kago na ol samting antap long ka long las yia i kam.

Noken kisim spakbrus na ol arapela drag

WENCESLAUS MAGUN i raitim

Nesenel Nakotik Buriu (NNB) long Mosbi i mekim strongpela tok lukaut i go long olgeta pipel bilong Papua Niugini long noken kisim spakbrus o mariwana na ol arapela drag we inap kilim man indai. Dispela toktok i stap olsem astingting bilong NNB long PNG.

Long stapim ol pipel long noken kisim spakbrus, NNB i wok hat tru long skulim ol pipel bilong PNG long ol hevi spak brus inap kamapim long laip bilong yumi wan wan. Wantaim dispela kain awenes kos ol i bilip ol pipel bai poret long kisim spakbrus na ol arapela drag. Na dispela i ken daunim namba bilong ol lain i save kisim spak brus i go daun.

NNB i ronim pinis tupela wik drag awenes kos long 1997. Samting olsem 875 manmeri i makim ol provin-sel gavman, statutori ogenaiesen, non-gavman ogenaiesen na ol sios i kamap long dispela woksap. NNB i bilip ol dispela lain i go bek long wan wan provins bilong ol na kirapim provin-sel drag awenes kaunsel we ol i wok strong long skulim ol pipel bilong ol long noken kisim spakbrus na ol arapela kain drag olsem.

Long wankain taim NNB i go raun long ol skul olsem Mosbi Grama, Mosbi Intanesenel, Korobosea Intanesenel, Don Bosco Vokesenel, St Fidelis seminari, St Michael's Brahman Hai Skul long Madang na ol i ranim ol dispela drag awenes long tupela wik.

NNB i kisim tu bikpela sapot i kam long Coca Cola kampani husat i save wokim Fanta dring long kamapim ol posta na ol pablik notis o toksave bilong skulim ol pipel long hevi spakbrus na ol arapela drag inap kamapim long laip bilong ol. I luk olsem Koka Kola bai go het long givim wankain helpim long dispela yia.

Wantaim helpim bilong Coca Cola NNB i mekim bikpela awenes toksave i go long samting olsem 130 hai skul na komyuniti skul long kantri. Na dispela i soim olsem samting olsem

650,000 skul pikinini i kisim pinis tok-save bilong hevi spakbrus na ol arapela drag inap kamapim long bodi bilong ol.

Dairekta jenerel bilong NNB Pater William Liebert na namba tu bilong em Mathew Nelson husat i go pas long ronim ol kos bilong drag awenes i mekim ol dispela toktok long Tunde Januari 20 taim ol i opim namba tu drag awenes woksop bilong dispela yia.

NNB i askim nesenel gavman, ol dipatmen, statutori atoriti, ol non-gavman, ol sios, na husat manmeri insait long komyuniti long go kisim dispela woksop. NNB bai tokaut long program bilong dispela woksop long mun Epril. Ol lain i kamap long dispela woksap bai kisim setifiket bilong:

- Drag edukesen na awenes kos;
- Tritmen na rihabilitesen trening kos;
- Kaunseling insait long adiksens trening kos na;
- Komyuniti bes drag privensens trening kos.

Bikpela samting NNB i laik kamapim insait long 1998 woksap em long skulim ol lain husat i kam long dispela kos long helpim ol pipel bilong PNG bai ol i ken luksave long hevi bilong spakbrus na ol arapela drag na noken kisim. Wantaim dispela NNB i bilip namba bilong ol lain i save kisim drag bai i go daun.

NNB i kamapim tu wanpela nius leta ol i kolim Drug Watch bilong stapim pasin bilong kisim spakbrus na ol arapela drag long PNG.

Pater Liebert i tok i gat tupela rot bilong stapim pasin bilong kisim drag. Wanpela em long daunim saplai.

"Yu go painim spakbrus, bagarapim na kalabusim ol lain i planim, baim na salim dispela spakbrus o smokim dispela spakbrus. Dispela rot em i gut-pela tasol em i no inap pinisim dispela hevi. Pasin bilong skulim ol pipel long spakbrus na ol arapela drag em tu i hat tru long mekim. Tasol planti wok painim i soim olsem dispela em i wanpela rot inap helpim long pinisim o daunim hevi bilong kisim spakbrus na ol arapela drag," Pater Liebert i tok.

Moa nem kamap long kisim rais long Namatanai

NEVILLE CHOI i raitim

MOA ekstra nem i wok long go insait long buk bilong kisim ol kaikai na saplai long Namatanai eria long Nu Ailan provins. Na dispela i mekim kamap sampela bel kros long distrik edministresen.

Namatanai Distrik Edministreta Eremas Bulumaris i tokim Wantok olsem ol ekstra nem i wok long kam long opis bilong em long ol hap we ol i ting i gat inap kaikai long ol. Ol i bin luksave long ol dispela ekstra nem taim ol i bin pinisim wok bilong skelim kaikai olsem rais insait long distrik.

Mista Bulumaris i tok Rurel Eksen Progrem fan (RAP) mani bilong memba long baim rais i bin pinis. Na ol i wetim yet Nesenel Gavman long givim moa kaikai na saplai.

Olgeta kaikai i kam long RAP mani bilong memba i kos olsem K64,000. Na ol skelim inapim ol hap olsem Namatanai sab distrik, Sentrel Nu Ailan na Lihir, em i tok. "Nau mipela i wetim saplai bilong Nesenel Gavman."

Mista Bulumaris i tok opis bilong em i wok long kisim moa ekstra nem na em bai sekim gut ol dispela pastaim long ol i skelim ol kaikai long bihain. Dispela em ol kaikai bilong helpim ol manmeri i kisim taim long hevi bilong bikpela drai.

Mista Bulumaris i tok ol i kisim ol dispela toktok long ol manmeri tasol ol i gat wanpela tim husat bai go raun na sekim gut dispela samting.

Dispela tim em ol wokman bilong Dipatmen bilong Praimeri Industri.

Planti bilong ol dispela ekstra nem i wok long kam long hap bilong Tanga ailan na sampela meinlen eria. Ol eria we gavman i ting ol i gat inap kaikai i stap.

"Ol manmeri i ting ol i ken kisim fri rais long gavman. Mipela bai lukaut gut long dispela," em i tok.

Mista Bulumaris i tok i gat sampela nem tu i kam long hap bilong Lihir we ol i kisim pinis saplai bilong ol na ol i wetim yet arapela saplai olsem fiul long karim saplai kaikai bilong ol i go. Sapos ol arapela saplai i kamap gut, bai ol i go het long karim ol kaikai na saplai i go long skelim long ol manmeri, em i tok.

Mista Bulumaris i tok bai ol DPI opisa i sekim gut olgeta nem na namba bilong ol manmeri na taim mani bilong karimaut dispela operesen i redi, bai ol i statim wok bilong karim ol kaikai saplai i go.

Vanimo plis haitim OPM man na givim i go long Indonesia

YAKAM KELO i raitim

PLIS long Vanimo, Sandaun provins i bin haitim wanpela OPM paitman na givim i go long han bilong Indonesia gavman long Januari 11, 1998 long 3 kilok bikmoning. Dispela OPM paitman em Simon Alom bilong Wes Irian.

Na nau planti manmeri long bodi bilong Papua Niugini na Indonesia i pret nau long laip bilong ol bikos nogut ol paitman bilong OPM i bagarapim ol. Dispela em bikos nogut ol OPM o Wes Irian paitman i gat bel kros long gavman atoriti bilong Papua Niugini long Vanimo i long givim Simon Alom i go long han bilong ol Indonesia ami.

Insait ripot i tok plis i bin holim em namel long Wutung na Musu stesin long Janauri 9 na ol i bin holim em long Vanimo haus kalabus inap Januari 11, 1998 we ol i rausim em long bikmoning olsem 3 kilok. Ripot i tok arapela plisman i no bin wanbel long dispela disisen bilong Foren Afeas na Vanimo plis long rausim dispela OPM man long kalabus. Em i no kisim wanpela sas tu long Vanimo plis.

Ripot i tok Simon Alom i bin wanpela long ol arapela OPM paitman husat i bin laitim paia long lait haus long bodi long nu yia. Ol i mekim dispela bikos long tupela olpela memba bilong ol husat i lusim ol pinis na i bin go long Mosbi na mekim ol toktok

long ol wok bilong indipendens bilong Wes Irian.

Ripot i tok bihain long ol plisman na Foren Afeas opisa long Vanimo i givim Simon Alom i go long han bilong ol Indonesia ami, ol Wes Irian lain long bodi i tok ol ripot i kam long Jayapura biktaun i tok ol i no lukim o harim olsem ol ami i kisim Simon Alom i go kamap long hap yet.

Olsem na ol i bilip strong olsem ol Indonesia ami i kilim em pinis. Narapela tingting tu em ol i ting ol Indonesia ami i holim na haitim em long kem bilong ol long Wara Tami long traim kisim sampela toktok long em.

Ripot i tok ol manmeri, long Bewani eria na ol ples i go olsem long Scotchio i stap wantaim bikpela pret nau bikos ol OPM i gat bel kaskas nau long dispela pasin.

Provinsel Plis Komanda bilong Vanimo Edward Kinamo i tok dispela em hevi bilong kantri olsem na bosman bilong ol plis long rijen Alfred Reu i ken toktok long dispela.

Indonesia opis long Mosbi i tok dispela man Simon Alom em Indonesia ami i kisim em i go kamap pinis long Jayapura long em i ken sanap long kot. Mosbi ripot i tok ol i luksave tu olsem Simon Alom i bin kilim wanpela Indonesia man long 1980 na em i gat sas long kamap long kot.

Mosbi opis i tok plis long Vanimo i bin kisim Simon Alom i go hait bikos ol i no laikim long ol

Wes Irian paitman (OPM) bai bungim ol na holim ol long rot. Olsem na ol i kisim em i go hait tasol long han bilong Indonesia gavman. "Ol i mas go hait na isi bai ol i ken brukim bodi i go long hapsait. Simon Alom em wanpela bilong ol lain OPM husat i bin kukim lait haus long bodi long nu yia", bikman ya i tok.

Rijinol Plis Komanda Alfred Reu i tok long givim ripot long dispela tasol em i no mekim yet inap Wantok i go long masin.

Wanpela OPM memba lkiwene Wakerkwa i askim tu olsem bilong wanem na PNG gavman i no luksave o sanap long tingting bilong Melanesian Spiahet grup we em yet i bin statim pinis we i banisim na lukautim interes bilong olgeta Melanesian manmeri?. Bilong wanem na em (PNG) i mekim olsem long wanpela Melanesian brata bilong em?.

Mista Wakerkwa i tok long 1996, ol i bin sainim pinis wanpela MOU (wanbel pepa) long ai bilong bisop bilong Vanimo na ol NGO lain long taim ol i givim buk tupela pikinini Indonesia we i bin holim i go bek long han bilong famili bilong tupela Indonesia.

Mista Wakerkwa i tok dispela pasin PNG atoriti i mekim long givim wantok bilong ol i go long han bilong birua i wankain ol pasin Judas i mekim long go Jisas i go long han bilong birua

Edvetismen bagarapim nem bilong nupela haus kaikai

NEM bilong wanpela niupela haus kaikai long Mosbi siti, ol i kolim Jollibee, i bin bagarap taim wanpela man i bin go long niuspepa na putim wanpela askim insait long 'classifieds' seksen bilong pepa.

Dispela askim i bin ron olsem:

WANTED URGENTLY DOGS AND CATS ANY BREED Will pay 40 toea per kilo live weight. Apply to the Jollibee, Waigani Drv, PH:323 148.

Dispela edvetismen i min olsem dispela haus kaikai, 'Jollibee' i painim ol dok na pusi, na i gat laik long baim ol dok na pusi long 40 toea long wanpela kilo.

Dispela liklik hap toktok i bin kamap long niuspepa i bagarapim nem bilong 'Jollibee' stret na ol wokman bilong dispela haus kaikai i no amamas.

Bosmeri bilong niupela haus kaikai bilong Jollibee long Waigani, Heidrey Zuniga, i tok olsem em i no bin amamas long dispela edvetismen i bin kamap long niuspepa.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.
Advertising Manager:
Mike Kanin.
Editor of Wantok:
Leo Wafiwa.

Papers distributed by air throughout PNC.
Available by air mail subscription within Papua New Guinea and overseas

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PAPUA NIUGINI

Givim sapot long Nu Silan kibung i karim kaikai

Kibung bilong ol PNG na Bogenvil lida long Nu Silan i mas kisim sapot bilong olgeta pipel bilong kantri. Bikos long namba wan taim ol lida bilong tupela sait wantaim i amamas long ol lida na grup i makim wanwan interes i kamap.

Gutpela tu long Oposisen lida Bernard Narakobi i go wantaim Prais Minista Bill Skate long kibung ya. Dispela i soim olsem tupela sait bilong Nesenel Palamen i gat laik long stretim dispela bikpela hevi, maski i gat komplem olsem gavman i nogat kliapela polisi long Bogenvil.

Long soim posisen bilong gavman, em i gutpela long Mista Skate i rausim tambu long ol BRA lida, na givim amnesti long ol. Long amnesti sapos PNG i gat lo long dispela we disisen bilong gavman i bihainim o nogat em narapela samting bilong skelim long bihain taim. Tasol bikpela samting em gavman i soim klia olsem em i redi long toktok long bringim pis.

Olsem Prais Minista bilong Nu Silan, Misis Shipley i tok, ol kantri klostu long mipela olsem Nu Silan na Ostrelia i no inap long helpim mipela oltaim. Ol tu i gat hevi bilong ol yet. Mipela i mas helpim mipela yet nau.

Olsem na em i gutpela long Mista Skate i luk-save long dispela na i tok olsem ol PNG na Bogenvil lida i mas kisim dispela hevi i go insait long han bilong ol yet. Na wokhat long painim gutpela sindaun na amamas gen. Olsem em yet i tok, dispela i soim olsem "... laik na tingting bilong sanap long strong bilong mipela yet i min olsem mipela i redi long helpim mipela yet."

Bihainim kain toktok olsem, bikpela samting long skelim nau em long bringim bek gutpela sindaun na amamas i go long ol Bogenvil manmeri na pikinini, husat em moa ong 9-pela yia i kisim bikpela mekimsave.

Maski i nogat klia polisi bilong gavman long Bogenvil, wantaim go pas bilong olpela nem politisien olsem Sir John Kaputin long toktok, olgeta mas givim sapot olsem gutpela kaikai mas kamap long dispela kibung.

Olsem Sir John yet i tok, kain kibung long kamap long agrimen i save kisim longpela taim. Na namba wan samting em strongim dispela amamas na sindaun em pipel long Bogenvil i bungim nau. Dispela i ken opim dua bilong sampela gutpela senis long ol toktok i kam bihain, olsem long independens bilong Bogenvil.

Los Komisen harim olsem ol samting bilong pait i stap long Tindal i no gutpela

WENCESLAUS MAGUN i raitim

Jastis Kubulan Los, Sinia Mejistret Raphael Apa na Mekeo Gauli i harim long Tunde Januari 20, 1998 insait long Sandlain Kot olsem ol samting bilong pait we ol praivet ami bilong Sandlain i baim long Rasia na i laik bringim i kam long Papua Niugini bilong yusim long pait long Bogenvil i no gutpela.

Tupela witnes i sanap long dispela kot, Asisten Komisina bilong Kastoms long Intenel Revenu Komisen, Michael Timothy McRae, na Meja Dominic Leidimo wanpela saveman bilong ol samting bilong pait long PNG ami i tok olsem, bihain long wok painim aut bilong ol long Epril 10, 1997 long Tindal ples long Ostrelia.

Mista McRae i tok grup bilong ol i go daun long Tindal i no mekim gutpela wok painim aut bilong tok klia long gavman long ol samting bilong pait olsem gan, roket, helikopta, bom na ol arapela samting ol praivet ami bilong Sandlain i baim na i laik bringim i kam long PNG.

Namba wan astingting we i stapim ol savelain bilong PNG long mekim gutpela wok painim aut long laik bilong ol yet, em i bikos PNG gavman baim Sandlain long US\$18 milion na i no pinisim olgeta pe

olsem kontrak bilong baim ol Sandlain i tok.

PNG gavman i sapos long baim ol praivet ami bilong Sandlain long US\$36 milion. Long dispela as i Ostrelia i no klia husat tru i papa bilong ol dispela samting bilong pait aninit long olsem na ol i no givim tok orait long ol save lain bilong PNG long mekim wok painim long laik bilong ol.

Long dispela as ol dispela save lain bilong PNG i yusim samting olsem wan na hap awa tasol bilong eitpela de ol i stap long Ostrelia long go raun lukluk long ol dispela samting bilong pait long Tindal ples balus.

Mista McRae i tok long save bilong em olsem wanpela man ausait long ami, em i bilip ol samting bilong pait i kam long Rasia we ol praivet ami bilong Sandlain i laik bringim i kam long PNG. I luk olsem ol ami bilong Rasia i yusim pinis ol dispela samting pinis long sampela pait na olsem ol i luk olpela na smel nogut. Olsem na long giamanim ai bilong husat lain i laik baim ol samting bilong ol, ol i penim gut na salim. Em i tok tu olsem ol i painim olsem ol roket i bagarap na ol bom i lik tu. Olsem na ol ami bilong Ostrelia husat i kisim ol raun long sekim ol dispela samting i stapim ol long noken holim o tasim ol dispela samting nabaut.

Mista Leidimo i strongim ol

dispela toktok taim Los Komisen i askim em long tokaut long wok painim aut bilong ol.

"Ol amunisen long liklik han olsem 50 cal, i nupela tasol ol 57 MIL roket mota i ros olgeta. Dispela ol ros i ken bagarapim ol propela bilong mota na ol i ken pairap long taim ol i hat," Mista Leidimo i tok.

Em i bilip ol roket i ros bikos ol ami bilong Rasia i pulim ol i kamaut ausait long bakstoa na olsem ren, win, san, na kol i bagarapim ol.

Mista Leidimo i tok em i gat laik long sekim gut olgeta dispela samting tasol gavman bilong Ostrelia i no givim tok orait long ol bikos PNG i no pinis baim ol dispela samting. Em i bilip long save bilong em PNG ami i ken stretim ol dispela samting taim ol i kamap long PNG na yusim long pait.

Los Komisen i harim tu olsem samting olsem sikipela AK 47 gan bilong ol praivet ami bilong Sandlain na, faivpela maikro 9 mm pistol bilong ol i lus. I luk olsem ol ami i wok long mekim wanpela wok painim i go insait long dispela.

Long Mande Januari 19, Los Komisen i harim tu olsem olpela Fainens Minista Chris Haiveta na namba tu praim minista long gavman bilong Chan long 1997 i suvim menesing dairekta bilong Minerel Risoses Developmen Koporesen, Ila Temu, na ekting

deputi seketeri bilong Fainens, Veleiamo long yusim ol mani bilong gavman insait long Pogera long baim ol praivet ami bilong Sandlain.

Tasol ol i tokim Mista Haiveta olsem i nogat kontrol long ol mani na ol mani i stap long sentrel benk.

Olsem na ol i kamap wantaim tingting bilong yusim Roadco o Not Flai Haiwe Developmen Koporesen bikos ol dairekta em ol pablik seven. Ol i kisim tu strongpela tok lukaut i kam long Mista Haiveta long noken tokaut long dispela samting bikos em i bikpela samting tru bilong pait. Roadco em i wanpela bisnis bilong gavman i save mekim rot namel long Tabubil na Kiunga. Tasol Roadco i no moa wok.

Ol i go het na kamapim sampela kain tok promis, namel long gavman na Roadco long rot bilong yusim ol mani. Wantaim dispela Roadco i mas kisim sampela lon na givim i go long gavman long baim ol praivet ami bilong Sandlain.

Nesenel Eksekutiv Kaunsel (NEC) i givim tok orait long dispela lon na olsem Ekting Fainens Sekreteri long 1997, James Loko, husat Mista Haiveta i makim em olsem Siaman bilong Roadco, i go het na karim aut ol wok we Mista Haiveta i laikim bilong kisim mani na baim ol praivet ami bilong Sandlain.

Pelika strong long kamapim nupela drag lo

Minista bilong Pliis, Thomas Pelika i tokim Dairekta bilong Nesenel Nakotik

Buriu (NNB) long Mosbi, Pater William Liebert, wantaim ol wokman bilong NNB na ol niusman long Tunde Januari 20, olsem em i toktok strong long palamen i mas kamapim nupela drag lo. Mista Pelika i putim dispela tingting bilong em long palamen long 1997 tasol palamen i no givim tok orait. Tasol em i tok, em bai go het long subim dispela tingting long Mas1998 palamen kibung.

Mista Pelika i tok astingting bilong kamapim dispela nupela lo, 'Nesenel Kontrol Sabstens Bil' em bikos nau yet gavman i wok long bihainim ol olpela lo bilong drag ol i kamapim long 1950.

Long tok klia long dispela bil, Pater Liebert i tok, long dispela taim i gat planti kainkain nupela senis i kamap na Yunaited Nesens Kaunsel bilong Nakotik i kamapim ol nupela lo bilong drag aninit long intanesenel lo.

Em i tok dispea intanesenel lo i kamapim sampela strongpela lo bilong

mekim save long ol bikpela bisnis man husat i save ronim bisnis bilong drag. Long sem taim, dispela lo i kamapim tu sampela gutpela rot bilong helpim ol plisman, ol ami, ol pipel long komyuniti na ol lain i save kisim spakbrus na ol arapela drag.

Olsem na Mista Pelika i tok gavman i mas senisim olpela lo na bihainim dispela nupela intanesenel drag lo olsem Yunaited Nesens Kaunsel bilong Nakotik i kamapim.

Mista Pelika i tok, hevi bilong kisim spakbrus na ol arapela drag i no bikpela long ol arapela kantri. Tasol, dispela hevi i kamap bikpela nau long PNG. Na em i bilip planti ol yangpela man tude i save smokim spakbrus pastaim long kisim strong na go stil o mekim ol raskol pasin.

Em i tok planti taim ol arapela hevi i save kamap bikos ol lain i smokim spakbrus i save mekim tasol nogat man i luk-save tumas long dispela hevi. Olsem na em i amamas tru long wok bilong NNB na i tok em bai toktok strong long gavman i

mas helpim NNB long sanap long lek bilong ol yet, na lukautim mani na ol arapela wok bilong ol.

"Dispela ol wok Nesenel Nakotik Buriu i mekim i bihain stretpela rot. Nau em i no taim bilong kros pait long husat i mekim wanem kain wok. Em i klia olsem yumi olgeta i mas wok bung wantaim bilong stapim dispela bikpela hevi long kantri bilong yumi. Yumi mas rausim ol tingting paul nabaut na tok klia long hevi bilong spakbrus na ol arapela drag. Yumi mas i gat ol pipel i wok long olgeta hap bilong daunim dispela hevi. Na antap long dispela olgeta samting yumi mas i gat ol memba long palamen i givim bikpela sapot long dispela wok," Mista Pelika i tok.

Mista Pelika i kisim pinis sampela helpim bilong NNB na em i bilip olsem em bai kisim moa helpim long dispela yia. Wantaim dispela em i askim ol wokman bilong NNB long go het long mekim gutpela wok bilong ol bilong helpim kantri bilong yumi.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579


PE BILONG WANPELA YIA 52 NIUSPEPA

PLES	AIR
Mosbi	K 52.00
Arapela PNG eria	K 52.00
Ostrelia na Nu Silan	K84.00
Esia Pasifik na Japan	K99.00
Amerika na Yurop	K172.00



Ripot bilong ol PNG na Bogenvil lida kibung long Nu Silan

Nu Silan PM tokim PNG na Bogenvil lida long wokhat long painim gutpela sindaun



• Joseph Kabui.

BIG, BRA laik bringim bek gutpela sindaun long Bogenvil

ABBY YADI long Nu Silan i raitim

BOGENVIL rebel lida Joseph Kabui i tokaut gen long tingting bilong Bogenvil Interim Gavman na BRA long wokbung wantaim na bringim bek gutpela sindaun long ailan.

Mista Kabui i tok em laikim olsem namel long ol yet na PNG, "ol bai wok i go long nupela stat, nupela driman, nupela daireksen na nupela lait haus long lukautim mipela i go long nupela nam-bis."

Em i mekim dispela toktok long opisal opening bilong ol toktok long Mande bilong dispela wik, we i kamap nau long Lincoln Yunivesiti long Kraisesjes, Nu Silan.

"Mipela i bin wokhat, mipela i dikim graun long fil na planim ol dispela pikinini sid bilong pis, tras, hona na rispek long wanpela samting mipela i laikim, tasol sapos ol dispela sid i pundaun long ol bus, na tu antap long ol graun i gat ston, o ol pisin i kam na stilim ol, em bai mipela i no inap long kisim kaikai em mipela i laikim long en," em i tok.

Em i tok ol sid bilong pis toktok em i stap insait long Burnham Dikleresen, the Burnham Truce and Truce Monitoring Grup.

Mista Kabui i tenkim tu Nu Silan na Ostrelia gavman long helpim long traim stapim dispela hevi long Bogenvil ailan.

ABBY YADI long Nu Silan i raitim

NUPELA Praim Minista bilong Nu Silan Jenny Shipley i askim ol lida long PNG na Bogenvil long mekim bikpela wok bilong bringim bek gutpela sindaun na amamas i go long ol pipel bilong Bogenvil ailan.

Misis Shipley em i namba wan meri long kamap praim minista bilong Nu Silan. Em i givim dispela salens long ol PNG lida taim em i opim kibung long Mande bilong dispela wik. Kibung i kamap long Lincoln Yunivesiti long

Kraisjes, Nu Silan.

Em i tok Nu Silan na Ostrelia i givim bikpela helpim pinis long stretim dispela hevi long Bogenvil ailan. "Tasol i gat hevi long mipela i givim sapot yet long ol wok olsem bilong Truce Monitoring Grup. Mipela i lukluk nau long PNG na Bogenvil long go pas long ol wok bilong bringim bek gutpela sindaun na amamas long ailan," em i tok.

Em i tok dispela kibung bilong ol lida i givim gutpela sans long stretim ol samting long kamapim pis.

Em i tok Bogenvil i narakain nau. Na ol manmeri long ailan

i luksave olsem woa i no kisim kantri i go fowat.

"Bihain taim i stap long han bilong yupela. Tasol taim yupela kisim i go fowat ol wok bilong yupela bilong bringim pis, yupela mas save olsem gavman na ol pipel bilong Nu Silan bai sapotim," em i tok.

Misis Shipley i tok em i amamas long wok bilong Truce Monitoring Grup. Na disisen bilong PNG long salim wanpela bai patisen grup bilong ol lida i go long dispela kibung long kantri bilong em.

Em i tok em i gutpela tru bikos long 6-pela mun i go pinis, Bogenvil i bin stap wan-

taim amamas stret, we i winim 10-pela yia i go pinis.

"Hatwok na laik bilong Praim Minista Skate long ol wok bilong kamapim gutpela sindaun na amamas long ailan i as bilong dispela ol amamas i kamap nau. Na tu long hatwok bilong Bogenvil Interim Gavman lida Joseph Kabui na Primia bilong Bogenvil Tresisenel Gavman, Gerard Sinato," em i tok.

Em i no lus tingting tu long ol meri bilong Bogenvil, husat i mekim bikpela wok tu long bringim bek gutpela sindaun na amamas long ailan.

Skate askim ol yut helpim lida long painim gutpela sindaun na amamas

BIKPELA askim bilong Praim Minista Bill Skate i go long ol yut i mas kam insait tu na wokbung wantaim ol bikman meri long painim gutpela sindaun na amamas long ailan.

Em i mekim dispela toktok taim em i opim kibung bilong ol lida long Mande, em i kamap nau long Nu Silan. Mista Skate i tok agrimen bilong stapim pait tasol i no inap, moa wok i mas kamap long bringim bek gutpela sindaun na amamas i go long ailan. Na ol lida i mas kisim ol yut i kam insait. Na helpim ol long painim pis long Bogenvil.

Em i tok salens bilong ol lida long kibung ya em long painim, bihainim na strongim wok bilong painim gutpela sindaun na amamas o pis. Em i tok piksa i soim pinis olsem ol kantri klostu long Papua Niugini olsem Ostrelia, Nu Silan na Solomon Ailans i sapotim dispela wok bilong painim gutpela sindaun na ama-

mas long Bogenvil.

Em i tok namba wan samting long polisi bilong gavman bilong em em long stapim olgeta pait na bringim bek gutpela sindaun na amamas i go long ol pipel. Em i tok dispela em Oposisen Lida Bernard Narakobi na ol memba bilong olgeta sait bilong Nesanel Palamen long kantri i sapotim.

Tasol em i tok ol pipel bilong Bogenvil i laik luksave tru sapos lida bilong ol i gat dispela laik long wokhat long painim pis o nogat.

Mista Skate i tenkim tu gavman bilong Nu Silan na Ostrelia long helpim na lukautim ol kain kibung olsem. Na tu long saplaim ol soldia bilong Truce Monitoring Grup, husat i stap nau long Bogenvil ailan.

Kibung namel long Bogenvil Revolusinari Ami o Bogenvil Interim Gavman we i stap long wanpela sait, wantaim PNG bai patisen grup na ol lida bilong

Bogenvil Trensisenel Gavman i stat long dispela wik Mande, na bai pinis long tumora, Fraide Januari 23.

Ol agenda bilong kibung em:

- Agrimen bilong stapim olgeta pait long Bogenvil ailan;
- Kamapim wanpela 'Peace Keeping Force' long stap long Bogenvil;

• Rausim ol sekyuriti fos long Bogenvil ailan;

• Wok bilong bringim bek gavman sevis, na tu long kamapim ol arapela divelopmen insait long Bogenvil;

• Na ol politik toktok long Bogenvil; na

• Wanem taim ol bai paitim toktok long independens bilong

Bogenvil.

Ol gavman lida i no laik toktok long independens bilong Bogenvil long nau yet. long bihain taim em i orait. Tupela sait wantaim long dispela toktok bai tokaut long kibung i go olsem wanem long tumora Fraide Januari 23.

BRA mausman na PNG gavman wanbel long Kaputin i go pas long Bogenvil toktok

MEMBA bilong Rabaul Sir John Kaputin i gat bikpela eksperiens na save bilong stretim ol kain hevi olsem Bogenvil. Long dispela as, gavman bilong Bill Skate i makim em olsem lida bilong baipatisen grup bilong gavman husat bai i go pas long dispela bikpela toktok bilong stretim hevi long Bogenvil long dispela wik.

Long las palamen kibung long Desemba 1997, Sir John Kaputin i tokaut long palamen olsem ripot bilong em long 1989 we em i bin lida bilong palamen grup long lukluk insait long Bogenvil hevi, nogat wanpela Praim Minista i bin glasim na skelim yet. BRA mausman Joseph Kabui tu i bin wanbel long Sir John Kaputin i kamap lida bilong dispela Bogenvil toktok nau i kamap long Nu Silan.

Sir Kaputin i tok ol olpela Praim Minista i wok long kalapim em na go nabaut long olgeta kain kain rot bilong traim stretim hevi bilong Bogenvil. Tasol ripot bilong em wantaim grup bilong em long dispela hevi, nogat wanpela samting i kamap long en, bikos gavman i no bin laik lukluk long en.

Sir John Kaputin em mausman bilong Papua Niugini insait long Yunaitet Nesanel grup na em i bin stap insait long stretim ol kain hevi olsem Bogenvil long hap bilong Filipin na Afrika long Riwanda.

Sir John Kaputin i tokaut pinis olsem i gat rot ol lain bilong em insait long dispela intanesenel bodi i ken kam insait na helpim Papua Niugini long dispela hevi bilong Bogenvil. Tasol gavman i no save tingim olsem na oltaim tanim pes i go long Australia husat i bin stap insait long hevi bilong Bogenvil wantaim CRA maining kampani bilong em long kisim kopa. Na tu PNG i wok long lukluk i go tu long Nu Silan husat i wok long wok klostu wantaim Papua Niugini long salim ol kago na kaikai bilong em long mekim bisnis long hia aninit long intanesenel tred agrimen.

Long dispela wik, Praim Minista Bill Skate i tokaut olsem em bai sruk bek liklik tasol na larim lida bilong gavman long dispela bung. Sir John Kaputin na baipatisen grup long go pas long olgeta dispela toktok bilong stretim Bogenvil hevi. Em bai lukluk long toktok insait long arapela intanesenel toktok we Papua Niugini i stap insait long en.



• Sir John Kaputin.

Ol lida husat i makim maus bilong Papua Niugini insait long dispela Bogenvil bung long Nu Silan nau em, lida bilong Oposisen Bernard Narakobi, Bogenvil rijinol memba John Momis, Saut Bogenvil memba Michael Laimo, Bogenvil Afeas Minista Sam Akoitai, Stet Minista Sir Rabbie Namaliu na Praim Minista Bill Skate. Ol lain i makim Bogenvil Trensisenel Gavman (BTG) em Primia Gerald Sinato. Na man i go pas long makim maus bilong ol BRA paitman em Joseph Kabui na Martin Miriori. BRA komanda Sam Kauona tu i stap long dispela kibung long Nu Silan. Tasol nogat ripot long BRA lida Francis Ona long dispela miting.

Dispela kibung long Nu Silan long dispela wik bai lukluk long stretim na pasim ol toktok we Bogenvil i ken sanap long en na karimaut long stretim gen olgeta sindaun bilong ol long ples.

Dispela em laspela bung namel long PNG gavman na ol Bogenvil lida long lukim Bogenvil i kisim bek gutpela sindaun bilong ol gen. Bogenvil lida yet na ol pipel bilong ol bai i go bek na kamapim ol plen na rot bilong stretim olgeta samting gen. Bikpela astingting bilong dispela kibung em long rausim ol sampela samting i save hevi olsem, rausim ol ami long Bogenvil, stapim pait na ol birua na opim rot bilong ol sevis na ol wok divelopmen i go bek gen long provins.



Gavana Pokawin tokaut long givim nambawan sevis long Manus pipel

MANUS provinsal gavman i tokaut olsem ol namba wan sevis em bai wokhat long br9ngim long pipel e,m long sanapim na stretim ol klinik, skul, putim kolta long ol rot, an stretim ol redio na telepon sevis long provins.

Gavana Stephen Pokawin i tokaut long long dispela taim em i toktok long namba 6 provinsal asembli. Em i tok dispela em ol bikpela plen bikos ol pipel i no bin lukim ol dispela namba wan sevis long planti yia i go pinis. Mista Pokawin i bin ronim provins long planti yia i go pinis olsem primia. Tasol long mekim dispela i kamap, em i tok provinsal edministresen mas i gat sampela senis.

Mista Pokawin i tok gavman bilong em bai lukim olsem ol komyuniti helt woka na skul tisa i gat ol gutpela kapa haus. Em i tok gavman bai saplain yet ol skul na klinik wantaim wokman meri na samting bilong mekim wok.

Bikpela astingting tu em long strongim wok bilong ol bisnis insait long provins. Long narapela 5-pela yia, provinsal gavman i plenim long mekim ol dispela wok.

PNG Sosel Wokas i no amamas long gavman i brukim Hom Afeas na Yut

YAKAM KELO i raitim

DISISEN bilong Nesenel Gavman long brukim dipatmen bilong Hom Afeas, Wimen na Yut i go tupela hap i no gutpela tru long lukluk bilong Papua Niugini Sosel Wokas Asosiesen.

Nesenel Gavman i bin mekim kamap ol nupela senis we em i makim ol nupela Minista na brukim ol dipatmen i go tupela o liklik hap long Desemba 1997. Em i brukim dipatmen bilong Fainens i go tupela hap na tu rausim wanpela han bilong Hom Afeas na Yut.

Ektim Presiden bilong PNG Sosel Woka Asosiesen George Wrondimi askim Gavman long rausim dispela disisen bilong em long rausim Yut opis long han bilong Hom Afeas dipatmen na givim i go long Leba. Bipo ol i save kolim Leba na Emploimen na bihain senisim i go long Industri Rilesens. Nau em Yut na Leba dipatmen.

Mista Wrondimi i tok i nogat wanpela samting i rong o asua long opis bilong Nesenel Yut Sevis i stap wantam Hom Afeas dipatmen. Na i nogat gutpela as long mekim kamap dispela kain senis.

Nau nem bilong Hom Afeas tu i senis i go Sios na Famili Sevis dipatmen.

Mista Wrondimi i tok dipatmen bilong ol i bin kamapim pinis ol gutpela wok bilong em long nesenel developmen we em i kamapim pinis sosel developmen polisi bilong sosel sevis long Papua Niugini. Ol i gat 5 Yia Developmen Plen bilong karimaut ol polisi na ol arapela plen bilong

- Kamapim bikpela bisnis bilong pulim moa turis i go insait long provins, na tu long bisnis wok bilong painim na salim pis;

- Kamapim bikpela komyunikesen sevis olsem bilong redio na telepon insait long provins, we ol pipel i ken yusim;

- Stretim wok bilong Manus Siping Atoriti long givim gutpela nambawan sevis long pipel;

- Stretim ol ples balus insait long provins na yusim ol long bringm sevis long pipel; na

- Sapotim wok bilong ol sios na non gavman ogenaisesen.

Mista Pokawin i tok tu olsem long lukim olsem ol dispela plen i mas karim kaikai, gavman bilong em i noken wet long helpim mani i kam long enesenel gavman. Em i tok dispela helpim i save kam long nesenel gavman i no inap long developmen bilong provins.

"Mipela noken wetim nesenel gavman long helpim mipela. Mipela mas sanap long strong bilong mipela yet long bungim ol dispela salens," em i tok.

Tasol bikpela samting em i tok em ol dispela developmen i mas

ol arapela han wok insait long dipatmen.

Mista Wrondimi i tok planti plen na polisi bilong ol i no save wok o kirapim wok bikos olgeta taim gavman i oltaim senisim ol bos bilong ol. Planti bilong ol i nogat skul o save long wok edministresen na menesmen eksperiens insait long wok bilong sosel wok, em i tok.


Em i tok ol i nogat save na eksperiens tu long wok bilong sosel welfea, komyuniti developmen na sosel ogenaisesen. Olsem na ol i no inap long karimaut ol polisi na plen we i stap redi pinis long mekim wok.

PNG Sosel Wokas Asosiesen i singaut long Gavman long bungim bek dipatmen bilong ol na makim wanpela saveman stret bilong dispela wok na go pas long ol na mekim kamap sampela gutpela senis bilong helpim ol pipel bilong Papua Niugini, Mista Wrondimi i tok.

Ektim Presiden i tok sapos Gavman i askim ol, asosiesen bilong ol i redi long givim na tokaut long nem bilong 5-pela memba bilong ol husat i gat save na eksperiens long sosel wok.

Mista Wrondimi i tok planti taim Gavman i no save skelim gut long wok tru bilong sosel wok na i save go het long makim ol man i nogat save long dispela wok we i gat moa long 80 pesen (%) woka long pablik sekta.

Em i askim Gavman long senisim pasin bilong em na makim ol raitman bilong ol wok we ol i ken go pas long en na kamapim gutpela senis na developmen i go het long nau na bihain taim.



• Gavana Stephen Pokawin.

kamap bihainim laik na sindaun bilong ol pipel.

Gavana i tokaut tu olsem em bai wok bung wantaim 12-pela kaunsil presiden na 126 wod memba long mekim ol dispela plen i karim kaikai. Em i tok lokol na provinsal gavman bai mekim wok bilong em gut taim provinsal eksekutyutiv kaunsil i kisim opis. Em i tok gavman bilong em bai wok wantaim nesenel gavman long mekim sampela senis long ogenik lo, we bai ol provins gat moa pawa long mekim disisen bilong ol yet.

Luk olsem Japan gavman no inap baim woa kompensesen mani

I LUK olsem askim bilong ol ol PNG manmeri husat i kisim bagarap long Pasifik Woa long 50 yia i go pinis i no inap laki long askim bilong Japan i baim ol kompensesen mani. Dispela em bikos long wanpela agrimen em Japan i bin sainim wantaim ol birua kantri, bihain long woa long 1951.

PNG Asosiesen bilong Redres we i helpim ol manmeri i kisim bagarap long dispela Asia Pasifik woa em Japan i kamapim i helpim moa long 1000 manmeri i kisim bagarap long dispela woa.

Tasol embasi o opis bilong Japanis gavman long Mosbi i tokaut gen olsem Japan gavman i no inap long baim woa kompensesen mani. Bikos long dispela agrimen em (Japan) i

sainim bihain long woa taim, we ol i kolim San Francisco Triti.

Namba wan Seketeri bilong Japan embasi, Euggy Okaba i tok gavman bilong em i no inap long baim moa long K100 milien em PNG na ol arapela Asia Pasifik manmeri i kisim bagarap long woa taim i bin askim long en.

Mekim na mausman bilong PNG Asosiesen bilong Redres, Gabriel Rakua i no amamas long Japanis gavman. Em i givim strongpela toktok i go bek long Mista Okaba bilong Japanis Embasi long Mosbi, na tokim em olsem dispela i no stret. Bikos em i soim olsem Japan i laik hait long ol asua em bin mekim long woa taim.

Boi Sنداun kisim skolasip long stadi ovasis


Wanpela gred 12 sumatin husat i bin kamap olsem 1997 daks long Malala Sekenderi Hai Skul long Madang Provins i kisim pinis wanpela skolasip bilong Australian Gavman long go na stadi long wanpela bikpela yunivesiti long Canberra, Australia, em ol i kolim olsem Australian nesenel Yunivesiti.

Schubert Maketu bilong liklik ples Sissano long Sandaun Provins i bin kamap olsem daks long skul bilong em taim em i ksim ol mak A's tasol long las gred 12 eksem bilong em, na tu em i bin wokim ut tru ol skul wok bilong em long gred 7 inap long gred 10 na long gred 12 taim em i bin skul long Malala Hai. Wanpela sumatin husat no save bikhet na i save harim ol toktok bilong ol tisa bilong em, Mista Maketu i bin wok hat insait long klasrum na aut sait long klasrum. Nau gutpela hatwok na pasin bilong em i karim kaikai long em nau bai i go long bikpela yunivesiti long Australia.

"Yes, mi bin wok hat long skul, tasol mi mas tok aut olsem papa na mama bilong mi i bin givim sampela strongpela na gutpela tingting na toktok long mi long helpim mi, olsem na tenkyu bilong mi i mas go long tupela tu," Maketu i tok.

Maketu i mekim bikpela tok tenkyu i go long Sr Jane, em prinsipol bilong Malala Hai Skul na tu em i bin stap long dispela skul klostu nau long tripela ten yia, na tu bikpela tok tenkyu i go long olgeta tisa na ol narapela wok manmeri long skul long helpim em long kamap olsem gutpela sumatin na gutpela man.

Nogat wanpela gutpela skul i ken ron nating long gutpela nem bilong em tasol. Em i mas i gat moni na ol narapela samting long ronim skul. Wantaim dispela tingting, Maketu i givim bikpela tok tenkyu tu i go long Katolik Asdaiosis long Madang long helpim Malala Hai Skul taim skul klostu i pas. Maketu i tok olsem sapos ol Sios i no wokim ol wok bilong edukesen na ol narapela sosol sevises, ating bai kantri bilong yumi i no inap stap olsem yumi stap tude. Olsem na em i laikim nesenel na provinsel Gavman i mas givim moa luksave long



• Schubert Maketu wantaim ankol bilong em, Joe Eron, bihain long em i greduet.

ol sios na givim ol moa moni long mekim gutpela wok bilong ol.

Taim mipela i askim Maketu long wanem tingting bilong em i winim skolasip long stadi long bikpela yunivesiti long Australia, em i tok olsem: "Mi hamamas, tasol mi save olsem em bai wanpela bikpela salens tru na mi mas wok hat tru long kisim digri bilong mi. Tasol mi redi long dispela hat wok.

Papa bilong mi tokim mi pinis olsem ol i no save givim nating ol pas mak long ol sumatin bilong ovasis.

Maketu i wanpela sumatin tasol husait bai i go long Australian Nesenel Yunivesiti long mekim fes yia bilong em long 1998 long wanpela stadi ol i kolim Infomensen Teknoloji.

Katolik Sios i laikim planti lain i abrusim sik AIDS

STEVEN GIMBO i raitim

OL GAVMAN na non-gavman ogenesesen i noken tok tasol olsem kondom wanpela tsol em i rot bilong abrusim sik AIDS o long tok Inglis ol i save tok 'acquired immune deficiency syndrom'. Ol i mas toktok strong long ol samting olsem gupela famili laip, pasin bilong marit, na stap wantaim wanpela poroman tasol.

Dispela em i wanpela bilong ol strongpela toktok Katolik Bisop Konferens bilong Papua Niugini na Solomon Ailans i pasim long 1995 taim ol i kamapim Nesenel Katolik AIDS komiti bilong lukluk long sik AIDS.

Long Westen Pasifik, i nogat planti manmeri i gat HIV/AIDS tasol dispela sik i nogat marasin bilong em. Na em i wok long kamap strong na kalap long ol planti manmeri moa. Sapos yumi i no traim long stapim o kontrolim bai dispela sik i kisim yumi olgeta.

Wol Helt Ogenaisen (WHO) i tok olsem long Ogas 1997, 65,000 manmeri i gat HIV/AIDS insait long Westen Pasifik. Insait long dispela ripot, ol i tok HIV/AIDS i wok long kisim planti manmeri insait long PNG tu. WHO i tok tu olsem i gat planti moa manmeri husat i gat HIV/AIDS we ol i no save long en na namba inap abrusim 700,000.

Rijinol dairekta bilong WHO, long westen pasifik rijen, Dr S. T. Han i tok olsem wanem samting yumi mekim long traim long stapim dispela sik bai i soim yumi sais bilong dispela sik long dispela rijen. Em i tok dispela long taim em i adresim namba 48 miting bilong WHO rijinol komiti bilong westen pasifik long Sidni, Ostrelia long Septemba 23, 1997.

Dr Han i tok strong moa olsem olgeta kantri husat i memba long WHO i mas kirapim ol wok projek blong stapim o kontrolim HIV/AIDS na bilong wok klostu wantaim WHO. Wanpela rot bilong kontrolim HIV/AIDS em long mekim dispela awenes na skul bilong sik HIV/AIDS.

Kristen Kaunseling Institut long Goroka i save trenim ol kaunseles long skulim na helpim ol sik manmeri, famili, wantok na komyuniti bilong ol. Katolik Komyunikasyon Institut long Madang i save kamapim



• Ol sios woka i kisim wanpela kos bilong lainim ol pikinini long rait. Kristen pres long Madang i holim kamap dispela kos. Foto: Frieda Sila.

ol redio program, redio drama, piksa, video na televisen program long dispela sik.

Katolik Famili laip apostolet long Goroka i gat ol planti gupela kaset, posta, liklik buk na tisa gaid long tok Inglis na tok Pisin, Fr Mlak Zdzslaw bai kamapim long EMTV.

Nesenel Katolik AIDS komiti i save givim tupela de kos long skulim ol tisa na givim samting bilong tis long ol grup bilong 30 o 40 manmeri long olgeta daiosis. Dispela kos em bilong skulim ol manmeri bai ol i ken givim skul bilong slip wantaim man o meri long gupela kristen we na pasin.

Sik HIV/AIDS em i wanpela sik nogat marasin inap stapim. Olsem na gupel awe bilong abrusim dispela sik em long save long dispela sik na traim abrusim.

As tingting bilong skulim ol manmeri long sik AIDS em long soim yumi ol gupela we bilong stapim yumi wan wan man na meri long kisim sik HIV/AIDS na bilong mekim yumi i ken senisim pasin bilong yumi.

Tasol long traim na senisim ol olpela pasin bilong ol manmeri em i hatpela samting tru. Ol manmeri i mas i gat strongpela tingting na laik na ol i mas i gat save long wanem samting i gupela na wanem samting i no gupela. Na ol i mas yusim dispela save bilong ol long tingting gut na tok yes o nogat o yusim narpaela we bilong wokim wanpela samting na

luksave long ol samting i ken kamap taim yu bihainim wanpela laik bilong yu long mekim wanpela samting.

Olgeta grup i go pas long HIV/AIDS awenes insait long dispela kantri i mas skulim ol manmeri long gupela Kristen pasin na tingting na tu ol i mas givim gupela sapot long ol manmeri husat i gat dispela sik.

Wanpela gupela we long stat long HIV/AIDS awenes em long skulim ol tisa bai ol i ken skulim ol sumatin bilong olsem i nogat marasin na ol i mas traim long abrusim dispela sik. Olsem tasol, Nesenel Katolik AIDS komiti bilong Katolik Bisop Konferens bilong PNG na Solomon Ailans i wok long skulim ol sumatin bilong ol Katolik tisa koles olsem Kaindi, Vunakanau, Kabaleo na Holi Trinita Tisa Koles bai ol i ken givim skul na HIV/AIDS awenes long ol sumatin bilong ol taim ol i askim ol.

Nesenel Katolik AIDS komiti i luksave tu olsem sapos ol i laik skulim gut na kisim dispela HIV/AIDS awenes i go long olgeta manmeri, orait ol i mas skulim moa manmeri na tokim ol long mekim wok bilong skulim ol arapela manmeri long dispela sik.

Nesenel Katolik AIDS komiti i givim ol tupela de kos long 30 o 40 manmeri long wanwan daiosis na givim ol samting bilong skulim ol manmeri na pikinini. Ol i givim dispela kos

pisnis long olgeta daiosis na bai ol i givim moa skul long bihainim taim. Ol dispela tupela de kos i redim ol manmeri long givim ol skul long gred seven sumatin.


Wanpela bikpela as tingting bilong dispela em long skulim ol yangpela manmeri long lukautim ol yet gut na long lukautim ol arapela tu. Dispela skul i ken helpim ol bai ol i ken lukautim laip bilong ol yet, na bilong ol arapela i kamap helti na gupela.

Gupela HIV/AIDS awenes i save helpim ol yangpela long skulim ol arapela long luksave long wanem samting ol i laikim long laip bilong ol, na long tok nogat long pasin nogut we i ken bagarapim laip bilong ol. Olgeta dispela samting em ol namba wan samting we i ken helpim ol long laip bilong ol na bai helpim ol long abrusim sik HIV/AIDS.

Katolik Bisop Konferens bilong PNG na Solomon Ailans i kamapim Nesenel Katolik AIDS komiti long 1995 na ol i givim dispela komiti wok bilong kamapim HIV/AIDS awenes na edukesen.

Nesenel Katolik AIDS komiti i wok long strongim gupela Kristen pasin olsem pasin bilong marit wantaim trupela laik, pasin bilong ol marit long stap strong wantaim wanpela poroman o meri na trupela na gupela Kristen famili laip olsem wanpela we bilong stapim sik HIV/AIDS.

TU MINIT TINGTING



FRANK MIHALIC i raitim

OL PLAWA I SAVE STORI LONG YUMI

LONG taim mi skulboi, mi go limlimbur wantaim bubu bilong mi. Mitupela i wokabaut na i kamap long wanpela naispela liklik haus. Dispela haus i gat wanpela banis nabaut long en, na banis ya i karamap long planti naispela retpela plawa i gat gupela smel tru. Mi sanap i stap na mi smelim sampela dispela plawa na mi tokim bubu olsem, "Bubu, ol dispela plawa i naispela tru."

Nau mi harim nek bilong wanpela misis i sindaun long veranda bilong haus. Em i tok olsem: "Goan, yupela i ken kisim ol plawa long laik bilong yupela."

Orait, nau mi kisim tupela retpela plawa na mi tenkyu long lapun meri ya i sindaun long wanpela longsia. Nau em i tokim mi olsem, "Mi bin groim ol dispela plawa bilong givim amamas long ol arapela manmeri. Mi yet, mi aipas na mi no inap lukim ol."

Mi harim dispela na mi kalap nogut. Nau dispela tupela plawa i gat spesel mining. Tupela i spesel samting.

Long olgeta hap bilong graun i gat sampela plawa i stap. Maski ais na sno i karamapim ples; maski i gat wesana tasol; maski i gat wra tasol; sampela plawa i save swim antap long wara. Ol plawa i save pulim yumi long kala na smel na luk bilong ol. Ol plawa i save bilasim ol rum na haus na rot bilong yumi.

Ol plawa i mak bilong laik na pasin hepi. Long taim ol visita i kam, yumi save amamas na putim ol rop plawa nabaut long nek bilong ol. Long taim meri i bilas, em i putim wanpela plawa long gras bilong em. Long taim yumi planim man o meri, yumi save troim ol plawa antap long bokis matmat olsem las "gutbai" bilong yumi.

Ol plawa i gat planti arapela mining tu. Long taim Jisas i wokabaut na i lukim ol plawa lili long gaden, em i tokim ol disaipel olsem: "Yupela i lukim ol plawa i gro hia, laka? God yet i lukautim ol. Em i save lukautim yu tu. No waris!" (Lukim Matyu 6:28)

Long Olpela Testamen long buk ol kolim "Song Bilong Solomon" i gat planti tok long mining bilong ol plawa long taim wanpela yangpela man i wok long askim yangpela meri long maritim em. Tude yet long planti kantri yangpela man i save givim ol naispela plawa long gelpren bilong em.

Beibel i putim sampela narapela skul tu insait long ol plawa. Em hia ol naispela kala samting bilong plawa ol bilong sotpela taim tasol. Jisas yet i bin tok olsem. Lukim: Luk 12: 22-31. Ol plawa ya i makim laip bilong yumi; tupela wantaim i bilong sotpela taim tasol. Maski long lus long olkain samting bilong ausait olsem klos na luk na bilas. Samting tru em i stap insait. I olsem spirit na lewa bilong yumi i winim bodi na ausait na skin bilong yumi. Ausait bai i pinis na i bagarap. Insait, nogat.

Wanpela skul moa: Yumi save katim sampela naispela plawa na sanapim insait long botol antap long alta long haus lotu. Bllong wanem? Bikos dispela i gat spesel mining. Em hia: Klostu olgeta plawa ol meri. Orait, bikos ol meri, ol i save karim. Sapos yumi katim stik plawa nau, yumi pinisim laip bilong em; em i no inap karim moa. Dispela i min: long taim plawa i sanap long alta, em i ofaim laip bilong em long God.

Olsem na em i makim yumi.....husat i laik ofaim laip na wok bilong yumi long God. Ol plawa long alta ol i senisim yumi.

Tude yu go ausait long gaden o go limlimbur na lukluk gut long wan wan plawa. Lukim naispepa kala bilong wan wan; lukim bilas bilong en; smelim wan wan. God i bin wokim ol; God i save lukautim wan wan. Na em i save lukautim yu tu. No waris!

Kristen laip senta redi long wok misin

ARI GUH DANDEE i raitim

I GAT wanpela nupela grup ol i kolim ol yet long 'Spiritual Masing' grup i wok long karim aut wanpela kain wok misin insait long Morobe provins long traim helpim na senisim laip bilong ol sin manmeri, na ol yet husat i mekim raskol pasin.

Wanpela pasto bilong Kristen Laip Senta (CIC), Pasto Tiringa Seka i go pas long dispela grup. Ol i kamap long Wau long las wik Fraide long statim wankain

wok bilong ol long Wau i go long Biaru na bihain bai ol i go long Garaina, Popondetta na bihain long Mosbi.

Pasto Seka i tok em i gat bikpela tingting olsem insait long dispela wokabaut bilong ol, ol bai traim wok hat tru wantaim helpim bilong Papa God long traim na kisim bek ol yangpela husat i bungim bikpela hevi long laip bilong ol na ol painim hat tru long sindaun bilong ol.

Em i tok insait long kantri, em i bin mekim wankain ol wok na planti ol yangpela i senisim laip bilong ol pinis. Olsem

na long dispela taim em i wok long go raun long Morobe, Popondetta na Mosbi.

Pasto Seka i tok moa olsem em i save amamas tru long lukim ol yangpela i tanim bel na senisim laip bilong ol na kisim bikpela Jisas Kraus long laip bilong ol we i gupela tru.

Em i askim ol arapela sios na gavman long lukluk long ol kain wok we grup bilong em i mekim na olgeta i mas bungim tingting na wok bung wantaim long daunim ol kainkain hevi bilong lo na oda insait long kantri.

Namba 21 Sinod bilong ELC-PNG kamap gut tru

. . . Niugini Ailan distrik i ken amamas

JAMES KILA i raitim

PLANTI ol manmeri na ol deleget husat i bin go long stap insait long namba 21st Sinod bilong Evanjelikal Luteran Sios (ELC-PNG) i bin amamas tru long gut-pela pasin bilong lukaut ol i kisim.

Ol ogenaisa bilong Sinod long Kimbe i bin mekim gutpela wok tru long lukautim moa long 1,000 manmeri na deleget husat i bin kamap long Sinod wantaim planti kaikai, gutpela wok bilong trenspot na gutpela ples bilong slip.

Dispela em i namba wan taim tru bilong Niugini Ailan Distrik long lukautim Sinod. Tasol olgeta samting i kamap gutpela tru. Planti ol manmeri i amamas long gutpela redim bilong Sinod na planti kaikai i bin stap.

Niugini Ailan i bin kamap olsem distrik bilong ELC-PNG long 1987. Bipo long dispela planti ol lain wokman bilong bikples Niugini olsem Morobe i bin go baim ol oil pam blok long Wes Nu Briten. Ol dispela lain i kirapim wok bilip bilong Luteran Sios long Niugini Ailan na tu strongim wok bilong ELC-PNG bihain. Wapela bilong ol dispela namba wan wokman husat i kisim bilip bilong Luteran Sios i go long Niugini Ailan em Zureka Kuapo. Dispela man em i kisim Luteran namba wan taim tru i go olsem long Bogenvil, Rabaul, na bihain i go olsem long Kimbe.

Nau yet ol seket bilong Niugini Ailan rijon em Kimbe, Rabaul, Bialla na Kavieng na Hoskins.



• Ol lain yut bilong Gebensis long Markham i soim wapela song bilong ol long ELC-PNG sinod long Kimbe.

Olgeta dispela ol seket i bin wok wantaim long mekim dispela sinod i kamap gut. Tasol bikpela wok tru em ol lain Kimbe na Bialla. Ol yut grup na ol kongrigesin bilong dispela tupela hap i wok hat tru long lukautim ol deleget long sinod. Ol peris long Kimbe, Bialla na ol eria olsem Buvussi na Sarokolok i bin bungim han wantaim na lukautim ol deleget long sinod.

Dispela 21st Sinod i bin kamap long Kimbe provinsal haikul. Planti ol deleget i bin yusim ol klasrum na domitori olsem ples

bilong slip na go long miting bilong Sinod.

Wapela bikpela samting tru i bin kamap long dispela Sinod em ileksin bilong nupela Het-Bisop bilong ELC-PNG.

Ileksin i bin kamap long Mande na ol i makim Dokta Wesley Kigasung olsem nupela Het-Bisop bilong ELC-PNG.

Long progrem pastaim tru, ol i bin makim Sarere, Januari 17 olsem taim bilong ileksin bilong nupela het Bisop na Asisten Bisop

em pasta Kiage Mоторo. Tasol long Sarere yet i bin gat planti tok-pait long sait bilong Konstitusen o Lo bilong Sios na ileksin i no bin kamap. Olsem na ol i surukim ileksin i go long Mande.


Planti ol deleget husat i bin tok-tok wantaim Wantok Niuspepa i tok olsem dispela Sinod long Kimbe i gutpela na nogat hevi i kamap. Ol pipel i amamas long

Masta ov Seremoni insait long dispela 21st ELC-PNG, Bob Mahais i tok planti ol wok helpim tru i bin kamap taim ol memba bilong Sios insait long Kimbe na Bialla eria i bin putim.

Mista Mathai i stori tu olsem ol wan wan seket long Niugini Ailan i bin putim moni long lukautim sinod. Em i tok mak bilong moni ol i kamapim em samting olsem K85,000.

Ol i bin givim K4,000 i go long Kimbe provinsal haikul long yusim ol samting bilong skul long dispela sinod. Lutheran Developmen Sevises i bin peim K7,000 long wokim nupela wara tenk long saplain Kimbe Haikul long taim bilong Sinod. Dispela tenk bihain long sinod em bai haikul i kisim olgeta.

Ol komiti husat i lukautim gutpela ron bilong dispela sinod em long sait bilong trenspot em Mista Poi Degemba, sait bilong haus-kuk na kaikai em Carson, siaman bilong Sinod em Soma Wandong, komiti bilong lukautim ol Rudolf Mileng, man lukautim moni o fainens em Paul Nabo na lapun Benny bilong Tamba peris i lukautim stoa haus na Joshua i lukautim musik na entateinmen.



Dokta Wesley Kigasung em nupela Het Bisop bilong ELC-PNG

JAMES KILA i raitim

EVANJELIKAL Luteran Sios bilong Papua Niugini (ELC-PNG) nau i gat nupela Het-Bisop bilong en. Dispela man ya em Dokta Wesley Waekesa Kigasung.

Ol deleget bilong ELC-PNG i bin makim Dokta Wesley insait long namba 21st Sinod bilong ELC-PNG long Kimbe long Mande. Tupela narapela i bin sanap resis wantaim em, em Pasto Peandui Kumin bilong Mt Hagen na Pasto Giegere Wenge.

Dokta Wesley i kisim ples bilong Bisop Sir Getake Gam, husat i bin stap long-pela taim tru olsem bisop.

Nupela Het Bisop, Rev. Dokta Wesley Kigasung i gat 47 krismas na em i bilong ples Aluki insait long Bukawa eria long Morobe provins.

Stori bilong Dokta Wesley i go olsem. Em i bin skul long Gelem na Asaroka Luteran Haikul long 1966 i to 1969. Long 1970 i go 1975 em i skul long Martin Luther Seminari long Lae na winim basela digri long Tioloji. Dispela em i stadi long Sios. Em i kisim odinesin long Epril 27, 1980 long Wagang-Lulu, Bukawa.

Em i bin wokim wok pasto long Kaintiba eria long Galp provins long 1979 i go 1980.

Long 1981 i go 1982 em i wok olsem tisa long Martin Luther Seminari. Long 1983 i go 1984 em i go stadi long tokples long kantri Jemani. Long 1985 i go 1989 em i go stadi long Chicago long Amerika na kisim Dokta Digri long Tioloji. Em i kambek na mekim wok pasto na tisa long Martin Luther Seminari. Na long 1991 ol i makim em i kamap olsem prinsipal bilong Martin Luther Seminari inap 1997.



• Ol mama bilong Kimbe i redim kaikai bilong ol deleget bilong sinod. Foto: James Kila.

ELC-PNG *Sined Spesel*

Man Simbu em namba-tu ELC-PNG Bisop

JAMES KILA i raitim

REVEREND Kiage Mоторo bilong Simbu provins i bin kamap olsem namba tu bisop bilong Evanjelikal Lutheran Sios (ELC-PNG).

Rev Mоторo i bin stap olsem namba tu bisop na nau em i winim bek dispela posisen. Rev Mоторo i



• Pastor Piandui Kumin i bin wanpela kendidet bilong Het-bisop tasol em i bin lus.

gat 40-krismas na em i bilong Yobai insait long Simbu provins. Em i pinisim skul long Kewamugl Baibel Skul long 1968. Long 1980 i go 1984 em i skul long Ogelberg Lutheran Hailans Seminari na greduet wantaim diploma long Tioloji. Em i bin wok long Diama, Omkolai Seket long 1977. Long 1976 i go 1979 em i wok olsem paris seketeri long Omkolai Seket. Long 1986-1987 em i wok pason long Du peris, Mu Seket. Long 1987-1988 em i wok pasto long Mumomat na long 1989-1991 em i wok pasto long Kagai Seket.

Long 1992, em i wok long sosel konsen opis long Kundiawa, Simbu distrik. Long 1997 Sios Kausil i givim em wok bilong Ekting Asisten Bisop posisen long nesenel opis.

Nau yet Rev. Kiage Mоторo i kisim bek dispela posisen.

Man husat i bin sanap resis wantaim Rev. Kiage Mоторo em presiden bilong Yabem Distrik, Robert Gesungtau.

Dispela 21st Sinod bilong ELC-PNG i bin lusim 5-pela man i sanap long ileksin bilong het-bisop na asisten bisop. I bin gat 3-pela man i sanap long posisen bilong het-bisop. Ol dispela man em Dokta Rev. Wesley Kigasung (nau em Het-Bisop ol i ilektim), Rev Piandui Kumin na Rev Giegere Wenge.



• Sege Yut bilong Kimbe i amamas long ELC-PNG sinod. Aninit: Ol pasto bilong Niugini Ailan distrik i lukautim komunio sevis.



Off-Peak Times

STD calls within PNG are cheaper between 5.30 pm -7.30 am weekdays and all day Sunday from 5.30 pm (Sat) - 7.30 am (Mon).

IDD calls to South Pacific countries (Band 1) are cheaper between 10.00 pm - 6.00 am weekdays and all day Sunday from 10:00pm (Sat) - 6.00am (Mon).



TELIKOM PNG
Now we're really talking!

Jiwaka Distrik bai lukautim namba 22 ELC-PNG Sinod

JAMES KILA i raitim

NIUGINI Ailan Distrik bilong Evanjelikal Lutheran Sios (ELC-PNG) long stat bilong dispela wik i givim Sinod i go long han bilong Jiwaka Distrik.

Jiwaka em wanpela distrik bilong ELC-PNG long Isten Hailans provins. Dispela sinod em namba 22nd sinod.


Planti ol manmeri na ol deleget husat i bin go long stap insait long namba 21st Sinod bilong Evanjelikal Lutheran Sios (ELC-PNG) i bin amamas tru long gutpela pasin bilong lukaut ol i kisim.

Ol ogenaisa bilong Sinod long Kimbe i bin mekim gutpela wok tru long lukautim moa long 1,000 manmeri na deleget husat i bin kamap long Sinod wantaim planti kaikai, gutpela wok bilong trenspot na gutpela ples bilong slip.


Dispela em i namba wan taim tru bilong Niugini Ailan Distrik long lukautim Sinod. Tasol olgeta samting i kamap gutpela tru. Planti ol manmeri i amamas long gutpela redim bilong Sinod na planti kaikai i

bin stap.

Niugini Ailan i bin kamap olsem distrik bilong ELC-PNG long 1987. Bipo long dispela planti ol lain wokman bilong bikples Niugini olsem Morobe i bin go baim ol oil pam blok long Wes Nu Briten. Ol dispela lain i kirapim wok bilip bilong Lutheran Sios long Niugini Ailan na tu strongim wok bilong ELC-PNG bihain.



• Poto i soim matmat bilong Mista Zureka Kuapo. Man i sanap arere (rait-han) em pikinini bilong em. Zureka em namba wan Lutheran hetman insait long Niugini Ailan Distrik. Em tasol i bin bringim bilip bilong Lutheran Sios (ELC-PNG) i go long Rabaul, Bogenvil na bihain long Kimbe. Em i bin dai long Disemba 24, 1977.

ELC-PNG *Sinod Spesel*

• Sif Enjinia bilong *Mamose Express* Wilford Virani i holim wil bilong sip.

Ol kru bilong *MV Mamose Express* gat stail bilong ol yet

JAMES KILA i raitim

WOK bilong raun long sip long solwara i gat gupela bilong en na tu i ken sore bilong en.

Dispela em toktok i kam long kepten bilong sip bilong Lutheran Shipping, *MV Mamose Express*, Masta Terrence Manup.

Kepten Manup i tok sampela taim laip antap long bot i save skin-les liklik na sampela taim i gat gupela amamas bilong en. Kepten Manup bilong Aitape long Wes Sepik provins. Em i gat 11-pela yia eksperiens long wok long sip olsem kepten. Em i bin wok 5-pela yia wantaim Luship. Bipo long dispela em i bin wok 6-pela yia wantaim Poroman Shipping long Madang.

"Sampela taim ol wok yu ting long wokim long graun, yu bai ino inap pinisim bikos wok bilong yu em i stap long si,"

"Sampela taim yu ken lusim femili bilong yu longpela taim na wari i ken painim yu sapos yu no lukim ol. Ol pikinini i save wari tu sapos ol i no lukim yu," kepten Manup i tok.

MV Mamose Express i save ron long ol dispela rut. Lae-Kimbe bihainim

Kepten Manup i gat 14-pela kru i stap aninit long lukaut bilong em. Sampela taim 3-pela kuk i save joinim ol long ron bilong sip. Ol dispela kuk i bilong Lae Bisket kampani.

Ron bilong *Mamose Express* i save go olsem long voyej A em Lae-Kimbe-Rabaul, voyej B em Lae-Buki-Maneba, voyej C em Lablab-Lae na voyej D em Lae-Oro Bay.

Ol ron bilong *Mamose* long voyez not em, Lae-Buki, Finsch-Wasumadang-Wewak. Voyez B em Madang-Wewak.

Ol man husat i save halivim kepten Manup em fes-opisa Kambai Andrew na seken-opisa Jimmy Muyu.

Sif enjinia bilong *MV Mamose* em Wilford Virani na namba tu bilong em Andrew Mingai.

Mamose Express i bin karim ol deleget bilong ELC-PNG i to long 21st Sinod we i bin kamap long Kimbe long las wik. Dispela ron bilong sip i bin gupela tru na planti manmeri i amamas. Tasol namel long solwara bilong Siassi, planti i bin kisim taim liklik bikos solwara i solap na bikhet olgeta.

Ol kru bilong sip na kepten i bin stap isi tasol na givim gupela toktok long ol pasindia. Ol i tok ol manmeri mas stap long wanpela hap tasol na noken go kam nabaut antap long bot.



• *MV Mamose Express* sua long Kimbe.

Pawa bilong prea daunim strong bilong Siassi si-buruk

... wanpela mirakel bilong Papa God

JAMES KILA i raitim

PLANTI ol kepten na kru bilong ol sip i ken tokaut olsem ol i save bungim hatpela traim tru taim ol i go olsem long solwara bilong Siassi Ailan na Finschafen. Ol solwara bilong Siassi i save solap bikpela tru na i save tromoi sip i go kam tumas. Wankain tu long strong bilong solwara long hap bilong Finsch ol i kolim Bobongara.

I gat stori olsem planti sip i bin go daun long dispela hap long strong bilong solwara na bikpela win. Yes, solwara bilong ol dispela hap i save kam olsem maunten stret na karamapim ol bot.

Mi save harim dispela toktok "Siassi si-buruk" tasol las wik mi yet i skelim strong bilong dispela solwara na lukim stret bikhet bilong en. Mi bin go long mekim ripot bilong ELC-PNG sinod long Kimbe na mi kalap long *MV Mamose Express* long Lae.

Solwara i bin stap isi stret taim sip bilong Luteran Shipping, *MV Mamose Express* i seil aut lusim bris long Voco Poin.

Ol manmeri na ol pasindia antap long sip i amamas na tok-tok na lukluk i go aut long Lae. Planti i wokabaut i go kam antap long sip na i no wari tumas.

Sinod

MV Mamose Express i bin stat seil i aut bihain liklik long narapela sip bilong Lutheran Shipping *MV Gejamsao* i seil i go aut. Dispela em samting olsem 10-kilok long Sarere moning, Januari 10, 1998. Em i karim sampela grup bilong ol deleget bilong bikples i go long namba 21st Sinod bilong Evanjelikal Lutheran Sios long Kimbe.

Long samting olsem 4-kilok long apinun sip i stat long seil i go olsem long solwara bilong Finschafen. Tasol taim yu stap insait long bot yu ken lusim sampela ol liklik ailan bilong Siassi i kamap longew. Dispela taim liklik win i stat long kirap. Samting olsem 5-kilok bikpela win i kirap na solwara i kamap bikpela stret. Kepten bilong *Mamose Express*, Terrence Manup i toksave long spika bilong sip olsem sip i go bungim bikpela solwara na ol manmeri mas noken raun long sait bilong bot. Ol i mas sindaun long wanpela hap tasol.

Long dispela taim turangu sampela deleget bilong hailans tu i bin stap na i bungim hatpela taim stret. Planti i traut antap long sip. Ol i tok bel bilong ol i tanim tanim na het bilong ol i raun na ol i stat long traut.

Taim sip i seil abrusim ol liklik ailan bilong Siassi olsem Tuam si i kamap strong tru.



• Ol pasindia i amamas taim solwara i slip na ol i go long fran bilong bot.

Sip i goap na go daun na go sait. Turangu ol sampela susa bilong hailans i traut na mekim planti nois tru long top-kebin bilong sip we mi bin stap long en.

Sampela ol lain husat i save raun long sip planti taim i no wari tumas. Mi bin gurua tru long lukim ol kru bilong bot i ron i go kam long stretim ol samting antap long sip. Ol i no poret.

Long 6-kilok long apinun ol kru i mekim toktok long spika olsem taim bilong kisim kaikai. Kaikai bilong dispela apinun em rais na Tulip mit. Turangu mi lukim olsem planti lain i no tingting long go kisim kaikai. Ol i pret long wok-abaut na ai-raun.

Long 7-kilok long nait ol deleget long bot na ol pasto i holim wanpela liklik lotu. Dispela taim pasto Conrad Ake i ridim Baibel na autim tok. Baibel riding i stori long taim Jisas wantaim ol apostel bilong em i ron long bot long Wara Gallili na taim bikpela win na si i kirap. Jisas i bin silip baksait long bot. Ol apostel bilong em i bin

porot na i go kirapim em. Taim Jisas i kirap i tokim solwara long stap isi na win tu i bin stop.


Dispela taim planti ol manmeri na ol deleget long bot i lukim stret long ai bilong ol taim solwara i slo daun na pinis long bikhet.

Prea

Kepten bilong *MV Mamose Express*, Masta Terrence Manup i tok tu olsem dispela prea bilong Pasto Conrad Ake i karim kaikai stret. Ol manmeri antap long bot i bilip tru long prea.

Bihain long dispela liklik lotu antap long bot olgeta samting i go orait tasol na sip i ron gut tasol i go bihainim Bulu Poin i go olsem long Cape Gloucester. Sip i bin go sua long Sande moning long bris long Kimbe.

Long dispela taim planti ol manmeri i amamas tru. Ol i toktok na kaikai buai. Taim ol i lukim kapa bilong Kimbe taun i stap longwe, planti i



• Solwara i solap na bikhet stret namel long Siassi na Finsch. Poto i soim wanpela liklik ailan bilong Tuam long Siassi.

Barnabas Sakau na wok misin namel long Mingai pipel

... man Kabwum bringim Luteran Sios
long bus bilong Wes Nu Briten

JAMES KILA i raitim

SAMTING olsem 20-kilomita lusim Mosa Oil Pam fektori na i go antap long bus bihainim ol wel pam blok, bai yu ken lukim wanpela liklik haus-lotu ol i wokim long timba na kapa. I gat wanpela liklik eid-pos tu i sanap long sait.

Dispela haus-lotu em i save sevim samting olsem 200 manmeri bilong ples ol i kolim "Mingai".

Dispela ol lain pipel em Luteran Sios i bin painim ol na kisim ol 1986 tasol. Dispela em 12-pela krismas i go pinis. Namba wan man tru long bringim bilip bilong Luteran Sios i go long dispela bus ples em Barnabas Sakau.

Pastaim tru ol lain Mingai i no save stap long wanpela hap na kolim olsem ples o viles. Nogat. Ol i save wokabaut raun long bus tasol na kaikai ol samting bilong bus long stap. Bipo long misin i painim ol, planti bilong ol i no save long samting bilong waitman.

Nau yet tupela Sios we i save wok namel long ol dispela lain Mingai pipel em ELC-PNG na South Seas Evangelikal Sios (SSEC).

ELC-PNG pasto, Hyll Motec nau i wok wantaim ol Mingai pipel, stori olsem ol dispela lain

Mingai pipel i nogat ples tru bilong ol. Ol i save wokabaut long bus tasol na bungim ol kaikai bilong ol. Ol i no save sindaun long wanpela hap tasol. Sapos ol i stap malolo long wanpela hap na wanpela memba bilong femili bilong ol i dai ol bai lusim na wokabaut i go stap longwe samting olsem 5-kilomita olgeta.

Pastor Motec i stori olsem las wik tasol 4-pela marit i bin wokabaut i kamaut long bus.

Dispela man Barnabas, husat i mekim pren wantaim ol Mingai pipel em i no wanpela pasto, bisop o hetman bilong Sios. Nogat. Em i wanpela wokman nating tasol. Bilip bilong em long Sios na Papa God i mekim em i karim Luteran Sios i go long ol Mingai pipel long Wes Nu Briten.

Wok-moni

Em i bin wanpela yangpela man yet, tasol wok-moni long sait bilong oil pam i pulim em i go long Wes Nu Briten provins. Taim em i kamap long Kimbe em i bin wok long oil pam blok i go na bihain em i tingting long baim blok bilong em yet. Em i wokaut na makim wanpela blok em i laik baim long K500. Nau yet em i save stap wok wantaim ol dispela lain Mingai pipel. Planti i save kolim em olsem brata bilong ol tru.




• Barnabas Sakau na 5-pela pikinini bilong em. Em i poin i go long maunten long sait bilong Morokeya em i bin wokabaut bihainim i go kamap na painim ol Mingai pipel. Aninit: Karabus (rait-han) em i nogat gutpela han. Em i disebel tasol wok bilong em i save winim planti ol gutpela man. Em tasol i bin katim planti ol bikpela diwai long Mosa eria taim oil pam divelopmen i stat go insait long eria long hap. Ol foto: JAMES KILA

Barnabas i tok ino narapela rot i bringim misin o wok bilong Sios i go long ol Mingai pipel. Nogat. Em i wok bilong soim gutpela pasin na kastom na tu pasin bilong serim kaikai na pasin namel long ol yet. Pasin bilong ol Mingai pipel em i wankain olsem ol pipel long bikples Niugini.

Barnabas Sakau em i nambawan man tru long go na stap wantaim ol lain Mingai pipel. Barnabas em i bilong Kabwum long Morobe provins. Em i stori olsem em i stat wokabaut long maunten bilong ol asples bilong Kimbe taun em ol lain Morokeya na wokabaut bihainim maunten i stap long sait bilong Mosa. Em i bin baim wanpela hap graun long planim oil palm bilong em long 1982. Bihain kampani i laik surukim ples bilong mak bilong oil pam i go antap. Tasol wanpela masta-mak o seveya bilong Popondetta, nem bilong em Botten Pusembo i sapotim ol na ol i stap strong.

Barnabas Sakau i mekim pren wantaim ol sampela lain bilong Mingai. Long dispela taim planti bilong ol i save bilas long purpur na malo yet. Dispela em long 1982.

Bihain long em i bungim ol em i statim wanpela haus bilong em na bungim sampela ol poroman bilong Mingai na ol i wokim haus na stap wantaim. Bihain long sampela mun em i stat long autim tok bilong Baibel long ol na wanpela man Mingai ol i skulim em long kamap olsem hetman bilong Sios long hap. Nem bilojng em Bobiang. Ol i salim Bobiang i go long stap long Bialla long lainim wok misin. Em i go stap wantaim Teteng-Gesing Wike. Nau dispela man em presiden bilong Ukata distrik bilong ELC-PNG. Ol i salim Bobiang olsem nambawan man Mingai long go stap wantaim Bisop Gerry Sunga long Bialla. Ol i skulim em long tok bilong God na tru em i namba wan man long bringim haus-lotu i go long ol



Mingai pipel. Namba wan haus-lotu ol i wokim em long ol samting bilong bus na kunai ruf tasol.

Namba tu man Mingai long kamap olsem hetman em Luke Keleso. Ol i bin salim em tu i go stap long lainim wok misin long Bialla.

Stat long 1986 inap nau 3-pela pasto bilong ELC-PNG i wok stap namel long ol Mingai pipel. Namba wan pasto nem bilong em Jack Ito na namba tu em Nasaking Busop.

Nau yet dispela sios long Mingai i stap insait long

Sarokolok Peris. Dispela peris em planti ol lain manmeri bilong bikples Niugini husat i go wok long ol oil pam blok.

Barnabas i bin singel man taim em i go wok long blok bilong em long Mingai. Nau yet em i gat 5-pela pikinini na em i marit long ples bilong em yet.

Long las wik ol lain manmeri bilong Mingai i soim tru kala bilong ol long singsing long ELC-PNG 21st Sinod i kamap long Kimbe. Ol i bin mekim singsing na bringim ol lain deleet i go insait long Sinod.



• Bobiang Tau (pasim laplap) em namba wan hetman bilong ol lain Mingai taim Luteran Sios i kisim ol. Em i sanap aut-sait long haus-lotu ol i wokim long kapa na timba.

Bulolo distrik i kamapim disasta na emejensi komiti

ARI GUH DANDEE i raitim

BULOLO Distrik long Morobe provins nau i kirapim pinis wanpela bodi bilong disasta na emejensi sevis insait long distrik bilong karim aut ol wok bilong ol disasta insait long distrik.

Siaman bilong dispela tim Kawalibu Yawing i tok, ol i kamapim dispela bodi bikos i gat planti oi kainkain hevi i save kamap long bipo tasol i nogat wanpela kain bodi i stap bilong luksave long ol hevi bilong ol pipol na pait long en.

Kain hevi olsem san, ren, paia, graun i bruk na ol narapela bikpela hevi tu we planti ol pipol i lusim laip bilong ol bikos i nogat wanpela gutpela bodi disasta i kamap bilong lukluk long ol kain hevi.

Long dispela yia, dispela disasta emejensi sevis bodi i kamap bilong lukluk long ol hevi bilong ol pipol na ol wok klostu wantaim ol pipol na ol gavman wok manmeri long sevim ol pipol long taim bilong hevi.

Long lukluk bilong Mista Yawing, dispela bikpela san i bin kamap long las yia i bin bagarapim tru planti ol samting na planti ol pipol i bagarap olgeta yet na ol i laikim bai gavman i mas lukluk long helpim ol pipol.

Em i tok dispela em i bikpela hevi tru bilong ol pipol long Wau na em i laikim olsem gavman i mas lukluk raun insait long helpim ol pipol bikos planti ol pipol bilong ol ples insait Bulolo distrik i no gat ol gutpela kaikai bihain long dispela bikpela san.

Em i tok tu olsem, i gat luksave bilong dispela disasta komiti olsem, planti o helt senta insait long ol liklik ples long distrik i no save kisim gut marasin bilong helpim ol sikmanmeri na ol pikinini long ol ples na planti i dai. Dispela i no gutpela tumas na em i laikim olsem helt dipatmen na ministra bilong helt wantaim gavana bilong Morobe provins i mas lukluk long en bikos populesen bilong Morobe i wok i go daun.

Nau yet dispela disasta bodi i laikim ol donesen na sapos wanem ol gavman o kampani i laik salim helpim ringim em long 4746275 long Wau na tok-save long ol donesen bilong ol.

Ol lain nau i stap long dispela disasta komiti em: Yawing kawalibu Siaman, Kokoi Rave vais siaman Asi Medo. Maus meri bilong mama long Wau, Hellen Bill, maus meri bilong ol mama long Bulolo, Jatzng Bulolo/Watut na Sakarias Tape Buino.

Dispela ol lain nau i olsem komiti bilong dispela disasta na emejensi sevis insait long distrik.

370 Jemen turis i amamas long lukim PNG

Samting olsem 370 Jemen turis i amamas long kam lukim Papua Niugini. Ol i kam sua long Mosbi long *MV Europa* wanpela Hapag-Lloyd turis sip na i go raun lukim nesanel botanikel gaden, nesanel palamen, nesanel musium na go baim ol samting tumbuna bilong PNG. Ol i amamas tu long lukim sampela singsing tumbuna.

Maus man bilong Melanesian Turis Sevis, Neil Nicholas i tok sampela bilong ol dispela turis i go long Goroka bilong lukim ol madmen o ol lain i save bilas long tais na luk olsem masalai.

Em i tok dispela em i namba wan turis sip long kam long PNG. Olsem na em i askim ol lain i lukim ol balus bisnis we ol turis i save raun long em long kam long PNG, ol plisman, ol bikpela skul, ol hotel, bisnis haus, turis kampani, papa bilong ol pmv, ol lain long restoren, stoa, na ol pablik ples long wok bung wantaim na soim gutpela pasin bilong mekim ol turis bilong arapela kantri i kam long PNG.

Mista Nicholas i tenkim tu ol plisman long givim bikpela helpim long lukautim ol turis long taim ol i kam lukluk raun long PNG. Tasol em i tok ol turis i no inap go long planti ol arapela gutpela hap bikos ol lain i lukautim ol i pret long bringim ol i go long wanem pasin raskol i bikpela long PNG tu.

Narapela bikpela hevi ol turis i bungim em long hevi bilong wara na pawabek aut. Dispela em i no gutpela sain long ol turis bilong arapela kantri taim ol i kam long kain ples olsem Mosbi skul. Long dispela as, Mista Nicholas i askim ol bosman bilong Nesanel Kapitol Distrik, na ol arapela provins long tingting long ol turis long taim ol i ronim o lukautim provins bilong ol. Em i tok olsem bikos bisnis turis em i wanpela gutpela ron bilong mekim mani long PNG.

Ol dispela turis bilong Jemeni i lusim PNG na i go long Fefeks basis long Brisben long Fraide nait. Narapela turis sip, *MV Silver Wind* bai kam sua long Mosbi na go long Samarai na Madang sampela taim long dispela mun.

Madang Timba kampani rausim 50 wokman

WENCESLAUS MAGUN i raitim

Jenerel Menesa bilong Madang Timba, Peter Hi i tokim Wantok olsem ol rausim samting olsem 50 wokman bilong kampani long Mande, Januari 19, 1998 bikos ol i no inap baim ol wokman.

Mista Hi i tok prais bilong timba long ovasis maket i pundaun i go daun olgeta na dispela i bagarapim tru ron bilong bisnis bilong Madang Timba long Papua Niugini.

Pastaim Madang Timba i save salim timba long China, India, Korea, Japan, Philipin na long ol arapela Asia kantri. Tasol taim prais bilong timba i pundaun long mak bilong 10,000 kubik mita i go daun long ziro kampani i painim hat tru long baim ol wokman na ol arapela samting bilong wok.

Madang Timba nau long dispela taim i save salim timba long China, na India tasol.

Long dispela as Mista Hi i tok, Madang Timba i go het na rausim ol dispela wokman inap prais bilong timba long wol maket i surik i go antap. Mista Hi i tok i tru em i sori long mekim dispela disisen tasol sapos em i pasim ol wokman i stap moa hevi bai kamap taim em i no inap baim ol. Mista Hi i tok tu olsem kampani i no pinisim ol olgeta long wok. Nogat. Kampani i larim ol i go malolo inap prais bilong diwai i gutpela na sapos kampani inap mekim gut mani, em bai kisim ol i kam bek na wok.

Ol dispela wokman Madang Timba i pinisim ol long wok i save mekim ol wok long hap taim tasol. Long tok Inglis ol i kolim ol 'casual labourers'. Bipo Madang Timba i kisim samting olsem 300 wokman.

Tasol nau ol i gat 260 wokman tasol.

Em i tok sapos prais bilong ol diwai i no senis na i go daun yet, ating bai em i rausim moa wokman. Tasol sapos prais bilong timba i go antap Madang Timba bai kisim moa wokman.

Mista Hi i no amamas tu long tok promis bilong Praim Minista Bill Skate taim em i tok olsem bai em i hapim prais bilong timba long Novemba.

"Gavman i putim bikpela takis long timba. Mipela i no inap stap laip. Bill Skate promis long daunim expot takis long Novemba. Nau em Januari na nogat wanpela samting i kamap," Mista Hi i tok.

Em i tok em i toktok pinis wantaim provinsel plis komanda long dispela hevi na ol plisman i givim em sapos olsem ol bai sambai i stap bilong

stapim wanem kain hevi i laik kamap.

Provinsel Plis Komanda bilong Madang Theodore Muriki i tok em i toktok pinis wantaim ol wokman bilong Madang Timba na i givim ol strongpela tok lukaut olsem ol i noken mekim trabel. Mista Muriki i go het na askim ol long makim foapela mausman bilong ol husat i ken givim petisen o pepa i autim wari bilong ol i go long menesmen bilong Madang Timba long Januari 20.

Madang Timba i go het yet long mekim wok bilong katim diwai tasol ol i no mekim bikpela wok bikos long hevi bilong prais bilong diwai na tu bikpela ren long hap bilong Madang.

Mista Hi i tok tu olsem wok bilong nupela somil bilong ol bai stat tru long Mas o April long dispela yia. Nau yet ol i traim ol masin tasol i stap.


Madang i gat nupela Plis bos: Ben Simajon

Plis Komisina Peter Aigilo i makim pinis nupela provinsel plis komanda (PPC) bilong Madang. Ben Simajon bilong Biwat long Is Sepik provins husat i wok long Mosbi nau i kisim ples bilong olpela PPC Theodore Muriki bilong Manam ailan long Madang, long Trinde Januari 21. Mista Muriki bai go mekim wok olsem PPC long Simbu.

Mista Muriki i mekim wok long Madang olsem PPC inap long eitpela mun olgeta. Long dispela taim, em i tok em i amamas long gutpela wok bung namel long ol plisman bilong em long Madang, ol plis opisa na ol advaisa bilong em i kam long Ostrelia. Em i go het na tenkim ol plisman bilong em long gutpela wok bilong ol na askim ol long mekim wankain pasin wantaim nupela PPC Siamajon.

Wanpela wokman long opis bilong Plis Komisina, Mike Turner i tokim Wantok olsem astingting bilong senisim PPC bilong Madang em i long helpim ol plisman long mekim gutpela wok olsem bai ol plisman i noken slek long-wok.

Em i tok tu olsem Mista Aigilo i mekim ol dispela senis long ol arapela hap bilong kantri tu bikos long mun Novemba 1997, plis dipatmen i promotim sampela plisman i go antap long ol posisen i antap liklik long wok ol i holim bipo. Olsem na kain senis i mas kamap long givim we long ol dispela plisman bilong kisim promosen.



Kainkain stail kaving bilong ol Sandaun... • ol man Sandaun i katim kaving bilong ol long salim long Indonesia. Foto: felix Ramram.

Madang Kot sasim tripela mangi long stilim samting we kos i no winim K3

BEN TAUMAI i raitim

"Yu mas sekim yu pastaim sapos yu gat inap mani orait yu ken go raun insait long stua. Na sapos nogat, orait maski long go raun insait nating long stua," dispela em toktok bilong Distrik Kot Mejistret long Madang, taim em i givim mekimsave long tripela mangi long stilim samting long stua em kos bilong ol i no winim K3.

Tupela bilong dispela tripela mangat i gat 15 Krismas. Na i bilong Is Sepik. Narapela i bilong Asaro long Isten Hailans provins, na i gat 17 krismas. Olgeta tripela i save stap long Madang.

Mejistret Japeth, husat i harim kot bilong dispela tripela boi long Fraide Janueri 9 i painimaut olsem ol i bin stilim samting long stua we kos bilong ol i no winim K3.


Wanpela boi i stilim wanpela silibes, we i kkos K2.90. Narapela i stilim wanpela tin mit, we i kos K1.34 long Modilon supamakot, na namba tri boi i stilim 4-pela liklik bateri long Anderson Foodland stua, we i kos K1.55.

Kot i bin tokim tripela ya olsem mekimsave bilong stil em bikpela ru, we wanwan inap long kalabbus long wanpela yia olgeta. Sapos, nogat, wanwan inap long baim kot namel long K400 na K500.

Tasol bikos em i namba wan taim bilong olgeta dispela tripela mangi long mekim kain stil pasin, kot i odarim wanwan long baim K40 bipo long 4 klok apinun long sem de yet, em long Fraide Janueri 9.

Kot i tokim ol tu olsem dispela mekimsave em long lainim ol, bai neks taim ol i noken mekim wankain stil pasin.

"Na tingim, sapos yu gat mani, yu ken go raun insait long stua na sapos nogat, maski long go raun insait. Bikos sapos yu lukim wanpela samting na tingting bilong yu i paul bikos yu mangalim na stilim, yu bai kamap long kot na bai kot i no inap isi long yu ken," Mejistret Japeth i tokim tripela ya olsem.



• Foklip draiva bilong Alexishafen Somil Kimas i karim ol plang i go long wanpela ka bilong Rookes Marine.

SBDC helpim yu wantaim liklik wok bisnis

• I KAM LONG LAS WIK SISTEM BILONG INFOMESEN NA KONTROL

Sistem o stail o pasin bilong bihainim long lukautim rekot em i bikpela samting long olgeta nupela bisnis, sapos ol i laik gro na kamap bikpela. Bikos em i givim ol papa o menesa bilong bisnis wantaim ol strepela rekot o namba wok bilong mani, we ol i ken yusim long plenim na kontrolim o lukautim ron na gro bilong bisnis. Ol samting insait long sistem em wok bilong lukautim pepa wok bilong bisnis, na mani rekot bilong bisnis, kisim tingting long we bilong spenim na sevim mani na ogenaisim gut opis wok long kamapim ripot bilong ol menesa i mas lukim na bihainim. Wanpela gutpela rot bilong lukluk long sistem em long tok olsem sapos yu gat nambawan sistem bilong olgeta samting insait long bisnis bilong yu, em bai mekim isi long menesim ol ronim bisnis wok bilong yu.

BIKPELA SAMTING LONG BISNIS EM OL TRUPELA RIPOT O INFOMENSEN NA NAMBA

Sapos yu laik ronim bisnis bilong yu gut, yu



mas save long ol dispela samting: wanem o hamas mani yu kisim pinis long salim ol sevis o prodak, hamas mani yu baim long wok bilong ronim bisnis o pe bilong ol wokman, long wanem as na yu baim o yusim ol dispela mani, wanem kain propeti em bisnis i papa long en, na wanem kain dinau o hamas dinau bisnis i gat. Ol gutpela bisnis save strong long sistem, i no long lukautim o kontrolim ron bilong bisnis gut, tasol i ken helpim yu tu long mekim gut plen we yu ken mekim profit mani na kes mani gut long bihainim taim. Narapela gutpela samting em long mas i gat gutpela sistem long bisnis o opis em bikos olsem papa o menesa bilong bisnis, yu mas kisim ol trupela infomesen o namba long rekot yu lukautim long bisnis opis, long liklik gutpela ripot em yu yet i redim, o kuskus bilong yu o ol arapela wokman meri i helpim yu.

OL RIPOT NA REKOT EM BIKPELA SAMTING LONG BISNIS

Ol ripot bai givim yu ol nambawan infomesen na rekot bilong bisnis i ron olsem wanem. Olsem papa bilong bisnis, yu laik save long bihainim taim bilong bisnis bai go olsem wanem, we yu laik mekim plen na lukim sampela gutpela senis long bisnis i groa na kamap bikpela. Ol ripot we i gat infomesen o rekot bilong bisnis bai mekim isi long yu long kontrolim na plenim bisnis bilong yu.

Hia em ol ruls bilong kontrolim o lukautim mani yu spenim na kisim aninit long ol sistem em yu bihainim long ronim bisnis:

I gat sampela bikpela rul em yu mas bihainim, sapos yu laik lukautim bisnis i ron gut, na tu i ken helpim yu long plenim gro bilong bisnis long bihainim taim:

a) Tilim ol rekot bilong yu, we yu no ken bungim olgeta wantaim we i ken paulim yu.

b) Ol famili memba husat i helpim yu, yu mas baim ol olsem ol arapela wokman meri.

c) Ol profit mani em bisnis i mekim, yu mas investim dispela mani long wok bilong mekim bisnis i ron gut o groa na kamap bikpela.

d) Noken salim sevis o prodak long dinau pasin. Mas oltaim kisim mani long h a n pastaim bipo yu salim ol sevis o prodak.

e) Yu mas benkim mani long olgeta de. Noken larim mani i stap long opis.

f) Yusim sek tasol long baim ol samting em yu yusim mani long en long ol bisnis wok.

g) Ol propeti bilong bisnis em yu olsem papa o menesa bilong bisnis i yusim long wok bilong yu yet, yu mas baim long foitnait o poket mani bilong yu yet, na noken larim bisnis i baim.

h) Yu mas sekim olgeta akaun bilong bisnis long benk.

OL NAMBA WAN REKOT EM BISNIS MAS I GAT

Ol nambawan rekot em bisnis mas i gat i bihainim tasol wanem kain bisnis yu ronim, na wanem kain infomesen yu olsem papa bilong bisnis i nidim we i ken helpim yu long plenim na lukautim o kontrolim ron bilong bisnis. Hia em sampela nambawan rekot em bisnis mas i gat:

a) Yu mas gat ripot mani ripot bilong olgeta de, o bilong olgeta wik.

b) Yu mas gat kes risip buk bilong mani yu kisim taim ol kastoma i baim sevis o prodak em yu salim.

c) Yu mas gat kes paimen buk we bai lukautim rekot bilong mani yu spenim long bisnis wok.

d) Yu mas gat bbuk i soim rekot bilong pe bilong ol wokman meri bilong yu.

e) Yu mas gat buk bilong ol kastoma husat i gat dinau long yu. Long tok inglis em ol i kolim 'Debtors' Buk.

f) Yu mas gat tu 'Creditors' Buk.

Neks WIK:

Em bai mipela toktok long ol edvais we yu mas save taim yu ronim bisnis long namba wan yia bilong yu. Na dispela bai las skul toktok long dispela buk em Smol Bisnis Developmen Kopresen (SBDC) i bin putim aut, na Wantok save prinim wanwan hap long olgeta wik i kam inap nau.

93FM YUMI Redio Stesen bilong yumi yet Harim olgeta gutpela program long 93FM YUMI

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnisan ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM YUMI

Salim rekwest i kam long: **YUMI** request
Locked Bag 93
Port Moresby, NCD.
Fax: 320 1995

PNG FM



NAUFM

YUMI

PNG FM PTY. LTD.
Trading as
NAU FM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

LAIPSTAIL

KANAGE



■ Kanage i wok olsem teksu draiva long Lae. Em i no save gut long tok inglis. Orait wanpela taim em pikim wanpela waitman turis long ples balus long Nazab, na draivim em i go long Lae Siti.

Long hap rot waitman i wok long stori olsem em save harim ripot bilong traibel pait, we ol manmeri save kilim ol yet. Em stori yet i go na Kanage laik traim inglis bilong em wantaim turis ya. Na laik askim olsem: "So you came here to stay? Tasol em i popaia liklik na givim olsem: "So you came here to die?" Waitman i harim kain narakain askim na bekim kwik: "No! No!" I came to visit only na go back." Kanage no kisim gut mining bilong toktok na askim gen, tasol wantaim strongpela nek liklik: "You came here to die, a?" Waitman turis i pret nau na giaman long pispis na tokim Kanage long stapim ka. Taim em kam ausait, em i no wari long ol kago. Em pinisim olgeta gia na ron i go bek long Nazdab, kalap long balus i go long Mosbi, na go bek long ovasis.

Sampela mun bihain taim sampela teksu draiva tokim Kanage olsem waitman ya ranawe i go bek long kantri bilong em, Kanage i tokim ol: "That is why we said Papua New Guinea is an unexpected country, and so do I, I am an unexpected man." Ol arapela teksu draiva harim olsem na lap indai stret long Kanage.

Benson N. Zake (Namba 2 wina)

FINSAFEN

■ Kanage em bilong ples Buakap long Salamaua eria bilong Morobe provins. Em i man bilong smok paip stret. Na paip i save stap long maus tasol inap taim em i slip bai em rausim.

Wanpela de em wantaim misis i go long gaden. Tupela wok i go na Kanage lusim misis i stap na go go antap long wanpela kokonas diwai. Smok paip i stap yet long maus bilong em. Em rausim olgeta kulau kokonas i go daun pinis. Na go daun na stat rausim skin bilong ol. Em rausim skin long olgeta kokonas pinis na tingting bilong smok i kirap. Em painim smok paip nau. Em sekim hap em wok long en, smok paip i no stap. Em sekim arere long bus, smok paip i no stap. Mekim nogat na em go antap gen long diwai kokonas na sekim antap. Tasol smok paip i no stap. Na em go daun gen na painim long as bilong diwai kokonas i stap. Sem taim misis i kam na em laik askim sapos misis i lukim smok paip o nogat. Taim em i laik opim maus na toktok, smok paip i pundaun i go daun long graun. Em kirap nogat na misis kisim smok paip na givim em gen.

Trangu smok paip save stap long maus oltaim na em lus tingting olgeta. Mekim na em bel kaskas stret long em yet.

Kesaio Alung

GOROKA

■ Kanage em wanpela man bilong ples. Em i no go skul. Em save long tok pisin tasol. Na feveret enimel em save lukautim em pusi. Wanpela taim em laki na waitman bos kisim em i go long Ostrelia. Orait wanpela wiken ol go limlimbur long zoo o ples bilong lukautim ol enimel. Man em kalap nogat long lukim wanpela tiger. Em go sanap klostu long tiger ya na toktok i stap: "E-e-e, pusi pusi, pusi pusi". Em lukim tiger na ting olsem em bikpela pusi.

Sem taim wanpela bikpela han i tasim em long beksait. Em tanim na laikim wanpela bikpela blakpela gorila i sanap long beksait. Narapela kain tingting i kisim em na em tok: "gorila ya: "Hei Kawas, wanem taim yu kam." Bikos gorila i blak na luk olsem man, Kanage ting em wanpela man Kawas ya bilong Bogenvil i go visit tu long Ostrelia.

Jerry Dunar

MOSBI

Moa tokpilai long pes 18

Abus bilong PNG winim lemflaps

PETER MAIME i raitim

SAPOS mi holim tupela plet kaikai long han bilong mi, wanpela i gat mit bilong magani na narapela i gat lemflaps, na mi askim yu, yu laikim wanem plet kaikai?

Mi save bai yu tok, plet i gat lemflaps, win bilong yu. Yu no wanpela tasol, planti manmeri i save laikim lemflaps. Na mi tu. Lemflaps i mas gutpela bikos em i kam long kantri bilong ol waitman. Taim yumi go long stua o supamak, yumi save panim kainkain mit long bokis ais. Ol i save salim mit bilong kakaruk, mit bilong sipsip, kau mit na ol pis bilong solwara. Planti bilong ol dispela mit i kam long ol ovasis kantri.

Nau yu lusim ol stua na supamak na go long ol maket bilong ol liklik lain long ples. Antap long ol narapela kaikai bilong gaden, ol tu save salim abus bilong Papua Niugini stret. Ol i save salim ol mit olsem bilong magani, mit bilong pik, mit bilong muruk, mit bilong kapul na ol kainkain abus bilong solwara. Ol papa bilong supamak na ol pipel bilong ples em ol wok bisnis. Ol laik salim abus bilong ol na wokim sampela mani. Long stoa na supamak, ol save lainim na bilasim gut ples ol i save salim mit long en. Long maket, ol manmeri tu i save redim mit bilong ol gut tru na karim i kam salim. Sampela mit ol i save rostim na ol narapela ol i save smokim na kisim i kam maketim.

I gat kainkain stail bilong redim mit na yumi i no ken tok, wanpela stail i gutpela moa long ol narapela. I no wanpela man o meri i kontrolim yu. Yu olsem kastoms i gat pawa bilong mekim sois, yu ken baim ol mit long supamak o yu ken baim long ol maket long taun na ples.

Kain maket olsem Godens Pot Mosbi, i no save sot long ol abus. I gat tupela haus i stap. Wanpela em bilong salim pis na narapela em bilong salim ol mit bilong magani, mit bilong muruk na pik mit. Mande i go inap Sande, tupela haus ya i save oltaim pulap long ol kainkain abus.

Long las wik, mi bin go long Godens maket na baim wanpela magani. Mi wok long Pot Mosbi klostu foapela yia nau tasol, dispela em nambawan taim mi bin baim dispela abus. Bihain long mi bin baim magani, mi go kisim sampela kumu na baim sampela kokonas long grisim wantaim magani. Long dispela taim mi bin askim wanpela kasin brata na em bin baim wanpela draipela kopa dis long mekim bikpela mumu.

Taim mipela i kam long haus, mipela i katim dispela magani i go long ol liklik sais. Mipela i boilim wara na klinim ol doti long skin bilong abus ya pastaim. Bihain mipela kukim long kopa dis wantaim kumu na gris bilong kokonas.

Dispela magani i tan gut tru wantaim gris bilong kokonas. Mi yet wantaim kasin brata bilong



• Sampela famili long Isten Hailans provins i kukim bikpela mumu stret long kris-mas taim. Ol i redi long kaikai nau. Foto: Sape Metta.

mi na wanpela liklik boi, mipela i traim long pinisim dispela mumu, tasol kaikai i kik bek long mipela. Mipela i putim ekstra kaikai long fris bilong neks de. Olsem mi bin tok pastaim, mi i wankain olsem yu. Mi save kaikai lemflaps tasol taim mi tes-tim mit bilong magani, mi ting mit bilong magani i winim lemflaps. Tes bilong magani mit i gutpela na tu em i save smel nais. I no dispela tasol. Taim yu baim lemflaps, bai yu i no inap long painim tel, lek, han o het bilong lemflaps. Tasol magani i gat ol dispela samting, yu inap long mekim bikpela mumu long en. Sapos yu wanpela man o meri i gat planti memba long famili, yu ken inapim famili bilong yu wantaim wanpela magani. Mi save ol liklik pikinini bai ol yet i resis, husait bai kisim tel, husait bai kisim het, husait bai kisim lek na husait bai kaikaim han. Sapos ol i kisim wanem kain hap mit ol i laikim long en, bai ol i amamas. Mi ting, i no gat wanpela samting long lemflaps ol pikinini i ken resis long en.

Ol dokta i save tokim yumi long i no ken kaikaim ol kaikai i gat planti gris. Ol dokta i tok, ol gris bai pas long lewa bilong yumi na sampela taim sapos gris i pulap, blut i no inap ron gut long sistem bilong bodi. Lemflaps em wanpela bilong ol dispela kaikai i gat planti gris.

Sapos yu gat sans, sekim long ol setelmen long Pot Mosbi, putim ai long arere bilong Okuk Haiwe na lukluk long ol haus kaikai long kantri bilong yumi. Ol mama i save praim na salim ol lemflaps long setelmen, long ol haiwe na long ol stua i gat haus kaikai. Reit bilong kaikaim lemflaps i go antap tru. Sip i wok long brukim solwara na karim lemflaps i kam yet, yumi wok long kaikai yet, na ol bakstua husait i salim lemflaps i mekim planti mani.

Mi bin harim sampela tok olsem long ples bilong waitman, lemflaps em kaikai bilong ol dok. Dispela tok i mas tru bikos mi

save lukim, planti bilong ol waitman i no save baim lemflaps long stua o supamak. Kas bilong yumi, samting ol waitman i save givim long dok, em kamap feveret abus bilong PNG.

Long nambis ol lain i stap arere long solwara, planti taim ol save gat pis long haus long go wantaim ol narapela kaikai. Mi save long dispela samting, taim bin go holid long Poukama vilis, klostu long Yule Ailan long Sentrel provins. Dispela em long yia 1989, taim mi bin skul long Bomana Holi Spirit Seminari na go stap wan wik olgeta long dispela ples. Long wanpela famili mi bin i stap long en, olgeta apinun mipela i save kaikaim pis.

Ol dokta tu i tok, pis bilong wara nating na bilong solwara, em wanpela gutpela kaikai tru bilong bodi bilong yumi. Pis bai helpim ol bikmanmeri long stap strong na helti na ol liklik pikinini long gro gut tru. Tu ol dokta i tok olsem gris bilong pis i gutpela long lewa bilong yumi. Gris bilong pis i save go na daunim ol strongpela pat o gris i laik aps long lewa bilong yumi. Dispela i helpim blut bilong yumi long wok gut tru long bodi.

Ol lain long hailans, bikpela abus bilong ol em mit bilong pik. Tasol wan wan taim, ol save kaikai dispela abus. Ol pik em bikpela samting long laip bilong ol hailans na ol i no save kilim nating-nating. Ol save kilim pik, taim wanpela bilong ol i dai na ol i laik pinsim wari, o bilong baim meri o long taim bilong bikpela danis na moka. Long dispela taim bai ol pipel i gat planti mit bilong pik long kaikain na serim wantaim ol pren.

Mi yet mi bilong hailans na taim mi skelim mit bilong pik na bilong lemflaps, mit bilong pik i winim bilong lemflaps. Mit bilong pik i save smel nais na teis gut.

Sapos yu wanpela bilong hailans na pawa lain bilong Yonki i go long ples bilong yu, yu ken mekim dispela samting. Em sapos yu smat. Savim sampela mani na baim wanpela liklik dip

fris. Sapos yu gat planti pik, skelim. Mi save yu bai larim ol draipela pik long ol bikpela de. Kilim wanpela namel sais pik na noken pinisim mit bilong em long wanpela taim. Katim mit bilong em na putim long dip fris bilong yu na kaikai wan wan, taim yu yusim gut dispela ol mit bilong pik, em i ken lukautim yu na famili bilong long planti mun. Bihain em i pinis, yu ken kilim narapela pik bilong yu sapos yu laik.

Ol lain long nambis tu i ken mekim wankain pasin. Sapos pawa i go long eria bilong yu, askim ol wokman bilong Elcom na ol ken joinim pawa i go long haus bilong yu. Savim tu sampela mani na baim wanpela liklik dip fris. Dispela i ken helpim yu long putim ol abus olsem bilong magani, mit bilong wel pik, mit bilong muruk na ol pis yu kisim long solwara. Sapos yu mekim olsem, em bai sevim yu longpela taim.

Yumi save tok yumi bilong PNG, tasol sampela taim mi save kwestenim mi yet. Dispela tok mi mekim i tru o nogat. Nogut yumi insait wait na aut-sait long skin blak. Planti taim yumi save rabisim kaikai na baus bilong yumi yet long PNG. Sapos yu wanpela ol lain i bikpela long ples na nau yu kam wok long taun o siti, yu bai wari taim yu lukim ol dispela kain pasin i kamap long ai bilong yu.

Nau taim mi laikim abus, mi save wokabout i go long Godens maket. Mi lukim ol lain i salim abus long maket na mi save sore long ol. Na mi save tokim mi yet, "em ol lain bilong mi yet na ol i salim kaikai tru bilong mi, bai mi baim."

Mi save, ol abus ol pipel i salim long maket, em samting ol yet i save kaikai long en. Em i no samting ol i save givim dok long en, na ol yet i kaikaim ol narapela gutpela kaikai.

MANI INSAIT LONG TIN

OX & PALM

**PLANTI
MANI LONG
WINIM**



Taim yu opim feveret OX & PALM 340g tin, lukluk aninit long ai bilong tin na painim sapos yu win.

Yu ken winim ol prais olsem K50, K100, K250, K500 o K1000 kes mani.

LONG KISIM PRAIS BILONG YU:

Salim dispela ai bilong tin wantaim nem na adres bilong yu i go long:

Hugo Canning,
P.O. Box 635,
BOROKO, N.C.D.

CONGRATULATIONS YOU HAVE WON
K50 CASH

CONGRATULATIONS YOU HAVE WON
K250 CASH

CONGRATULATIONS YOU HAVE WON
K100 CASH

CONGRATULATIONS YOU HAVE WON
K500 CASH

CONGRATULATIONS YOU HAVE WON
K1000 CASH



NEM: Peter Tosu
KRISMAS: 25 (man)
ADRES: Numondo Compound, PO Box 438, Kimbe, WNB.
LAIKIM: Ritim baibel, tok pilai, pilai gita, waswas long nambis, go lotu na raitim pas.

NEM: Angeltola Gene
KRISMAS: 22 (meri)
ADRES: c/ Frank Agyei, PO Box 6, Agona, Swedru, Ghana, W/A
LAIKIM: Ritim buk, waswas long solwara, senisim ol presen na prenim man.

NEM: Robert Sep
KRISMAS: 18 (man)
ADRES: PO Box 1232, Mt Hagen, Western Highlands province.
LAIKIM: Pilai ragbi, volibal, basketbal, raitim pas, na painim wanpela pren meri bilong stori na serim tingting wantaim.

NEM: Iva Hare
KRISMAS: 24 (man)
ADRES: PO Box 365, Boroko, NCD.
LAIKIM: Go lotu, harim gospel musik, na painim wanpela gutpela meri bilong maritim bihain taim.

NEM: Robert Ahela
KRISMAS: 20 (man)
ADRES: PO Box 6117, Pt Moresby, NCD.
LAIKIM: Go lotu, pilai spot, mekim pren na senisim ol presen.

NEM: Julita Yum
KRISMAS: 24 (meri)
ADRES: Male Community School, PO Box 513, Madang.
LAIKIM: Pilai volibal, ritim baibel, singim ol lotu song, harim PNG Top 20 na raitim pas long ol pren long narapela provins.

NEM: Joanes Ape
KRISMAS: 26 (man)
ADRES: PO Box 148, Bialla, WNB.
LAIKIM: Go lotu, ritim baibel, wok gaden, go waswas long nambis, harim ol gospel musik na painim wanpela SDA meri bilong maritim.

NEM: Berry Waiya
KRISMAS: 20 (man)
ADRES: Epona Utabu Coffee, PO Box 169, Kainantu, EHP.
LAIKIM: Ronim motobalk na hos, harim ol kantri musik na prenim ol meri long Sentrel, Manus na Tolai.

NEM: Bonny Kola
KRISMAS: 17 (man)
ADRES: Aitape Vocational Training Institute, PO Box 34, Aitape Sandaun province.
LAIKIM: Pilai soka, lukim TV, lukim ragbi na raitim pas long ol pren.

NEM: Oksi Namana
KRISMAS: 20 (man)
ADRES: Calvary Lutheran Church, PO Box 290, Lae, Morobe province.
LAIKIM: Ritim baibel, go lotu, pilai gita, harim gospel musik, tok pilai, pilai spot, raitim pas na painim wanpela meri bilong prenim na maritim bihain.

NEM: Virgo Waikisa
KRISMAS: 20 (man)
ADRES: New Camp 1, PO Box Bulolo, Morobe province.
LAIKIM: harim musik, pilai basketbal, painim wanpela meri bilong prenim na maritim bihain. Plis salim poto bilong yu wantaim pas bilong yu.

Sepik kaving mekim mak long ovasis-Indonesia


FELIX RAMRAM i raitim

TAIM i save gat trabel o bikpela pait i bruk maski insait long Wewak, Maprik, Aitape, Vanimo. Olsem tu long ol narapela provins insait long kantri, wanpela i no inap harim o kolim nem bilong husait man o ;meri i as bilong dispela trabel. Yu bai harim ol ripot i tok... ol Sepik o ol Hailens na i go moa olsem. Tasol i no olgeta Sepik, Hailens, Gailala, Tolai na Buka o Sandaun em ol i trabel man. tu em olsem, taim trabel o pait i kamap i no olgeta sitisen bilong dispela ol hap. I kamap long dispela taim tasol na kamapimt rabel ya - nogat. Olsem na PNG olgeta i mas stretim tok pisin bilong em yet long pasin bilong sutim tok long olgeta. Na kolim stret nem bilong man o meri i as bilong wanpela trabel.

I tru olsem i no "olgeta Sepik" em ol trabel manmeri. Namba bilong ol gutpela manmeri i winim namba bilong liklik lain. husait em ol trabel lain o ol pait lain. Stori bilong yumi i toktok long sampela long ol kain gutpela lain husait i gat gutpela tingting. Long kamapim kain wok bilong pulim mani na sem taim long ai bilong man. Wanem samting ol i mekim i kamapim na tu i bringim gutnem bilong ol yet, asples bilong ol. Na bikpela samting, gutnem bilong Papua Niugini olgeta.

Planti stori, ol toktok na tu long ol ripot i stori long Sepik kaving i gat nem long wok turis na kisim ples bilong gen tu long olmusim. Insait long ol gavman opis, misin opis wantaim tu long haus bilong wanwan famili na ol hotel. Sepik kaving tu i kisim ples olsem "han mak" (crest) bilong Gavman bilong Papua Niugini. na bihain long em i kisim ples pinis long ol narapela Yuropien kantri olsem Briten, France, America, Australia. na kamapim piksa bilong gen tu insait long planti kantri insait long ol buk. Sepik kaving nau bai i pulim pilings bilong ol wansol bilong mipela long Wes Irian na Indonesia olgeta. Bihainim laik em Indonesia Konsulet i stap long Vanimo i soim pinis. Na i putim pinis "oda" long wanpela kaving bilong Sepik long makim han mak (Crest) bilong Gavman bilong Indonesia. Konsulet i laik putim long ai bilong opis iblong ol long Vanimo.

Ol pipel na tu ol lain i save sapim ol kaving bilong liklik ples i stap long wara Sepik, Tambunum ol i lain i gat namba. Bilong wanem ol i gat namba wanpela bai askim. Sapos yu no save em sans yu mas save nau long namba bilong ol, em ol i papa bilong Papua Niugini Nesenel Krest. Em dispela piksa bilong pisin kumul i sindaun antap long supia PNG Gavman i yusim long olgeta opisel dokumen bilong em. Nau Tambunum i nambawan lain ken long brukim rekot long promotim Sepik kaving wantaim dispela oda Vanimo Indonesia



• **Wanpela kaving i makim piksa bilong ol Indonesia. Ol atis man bilong Sepik i sapim.** Foto: Felix Ramram.

Konsulet i putim pinis long han bilong 4-pela man bilong sapim kaving bilong ples Tambunum. Husait long ol i bin kamap na promotim kaving bilong ol insait long Vanimo stat long Disemba las yia.

Taim mi bungim 4-pela kava bilong Tambunum long Sande namba 4 de bilong Januari. 4-epla ya i soim hammas na gat dispela plings olsem ol i winim pinis wanpela bikpela samting makim pipel bilong Tambunum. Na dispela hammas i winim kain pilings sapos yu stap long ples tru bilong yu. 4-pela tambunum kava ya em Alphonse Saun, Valentine salbi, Gibson Jambe na Tommy Gumbat.

Mausman bilong 4-pela Valentine i tokaut olsem olgeta i nogat bilip olsem stap bilong ol. Insait long Vanimo long 4-pela wik tasol i ken kamapim gutpela piksa long wok ol i save mekim olsem ol lain bilong sapim kaving bikpela tru wantaim dispela od abilong Vanimo Indonesia Konsulet.

"Mipela i lain bilong stap long ples. Ol stori mipela i kisim long Vanimo i kam long ol wantok, i soim mipela olsem i gat sans mipela i inap salim prodak bilong mipela hia. Mipela 4-peoa i kamapim tingting long kam long Vanimo, na hai mipela i stap. Na insait long dispela 4-pela wik mipela i wokim na salim pinis 30 kankain kaving bilong pes, pisin kumul tarangu na pukpuk o miks. Na moa long 20 mipela i sapim pinis i redi long salim i stap. Taim mipela i wok long sapim ol nupela bihainim ol oda mipela i kisim i kam long wanwan manmeri.

Na tu wanpela o tuepal liklik banis lain husait long ol i putim

oda wantaim mipela pinis. Wanpela bisnis meri i putim oda long 17 miks kaving.

"Skelim bilong mipela long we mipela i salim kaving bilong mipela na ol oda wanwan manmeri wantaim ol liklik bisnis lain i putim wantaim mipela i soim olsem Sepik kaving i inap mekim Vanimo i kamap olsem wanpela hap tu we Sepik kaving i ken pulim mani. Na bikpela samting em long pulim ol turis i kam insait long Vanimo na Sandaun olgeta, sapos mipela i lukluk tu long dispela rot", Valentine i tok.

Long askim bilong oda bilong Vanimo Indonesia Konsulet, Mista Salbi i tok ol i kisim dispela oda wantaim hammas na long rot bilong stretpela bisnis pasin. Taim ol i kisim oda ya long sapim Nesenel Krest bilong Indonesia, 4-pela wantaim i putim han mak na save wanwan long ol i gat long katim, wokim na pinis pinis dispela Krest. Tasol ol i abrusim ol narapela "liklik makmak na tu i liklik" long sais Konsulet i laikim long en. Olsem na 4-pela bai holim yet dispela oda na wokim nupela wantaim olgeta mak na sais Konsulet i laikim long en. Kos bilong dispela oda i sanap long K800.00.

Mista Slabi i tok ol i lukim tu dispela oda olsem wanpela rot ol i kenpromotim prodaks bilong ol long narapela sait bilong boa. Wantaim ol tingting 4-pela i wok long kisim tu, ol bai i stretim pepa wok bilong ol wantaim ol otoriti long Vanimo sapos i inap. Ol i ken stap tu long wanem ol promosenel so PNG i putim kamap long Jayapura-bikpela tru long taim bilong EXPO 98. Aninit long dispela, ol yet tu i ken stretim ol samting wantaim Foren

Afeas na holim wanpela liklik promosenel so bilong ol yet. insait long PNG Konsulet Opis long Jayapura.

"Mipela 4pela i redi long bungim ol oda i kam long narapela sait bilong boda. Sapos dispela Indonesian Krest i winim lewa bilong ol neba bilong yumi long narapela sait", Valentine Slabi i tokaut.

Em i go het na salensim ol pipel bilong Sandaun olgeta olsem ol tu i mas putim aut sampela ol tumbuna pasin na ol samting bilong tumbuna. Em planti eria long Sandaun i no putim aut long ples klia yet long rot bilong wokim bisnis. Na sem taim long skulim ol yangpela bilong provins wanem ol pasin tumbuna i stap insait long provins.

"Slaens ya tu i sut long Sandaun, Provinsel Gavman. Wanem samting bai gavman i mekim long promotim pasin tumbuna? Bai gavman olgeta wanwan yia i wok long toktok na pilai politik? OL ripot, i soim olsem gavman i gat tingting bilong kamapim bisnis long sait bilong pulim ol turis i kam. Tasol taim ol turis i kam, bai ol i lukim wanem samting? Ol papa graun i pait wantaim Vanimo Fores Prodaks long kisim moa royelti o lukim das i karamapim liklik taun bilong Vanimo? Nogat-ol turis i kam long tomoi mani, bikpela tru long lukim pasin tumbuna bilong yumi, baim ol tumbuna samting olsem kaving, gras bilong ol pisin na planti moa. Ol tu i laik lukim ol naispela ples klinpela nambis na ol ailan wantaim ol bus. Na slip long ol hotel o ol ges haus em i nais long ai na pilings bilong ol.

"Ating em i taim nau long gavman bilong provins long kirap na mekim samting na noken toktok tasol. Salens em kirapim wanpela Provinsel Turis Bod na sem taim sanapim wanpela Provinsel Kaisarel Senta bilong ol Sandaun pipel stret. Insait long dispela senta bai i mas gat seksen bilong ol samting o atifeks bilong ol narapela provins tu i stap-sapos yumi toktok long yuniti o melanesian kalsa. Dispela em long promotim bisnis turis insait long Sandaun na tu olsem Papua Niugini olgeta", Mista Slabi i tok.

Toktok bilong Mista Slabi i tru long kes bilong Sandaun. Ol pipel i no save promotim pasin tumbuna bilong ol-wanwan taim tasol na liklik manmeri na pikinini tasol i save stap insait. Olsem sapos praim minista, wanpela minista o lida bilong opisen o memba bilong ol i soim pes. Tasol sapos i gat kain ples olsem Kaisarel Senta Mista Slabi i toktok long en. Na i go wantaim wanpela de gavman i makim long pipel i bung na soim pasin na tumbuna singsing bilong ol. Dispela bai i pulim ol turis long esia sait long kam insait long provins, bihainim Vanimo/Jayapura rot.

Yumi larim dispela salens i stap long gavman bilong tede long skelim.



PNG HIT PARADE

1997

No.	SONG	ARTIST	POS.	WKS.	MTH.
HOOR 1					
40	S/ SOMETHING	APPRENTICE	5	3	NOV
39	YAMBUNAWI	MANDAWALI	5	3	FEB
38	STAP SORE	URALOM KANIA	4	1	DEC
37	MATANGI SASAWA	SAUGAS	4	1	DEC
36	TAMOATA	QUAKES	4	1	AUG
35	LAMBADA REGGAE	DAVID ANDREW	4	1	MAY
34	COME HOME NOW	XB2	4	1	APR
33	NOQUI-TAU	KABANI	4	1	JUL
32	MANGI BAINING	BARIKE	4	1	JAN
31	MAI TAURI AU	KABANI	4	4	JUN
HOOR 2					
30	MANAM MOTU	QUAKES	3	1	DEC
29	UNITY	COVER VERSION	3	1	NOV
28	IA LYNETTE	LEONARD KANIA	3	1	JUN
27	FROOKS LONG MI	AZZIMBAH	3	3	NOV
26	AI DAUE	WALI HITS	3	3	JUL
25	PILISI	HITSY GOLOU	3	3	FEB
24	CRAZY	TARIKANA	3	4	JAN
23	KUTI MANGI	ROBERT OEKA	2	1	DEC
22	JUSTINA	LEO WALILING	2	1	NOV
21	FAREWELL	BASIL GREG	2	1	FEB

PNG FM PTY. LTD.
 Trading as
NAU FM
 and
YUMI FM
 P.O. Box 774,
 Port Moresby
 Papua New Guinea
 Ph: (675) 320 1996
 Fax: (675) 320 1995

Buai na Daka - nem bilong narapela bisnis

BUSTIN ANZU i raitim

PLANTI manmeri i gat kainkain rot bilong wokim bisnis na kisim mani. Stat long salim ol kaikai bilong ol yet long maket i go antap long ronim PMV na stua na masin bilong wokim rot na ol narapela kain bisnis. Buai na daka tu em nau planti i kamapim olsem isnis tu.

Nau bai yumi lukluk long ausait ol lain jilong hailens i save kisim buai na daka long nambis na save go salim long hap bilong ol yet na kamapim olsem wanpela isipela rot bilong kisim man na wokim bisnis. Na kamap narapela komoditi gen.

Sisen bilong buai na daka i no yet long Markham Veli asples bilong dispela samting stret. Ol manmeri long hailens i namba wan kastoma bilong baim ol dispela samting na salim. Long sampela manmeri em i olsem kaikai. Sapos ol i no kaikai, em bai ol i no inap stap na slip inap taim ol i kaikai. Planti bilong ol dispela lain hailens em ol Simbu, Hagen na Mendi. Tasol planti tru em bilong Hagen stret. Ol i save kam baim na bihain go salim long. Hagen wantaim beg na plastik olem ol i bin baim long Markham long prais bilong ol yet.

Ol narapela hailens lain olsem Tari, Wipu, Kutubu, Moro, Wabag na Porgera i save kam baim long Hagen na kisim i go long hap bilong ol yet.

Buai na daka bilong Markham i no redi yet tasol ol Hailens i save angre yet long kaikai olsem na ol i save i go long ol narapela hap olsem Finsafen, Madang, Sepik na Popondetta na Rabaul long painim buai. Baim ka i kam daun na bihain kisim sip na raun long ol dispela ples. Long kisim buai long Sepik em ol Hailens i save kisim ka i go long Madang na wet long sip bris i stap. Taim sip bilong Sepik i kam sua, ol Hailens bai i go holim wan wan bek buai ol i laik baim na kisim. Bilong Rabaul, Finsafen na Popondetta, ol Hailens i save i go wet long Voko poin sip bris na taim ol sip bilong dispela ol ples i kam sua, ol lain i save go holim pasim beg na tromoi i go antap long ol PMV draiva. Wan wan man na meri i save baim moa long 4-pela bek buai o sampela taim wanpela bai baim 7-10-pela long buai. Ol i save min bisnis.

Ol lain husat i save operet long sip em ol i save ron long sip. Ol bai i go buai long ol ples olsem Rabaul, Sepik, Finsafen na Popondetta. Ol i save kisim na salim long ol lain husat ron i kam olsem long ka long hailens na wet i stap long sip bris. Ol dispela lain long sip bris bai baim na kisim i go and long hailens na salim long ol narapela lain gen. Ol dispela lain gen bai kisim i go na salim long ol narapela lain gen.

Maski husat i baim wanem kain bek buai, ol i no lusim wanpela mani o mani bilong ol i no wes nating. Ol i mekim profit yet. Man husat i baim lus long maket i peim moa. Em baim pinis karamapim ol dispela leba na transpot kos wantaim ol narapela ekspenses bilong ol lain bilong baim na salim buai.

Wanpela ples long Lae we i save kamap olsem ples bilong salim baim buai treding pos em long wanpela klab bilong ol Hagen. Ol i save kolim olsem Hagen klab. Em dispela ples i save stap long Bundi rot. Ol lain bilong Hailens i save kam daun long PMV bas na draiva na save silip long dispela hap. Na tu ol lain husat i save go painim buai long sip i lukim olsem i no gat hailens manmeri long soim buai long sip bris, ol bai kisim i go long Bundi rot. Long dispela hap bai ol i painim ol lain bilong baim buai beg na kros pait long prais.

Ol lain bilong salim buai laik salim long prais bai karamapim leba na transpot kos. Olsem na ol bai tingim na salim long wanpela prais bilong ol yet.

Tasol ol lain husat i save ron long draiva na bas bai tingim long sakim dispela prais na kisim long daunbilo prais. Tok kros pait long prais i pinis nau bai ol i baim.

Mosbi yu ron long nambis i kam o long hailens bas bilong hailens, Bundi rot em ples bilong salim na baim buai na daka. Nait na san, dispela ples bai olgeta taim i pulap, pulap tru long ol manmeri. Papa bilong dispela klab i save kamapim gutpela sevis na halvim ol manmeri.

Long Markham nau yet ol i salim ol wan wan buai tasol planti taim em ol rop buai. Ol hailens tu i save baim ol dispela rop na bihain rausim na pulumapim i go insait long beg na kamapim olsem beg ol i bin baim long beg stret.

Buai i save i go wantaim daka na kambang. Ol dispela tripela samting i save i go wantaim. Sapos wanpela i nogat, em bai yu i no inap kaikai long penim maus bilong yu. Olsem na ol dispela tripela samting i mas i go wantaim.

Daka i no gat sisen bilong en. I no olsem buai long nambis na kopi long hailens, we i save gat sisen long gro. Em i olsem

kokonas long nambis we i save gro long laik bilong em.

Taim planti lain i laikim daka, daka i save sot tu. Olsem narapela wik i go pinis, Wantok ripota long Wewak Addy Lavaks i tok, daka i sot tru long Wewak. Em i tru. Sapos Wewak i sot tru long daka ol narapela hap tu i wankain.

I gat planti ples long Lae we ol lain bilong hailens i save baim daka. Ples olsem 10 na 14 mail autsait long Lae we ol i save salim

daka long plastik. Planti bilong ol dispela lain husait i save salim daka i no ol asples. Em ol lain autsait i kisim blok long hap i save planim daka na salim. Long dispela tupela hap em ol manmeri i save kirap long bik moning na sanap long rot - sait maket na salim ol daka. Dispela tupela ples em arere long rot bilong hailens haiwe.

Tasol i gat narapela ples insait long Lae siti we ol lain asples yet i save salim. Em Bumayong, dispela ples em bilong salim na baim daka stret.

Dispela em maus rot i go long Hobu, Pom, Situm, Singawa, Buso na Bukawa. Ol lain long dispela hap i save kisim ol daka kain taim olsem 2 na 3 kilok. Ol i save karim lait wa-taim i kam na salim ol daka long Bumayong. Ol hailens lain bilong baim daka na buai i save taimim na kam wet long Bumayong long ol PMV na draiva.

Sisen bilong buai long Markham, em ol i save salim daka long K10 i go antap long K40 na K50 long ol wan wan plastik daka. Tasol taim bilong buai i no yet, pei bilong daka i save i go antap. Em save stat long K30 na i go antap inap K100 o sampela taim i save i go antap olsem K150. Dispela prais em tru tumas na i no giaman.

Ol daka em ol stail daka stret. I gutpela na smel nais stret olsem na pei bilong em i antap tumas. Tasol ol lain hailens em ol stret lain tu. Ol i save lukim olsem em ol suit daka na ol bai traum long grisim ol papa mama bilong daka gut tru. Tupela sait wantaim i save resis long prais bilong salim na baim daka, wankain olsem long baim buai. Planti taim ol hailens i save winim ol lain bilong salim daka long toktok olsem na mask prais bilong ol stret, ol hailens bai baim long prais i daunbilo.

Dispela em i tru. Mi laik givim wanpela eksampel. Wanpela moning taim tru, samting olsem long faiv kilok, wanpela PMV bas i bin kam wan nait wantaim mi. Na ol pasindia husat i bin silip insait long dispela bas i bin tokim draiva olsem ol i laik kisim daka long Bumayong na nupela i go antap. Mi save harim olsem ol i save salim daka long dispela hap eria long Lae siti tasol mi yet mi no save lukim. Dispela em namba wan tain bilong lukim. Bas i bin go stop long ples bilong baim daka. Ol pasindia i bin i go aut na stat long baim daka. Long dispela taim planti ol narapela PMV bas na daina bilong hailens i bin i go na stap pinis.

Mipela i bin i go leit. Ol pasindia i bin baim daka pinis na wanpela pasindia meri i lukim wanpela yangpela mangi i salim plastik daka. Na meri yah i askim amas long daka. Na mangi yah i bin bekim na tok olsem K5 long wanpela plastik. Em tru mangi yah i bin holim tupela plastik daka. Meri i tokim mangi long kisim daka i kam klostu long ka na bihain em i kisim dispela tupela plastik daka na putim i go insait long ka long sait bilong en. Bihain em rausim tupela K2, samting olsem K4 na givim i go long mangi.

Taim dispela mangi i lukim dispela, em i no amamas na em i laik komple. Meri i lukim olsem boi i no wankain long dispela mani olsem na em i strongim kona bilong em na grisim em wansait. Na tu ol pasindia husat i baim buai daka pinis i lukluk strong long dispela yangpela mangi. Em i sem na i no toktok planti long daka bilong en. Em i kisim K4 long tupela plastik daka bilong em na lus lain. Kain samting olsem. Yu man na meri i salim daka, yu mas strong na salim. Ol lain bilong baim daka em ol kusai lain stret.

Long hailens i save gat kopi, ti, paireterum na nau i gat gol long Pogera, oil long lagifu na Moro. Long nambis i save gat kopra, kakao na

nau i gat gol long lihir na Misima. Em ol komoditi bilong Papua Niugini. Ol samting we yumi save salim na kisim mani i kam insait long kantri bilong yumi.

Buai na daka bisnis em tu wanpela bilong dispela ol komoditi. Bipo ol i tok em i save givim kensa long maus na planti i no kaikai. Nau tu i gat dispela kain bilip i stap yet tasol ol lain bilong kaikai buai no save wari o poret. Olsem na pasin bilong laikim na kaikai i bikpela stret.

KANAGE



• Kanage em bilong Laiagam long Enga provins. Em save long tokples tasol na tok pisin nogat. Tasol em save long tupela hap tok pisin tasol, we em bin stiliim long sampela wantok we em bin harim. Dispela tok pisin em: "Askim tambu bilong em."

Wanpela taim nau ol plis i go raid long hauslain bilong Kanage. Kanage i no wari tumas. Bikos em ting em save long tok pisin. Na bai toktok wantaim ol plisman.

Orait wanpela plisman i kam na baim Kanage: "Oit! Dispela haus bilong husat?" Baga smail gut long ol plis na tok: "Askim tambolo". Kanage bekim olsem na smail yet i stap. Plisman ya i nogat toktok. Bihain liklik narapela plisman i kam na askim gen: "Bos! Yu bin tok dispela haus bilong husat tru?" Kanage smail wantaim na bekim gen: "Askim tambolo."

Ol plisman i bel kaskas nau long Kanage. Wanpela long ol plisman i bilong Sepik. Em i bikmaus nau long Kanage: "Yu samting nogot!" Kanage bikmaus tu long em: "Askim tambolo!"

Plisman ya givim hot wan stret long tambolo bilong Kanage. Trangu Kanage kaunim sta na holim tambolo bilong em na pundaun slip long graun.

Joe Peter (Namba 2 wina)
WABAG

• Kanage em man bilong painim danis. Wanpela Fraide nait, em bilas gut tru na tekov i go long ples bilong danis. Long rot bel bilong em i pen. Orait em brukim bus na rausim kago.

Em sindaun taitim bun i stap na feveret musik bilong em i kamap. Em singsing bilong Helgas ben. Man, baga ya wantu tasol painim lip bilong klinim as. Na em holim stret bikpela haus bilong ol liklik nek karakum long lip diwai. Nait ya, husat bai save. Orait wantu tasol em rabis as long dispela lip na tekov long danis ples.

Em go sanap arere long danis ples na tromoi ai i go i kam long ol meri. Bilas bilong em tasol i mekim na wanpela yangpela meri i kam stret long em. Na askim na tupela danis. Kanage kisim hai filings na mekimsave long stailim wantaim meri ya i stap.

I no longtaim wanpela karakum i putim tit long as bilong Kanage. Em kalap nogot na pes bilong em i senis. Sem taim danis bilong em i go of bit liklik. Tasol hariap tru em ketsap gen long stail. Meri i lukim pinis na askim: "You okei o what?" Kanage bekim: "Oh ... mi orait ... nogat samting."

Tupela danis i go na i no longtaim narapela karakum i putim tit gen long as bilong Kanage. Dispela taim Kanage kisim bikpela sok stret. Mekim na danis bilong em i go wail olgeta na of bit. Planti manmeri i lukim narapela kain stail nau na lukluk strong long Kanage. Mekim na meri i danis wantaim Kanage i sem. I no longtaim musik i stop. Na ol manmeri i go bek long sia bilong ol. Kanage painim ples na em lus kontrol olgeta. Mekim nogat na em kaikai tit na singaut: "Play it rap, play rap musik mi tok, bikos dispela liklik nek tasol kirapim mi long bus, na nau sindaun bilong mi i bagarap, take it away!"

Em singaut olsem na giaman muv i go klostu long geit. Taim em kamap long geit, em putim wanpela lek ausait long banis na sisti long wara.

Donald Benson
BIALLA

• Kanage bilong Sepik. Wanpela taim em i kam sindaun na stori wantaim poroman bilong em bilong hailans, na resis long wanem provins i gat planti pipel. Hailans i tok: "Mipela ol hailans em planti moa ya. Lukim, mipela gat lsten Hailans, Westen Hailans na Sauten Hailans. Yu gat moa!"

Kanage skelim poroman bilong em pinis na em bekim: "Sore, yupela no inap. Yu lukim, mipela tu wankain, Is Sepik, Wes Sepik na Saut Pasifik."

Moses Winim
BUKA

• Lukim moa tokpilai wantaim Kanage long pes 18



Bik Bro

REBO

TRIPELA DE BIHAIN... BENK I STRE-TIM OLGETA HAUSSIK NA BALUS FE BILONG AUDA NA EM I GO DAUN LONG AUSTRALIA LONG KISIM OPERESEN

INSAIT LONG BALUS REBO TINGTING PLANTI LONG AUDA...

MI NO SAVE SAPOS AUDA BAI SOVAIVIM DISPELA OPE-RESEN O NO-GAT!

LONG HAP-SAIT AUDA SILIP ISTAP. OL MASIN I HOLIM EM NA SILIP STAP...

TRIPELA AUA BIHAIN NA OL I KAM KAMAP LONG BRISBEN, AUSTRALIA...

LONG PLES BALUS YET, AMBALANS NA OL DOKTA WETIM OL LONG HAP...

BRISBANE AIRPORT

HAUSSIK LONG HAP I TRAIPELA TRU...

MAN! TRAIPELA HAUS-SIK TRUYA!

PRINCE ALEXANDRA

Igo moa Neks Wik!!



SIPAK MAIK

HEY! DON'T FOGET TU PEI DA BILL WEN YU GO AUT!!

MAIK I RAUSIM TUPELA WAITMAN LONG HOTEL...

HIA IS YO BILL SIR!

K150!

WHAT!?

HOTEL RESTAURANT	
BEER X 3	20
SPIRIT X 2	30
ALA CART...	50
ROST BIFF	25
ROST CHICK	25
TOTAL	K150

TUPELA TARANGU PEIM BILL BILONG KAIKAI NA OL I GO AUT...

BLAST!! DIS IS AUTREI-GESS!!

MAIK I RINGIM PORO BILONG EM LONG IMIGRESEN OPS LONG WAIGANI...

KEVIN.. EM AIT YAH MAIK.. PEMINEITIM PAS POT BILON TUPELA WAITMAN!

TASOL MAIK.. EM BAI MI RAITIM SABMISSIN LETA IGO LONG MINITA NA KEM OKE BILONG EM!

AL DON KEA, JEST, DO IT.

ER.. BIHAIN YU KAM LUKIM MI LONG OPIS LONG SIKS-MAIL, OKE?

BLARY BRAIBERI!!

Igo moa Neks Wik!!

*MIGRATION, FOREN AFFEAS.

KANAGE



• Kanage save wok olsem trakta draiva long plantasin long Kokopo eria bilong Is Nu Briten provins. Em wanpela man bilong werim kep o hat olgeta. Maski em go wok o raun nabaut, o slip long bed, kep mas stap oltaim long het bilong em. Bikos em i gat kela. Na i no laikim ol meri i lukim, bai ting olsem em lapun man. Na sans bilong em bai bagarap.

Wanpela moning, menesa paitim belo na Kanage wantaim olgeta wokman meri go bung na sanap long lain. Menesa givim wok long wanwan wokman pinis, na tokim Kanage: "Yu kisim ol meri long trakta na go dropi ol long las blok bai ol wok long hap."

Kanage kisim oda na i no wet. Em lukim ol meri tu na laik so op liklik. Kwiktai em kalap long trakta, statim ensin na bikmaus long ol meri: "Gei girls! Yupela kalap hariap, I don't have time for you!"

Ol meri i no sindaun gut na Kanage hatim ensin na tekov. Mekim na sampela i lusim balens na klostu i pundaun. Kanage kisim kona na kukim plantasin rot nau.

Dispela taim em wanpela meri, Kanage save putim skin long em i stap antap tu long trakta. Mekim na wantaim gutpela kolwin bilong moning i blo, Kanage i kisim hai filings tru. Wanpela han tasol em holim stia na senisim gia, na narapela han em holim smok na pulim isi isi tru.

Em i no isi tu long trakta. Em kilim indai stret na ron olsem wanpela teksu insait long plantasin. Ol meri pret long kain draiv olsem na ol i singaut: "Hei Kanage, yu draiv isi ya. Em i no haiwe rot bilong yu na yu ron olsem!" Kanage singaut i go bek long ol: "Yupela olgeta pasim maus bilong yupela na stap isi. Yupela i no save olsem mi 13 yias long draiv a?" Yupela olgeta ya, yupela bin hanagamap long bol bilong tumbuna bilong yupela yet, mi stat long draiv. Yupela toktok planti bai yupela go daun na wokabout!" Kanage sinagaut i go bek long ol meri olsem na i no isi. Em kukim stret trakta na das i kamap long beksait.

I no longtaim wanpela longpela han bilong kakao diwai i pas long het bilong Kanage. Na rausim kep o hat bilong em na win i blowim i go long beksait na pundaun longwe tru. Dispela taim em kela bilong Kanage i sain tru. Na em namba wan taim tru bilong ol meri i lukim kela bilong Kanage. Man ol meri i kilim indai stret long lap long beksait.

Mekim na Kanage i no tingim laip bilong em. Trakta ron yet na em kalap i go daun long rot long kisim bek kep na haitim kela bilong em. Trakta ron long laik bilong em yet na go pamim as bilong kokonas na stop. Ol meri kalap i go i kam nabaut long sait.

Kanage i no wari long bagarap em kism taim em kalap. Em pasim tingting na ron i go bek long kisim kep bilong em. Na tu em i no tanim bek na lukluk long trakta na ol meri. Na ol meri lap long em na singaut: "Kanage! Mipela lukim pinis kela bilong yu! Lukim em i go, wanem kain 13 yias kusai draiva i go! Yu sanap na toktok!"

Dispela taim Kanage ron i go kisim kep na go olgeta. Em i no moa soim pes long wok. Bikos em save pinis olsem bos tu bai pinisim em long wok.

Evlyn Maya
RABAUL

• Kanage em bilong Sepik. Em stap long Biala na taim bilong Senses o kaunim manmeri. Na Kanage em bilong ples We. Na namba tu nem bilong Kanage em Sarap.

Em sindaun i stap long haus na ol opisa i kam stret long em, na askim: "Yu bilong we?" Kanage i bekim: "Mi bilong We." Opisa i askim gen: "Yu bilong we?" Na Kanage i bekim: "Mi bilong We." Opisa ting Kanage i no save gut long tok pinis, na em askim gen: "Wanem namba tu nem bilong yu?" Kanage bekim: Sarap! Taim opisa i askim gen, Kanage belhat pinis na bikmaus nau: "Sarap! Sarap! Sarap! Opisa!"

Yothu Lahe
BIALLA

• Kanage em bilong Makam. Em i wanpela top basketbal pilaia. Na save winim stret ol arapela mangi. Olgeta taim em i pilai, ol yangpela meri save sapot na go wail olgeta.

Mekim na ol arapela mangi save jeles. Orait wanpela taim, wanpela mangi i kam askim Kanage: "Yu save kaikai wan...m na save pilai strong tru." Kanage bekim: "Mi save kaikai Besta tinfis olgeta taim, olsem na mi pilai gut. Nau mi wok long kaikai Lucky Star tinfis, na ol A1 selekta i salim mi i go long Solomon Blue Taiyo, na bai mi kisim Supreme Dabol 555 medal, na bai mi kamap King Fish sta."

Kanage konim stret mangi ya. Mekim na mangi ya wari nogut tru na tingim 777 tinfis bilong Japan, na tok: Em i orait, mi bai traim kaikai 777 tinfis bilong ol Siapan na lukim sapos i gat wankain kik olsem olsem ol tinfis yu save kaikai o nogat."

Simon Chaun
BIALLA

Man i maritim pis meri

LONG bipo bipo tru, i gat wanpela man i stap. Em i wokim haus na gaden bilong em na i save painim ol kaikai na lukautim em yet. Em i sapim tu wanpela kanu bilong em na em i save pul i go long solwara na pulim ol pis. Man ya i save amamas bikos em i no sot long wanpela samting.

Olgeta taim em i laik go long solwara, em i save kisim olgeta hap pipia kaikai bilong haus na i go namel long solwara na tromoi i go daun. Em i save mekim olsem olgeta taim.

Tasol taim em i save tromoi ol hap kaikai long solwara, wanpela bikpela samting i save kamap long em. Olgeta taim, haus bilong em i save klin na ol samting i save luk nais long haus bilong em olsem ol sampela lain i stretim bet, haus na kukim kaikai bilong em redi long em i kam kisim tasol.

Man ya i save lukim dispela na kirap nogut na i save paul olgeta long wanem samting tru i save mekim dispela wok long haus bilong em.

Wanpela taim em i tingting long em i mas hait na traim painimaut long dispela. Olsem na em i giaman karim ol samting bilong wok gaden na i go long bus. Tasol em i no go longwe na em tanim na hait arere long bus i stap. Em i hait i stap na i no longtaim, em i lukim stret. Ai bilong em i op nogut tru na bel bilong em i sut stret na han lek bilong em i guria wantaim. I no meri ya. Naispela na kumkatim angelo stret bilong solwara i kam antap. Skin bilong em i waitpela olsem misis na gras bilong em i longpela go tasim as bilong em na ai bilong em i blu stret olsem solwara yet. Dispela em wanpela pis meri bilong solwara i kam antap long dispela man nogut ya.

Meri ya i go insait long haus bilong bikman ya na i wok long klinim na stretim ples i stap. Taim bikman ya i kisim win pinis na ai bilong em i kam bek na wok gut na gutpela tingting i kisim em nau orait, baga i wokabout isi i kam antap long haus na kalap antap long meri ya na i laik holim em. Em i taitim olgeta bun bilong em, tasol skin bilong meri ya i wel, olsem na meri ya i wel long man ya na ronawe i go ausait na go kalap long solwara na lus nating.


Man ya i wari nogut tru long dispela na



em i no slip gut. Long moning, em i stat redim ol kaikai na karim i go tromoi gen long solwara na giaman pulim pis i stap. Em i save mekim olsem olgeta taim na wanpela taim, em i pulim ol pis i go na pulim wanpela bikpela pis tru. Em i karim ol pis i go long haus na kukim ol liklik na kaikai. Na em larim bikpela pis istap na slip i go tulait.

Long tulait, taim bikman ya i kirap, ai bilong em i op nogut tru na maus bilong em i guria long toktok taim em i lukim stret dispela kwin bilong ol pis meri i sindaun arere long bet bilong em.

Em nau pis meri ya i tokim bikman ya stret olsem, bikman ya i pulim em wantaim liklik susa bilong em na kukim ol pinis na kaikaim ol. Na em tasol i stap olsem na em i sindaun igo na tanim kamap meri tru. Olsem na pis meri ya i stap wantaim man ya na tupela i marit na i kamapim tupela pikinini. Wanpela boi na wanpela meri.



Ol i save stap amamas i go na wanpela taim bikman ya i kros wantaim meri bilong em na em paitim em. Taim man ya i go long gaden, meri ya i hariap tasol werim skin bilong pis na tekov i go daun long nambis na swim i go pinis.

Taim man ya i kam bek long apinun, tupela pikinini bilong em tokim em olsem mama i go pinis long solwara. Man ya i harim na bel bilong em i bruk stret na em i mekim save long krai.

Em karim tupela pikinini ya na ol tripela i pul long kanu i go namel na krai na singautim mama bilong ol. Tasol nogat stret.

I no longtaim, wanpela ailan i kamap na kanu bilong ol tripela i pas long dispela ailan. Na ol i stap long dispela ailan na i save krai na wetim mama bilong ol long kam bek tasol nogat. Olsem na dispela ailan i kamap olsem ailan bilong krai.

Bro Kelly, (FMK) Jimi.

Man bilong mi i save lukim narapela meri

Mi gat tingting long lusim em tasol mi pilim sem, bikos ol wantok bilong mi bai toktok baksait long mi o tok pilai long mi. Taim mi save askim em long mi laik go, em i save mekim sori toktok long mi mas stap wantaim em bikos em

tok o tingting yu ken skelim insait long dispela hevi bilong yu.

Yu gat bikpela tingting olsem man bilong yu i wok long go raun wantaim narapela meri. Tasol yu save gut long dispela o nogat?. Sampela lain i tokim yu olsem wanpela meri i save ringim man bilong yu long wok ples, tasol nogut dispela man o meri i giamanim yu o nogut em i save toktok long telepon long ol wok bilong em. Yu gat arapela luksave long dispela hevi tu o nogat?. Mipela i no laik traim long karamapim pasin bilong man bilong yu. Tasol dispela em sori pasin tru taim wanpela i stat long lusim bilip o tras bilong em long patna bilong em, jeles tingting i save kamap. Jeles man o meri i save hariap long ting olsem samting i rong na i no save traim narapela. Man bilong yu tok em i no save lukim narapela meri. Jeles pasin i stapim yu long i no ken bilipim em na dispela i kamapim belhat bikos yu ting em i giaman na i no tok tru. Nogut em i wok long tok tru.

Man bilong yu i tok em i no laikim yu long go bikos em i laikim yu na yu mas stap wantaim em. Dispela i mas bikpela laik na tingting tru bilong em olsem na yu mas skelim na glasim gut dispela. I gat sans olsem sampela taim bai jeles na bel kros pasin bilong yu bai bagarapim gutpela tingting bilong yu long laikim man bilong yu. Sapos em i harim ol dispela stori bilong yu olsem yu nogat bilip long em moa o ol arapela tingting nogut yu gat long em, ating em bai ting olsem yu no laikim em moa.

Nogut em i ting olsem yu no laikim em moa olsem na em i save go lukim narapela meri nau long painim nupela amamas we yu no bin givim em pastaim.

Em i hat long mekim dispela, tasol inap yu ken traim long toktok wantaim em long dispela na i no ken kisim long pasin bilong tok kros na belhat?. Askim em long tokim yu long wanem samting i rong long marit bilong yutupela na toktok long ol rot bilong traim stretim. Tokim em long wanem samting i save mekim yu pilim wari na belkros na bihain harim gut wanem samting em bai toktok long en. I gat rot tu olsem nogut em i gat hevi long em yet na em i laikim gutpela pasin na isi sindaun long haus. Bikos yu meri bilong em, dispela em wanpela wok yu mas mekim long helpim em sapos em i gat sampela ausait wari o hevi i stap. Sapos em i ken pilim olsem yu inap mekim ol samting i orait long em, ating em i no inap long tingting long painim arapela lain husat bai helpim em.

LAIPLAIN



Dia LAIPLAIN,
Mi wanpela yangpela maritim meri. Tasol man bilong mi no save tok tru long mi. Em i save hait na go raun wantaim narapela meri. Em i save giamanim mi olsem em i save go lukim ol wantok o go long miting na i save kam long biknait.

i laikim mi. Em i mekim moa toktok giaman o olsem wanem?. Inap mi lusim em na go statim nupela laip?.

BETRAYED WIFE

Dia PREN,

Dispela em wanpela kain wari stori tru long lukim olsem dispela kain pasin i kamap long nupela taim bilong yutupela long marit. Olgeta meri i save driman long gutpela amamas, gutpela sekyuriti na amamas wantaim man em i laikim long maritim.

Bilip na klia long narapela i save kamapim gutpela as bilong marit i groa long en na kamapim gutpela na amamas long famili. Sapos wanpela bilong tupela i abrusim dispela rot, bai i gat hevi long dispela strong bilong famili. Sapos nogat wok bung wantaim gen long strongim na mekim marit laip i ron gut gen, bai dispela marit i bruk daun na kamapim planti wari na bel nogut bihain.

Bilip yu gat long man bilong yu long maritim em i wok long pundaun nau. Yu yet i ken kamapim wanem tingting yu laik mekim, tasol i gat sampela tok-

Long pastaim, mi save bilip long em. Tasol bihain mi wok long sekim, na mi painimaut olsem wanpela meri i save ringim em long wok planti taim. Em i save haitim dispela toktok na tok em tok win tasol. Tasol mi no bilip long em. Mi save pilim kros na belhat olgeta taim.


Mi no inap stap olsem na larim em i wok long go het na prenim narapela meri long sait olsem na mi laik lusim em. Tasol em i save tok olsem em i no laik lusim mi na em i no laikim narapela meri. Tasol mi no save bilip toktok bilong em.

Mi wari tu bikos nogut em i mekim wankain tok giaman long dispela meri tu long grisim em na yusim em tasol. Sapos em i slip wantaim narapela meri na kisim sik nogut, bai em inap long givim gen long mi.



• Dispela em ol yangpela plisman bilong Palestinian i mekim wangepela trening bilong ol. Ol i soim wangepela stail bilong bung wantaim na pait egensim ol birua lain, em long greduesen bilong ol em i bin kamap long Gasa long mun Novemba, 1997.

• **ANTAP:** Meri ausait long banis waia wantaim soldia em wangepela bilong plan-ti famili memba bilong ol kalabus manmeri long Sorokaba, klostu long Sao Paulo long kantri Brasil. Ripot i tok ol kalabus manmeri long dispela haus kalabus i bin holim pasim moa long 600 pipel, na askim gavman long luksave long sampela askim bilong ol. Bihainim dispela, famili bilong ol kalabus manmeri i go protes ausait long haus kalabus na sapotim ol kalabus manmeri. Bihainim sampela kibung, ol plisman na soldia i go insait gut long haus kalabus, na ol kalabus manmeri larim go fri dispela 600 manmeri em ol bin holim pasim. Nogat wangepela manmeri i dai long dispela samting, em i bin kamap long stat bilong dispela mun.



• Dispela em ol smok woa balus bilong Amerika, husat i redi long go salensim Saddam Hussein bilong Iraq long mun Novemba bilong las yia. Toktok i nostret yet namel long Iraq na Amerika long wanem kain wok ol Yunaited Nesens wokman meri mas mekim long sekim ol pait samting long Iraq.

OL WANSOLWARA NIUS

Insurens karamapim nau ol fisamen long Samoa

APIA: Long namba wantaim bai ol manmeri bilong painim pis long solwara i gat insurens wantaim Samoa Laip Insurens Koperesen. Jenerel Menesa bilong insurens kampani, Lealaialoto Aniseto Ah Ching i tok em bai namba wna taim bilong ol i gat polisi we bai lukautim laip bilong ol manmeri i painim pis long solwara. Aninit long dispela nupela polisi we bai ol tokaut klostu, Mista Ching i tok laip bilong wanwan manmeri bilong painim pis long solwara bai kos moa long K6,000.

Em i tok tu olsem wok bilong painim pis long solwara i no isi bikos birua i ken kamap klostu. Olsem na ol fisamen o manmeri bilong painim fis mas rausim bikipela mani long olgeta fotnait i go long koperesen.

Vanuatu redio menesa risain long resis long jenerel ileksen

POT VILA: Jenerel menesa bilong Vanuatu Broadcasting na Televisen Koporesen (VBTC), Joe Bomal Carlo, i risain pinis long resis long jenerel ileksen, em bai kamap long mun Mas. Long risain leta em i salim i go long bod siaman bilong VBTC. Carlo i tok em bin plenim long risain long Jun taim tripela yia kontrak bilong em i pinis. Tasol em i risain nau bikos ileksen em ol surukim i kam klostu long mun Mas. Em i tenkim VBTC bod na nesanel gavman long at bilip long em long opis. Em i promis long sapotim wok bilong redio, niuspela na televisen long bihain taim.

Samoa Journal niuspepa gat ol nupela papa

APIA: Tupela bisnismen na wangepela niusman i baim pinis 50 pesen sia long Samoa Journal & Advertiser niuspepa bilong Ameriken Samoa.

Olpela menesing dairekta bilong dispela niuspepa, Robert Mathew King, husat em famili bilong em i papa yet long narapela 50 pesen sia bilong dispela niuspepa, i tokaut olsem dairekta bilong komyunikesen Aleki Sene, olpela bikman long Kongres Fofu Sunia na niusman Ryan Thompson em ol nupela bisnis patna bilong dispela niuspepa.

Mista Thompson em wangepela olpela sab edita bilong The Daily News, narapela niuspepa bilong Ameriken Samoa. I gat bilip tu olsem aninit long nupela menesmen, nem bilong Samoa Journal bai senis. Samoa Journal i bin stap prin long wangepela mun i go pinis. Bikos em bin bungim hevi long nogat inap mani. Olsem na em i bin pas sampela taim long las yia.

Hai Kot odairm PM long soim pes long ileksen

HONIARA: Hai Kot bilong Solomon Ailan i odairm pinis Praim Minista Bartholomew Ulufa'alu long soim pes long kot em yet, long as bilong ileksen petisen. Olpela birua na olpela Deputi Praim Minista Francis Saemala i givim dispela petisen long kot, bihain long em i lus long Aoke/Langalanga sit long jenerel ileksen bilong mun Ogas long las yia. Praim minista i winim dispela sia. Praim minista i stap nau long Nu Silan long kibung bilong stretim hevi long Bogenvil ailan. Na Jas Sam Awich i odairm olsem praime minista yet i mas stap long kot, we mas bekim sampela askim. De bilong kot em ol bai makim bihain long praime minista i kamap long Honiara, biktaun bilong Solomon Ailan.

- Ol ripot i kam long PACNEWS

POSF

Public Officers Superannuation Fund Board

PABLIK NOTIS

POSF Bod laik toksave long ol olpela memba bilong en husat i lusim wok bilong ol long 1997 olsem em i kisim pinis K20.8 milien i kam long Tresera. Dispela mani i bilong 1997 Stet Sia bilong ol benefit. Na ol Wokman meri bilong Bod i wok de na nait long stretim ol pepa wok hariap bilong ol dispela memba husat i kisim tasol fan sia bilong ol long 1997.

Bikos i gat planti namba bilong ol memba husat i wet long kisim dispela mani, em bai kisim sampela wik long Bod i baim olgeta dispela memba.

Mipela bai bihainim sistem we ol memba i kam pas bai mipela sevim ol bihainim oda.

Mipela bai bihainim tru dispela oda, bikos mipela laik givim wankain sevis tu long ol pipel ausait long Nesanel Kapitel Distrik na Sentrel provins. We bilong wokim peimen we i stap insait long Seperesen Atoriti Fom em mipela bai bihainim stret.

Olsem na Bod i askim long luksave bilong yupela.

EREMAN K. RAGI CBE
Menesing Dairekta

Edvais long ol yangpela susa long painim rait man

Dia Edita,
Mi gat bikpela wari long ol susa bilong mipela long kantri tude. Olsem sampela taim mi save harim ol radio pilai, we i stori long man i spak i kam na paitim meri. Mama bai krai na ol pikinini bai krai tu. Papa bai brukim plet sospen na olgeta samting insait long haus.

Olsem na mi laik givim liklik edvais o tingting long ol yangpela susa bilong mipela. Yupela mas tingting gut na was long ol yangpela man i save bikhet, dring bia o arapela strongpela dring na spak, na mekim pamuk na bikhet pasin. Dispela em ol man i save les long wok. Na save raun painim hap bia bilong ol wokman.

Ol yangpela meri, tingim sapos yu poroman wantaim kain man olsem, bai yu kisiin wanem?

Save i stap long yupela. Yupela mas painim poro olsem man i save wok gaden, na stap isi man bilong ples. Ol kain man olsem bai lukautim yu.

Man save stalim em yet long ai bilong yu, susa mi tokim yu, em lus man stret ya.

Yu mas tingim o glasim ol man, husat save wokabout long ai bilong yu wantaim sem. Em yes, em rait na rait man olgeta long yu mekim famili wantaim.

Em tasol liklik edvais bilong mi. Yu husat susa i laik kisiin mao save ong dispoela, plis noken sem long rait long Wantok na autim tingting bilong mi, bai mi ken ritim na givim sampela moa tingting.

**Dickson Maneke
KIMBE**

Sandaun Gavana givim PMV trak long sampela ples tasol, na sampela nogat

Dia Edita,
Mi wanpela mangi Kilipau long Bewani sab distrik bilong Sandaun provins. Mi laik autim komplek bilong mi i go long Gavana bilong Sandaun, John Tekwie. Komplek bilong mi i go olsem.

Bilong wanem na gavana i donetim sampela PMV trak i go long sampela ples tasol na mipel sampela ples trangu nogat? Olsem wanem, mipela nogut o?

Pasin bilong lida i no olsem. Lida i mas sanap namel long mipela olgeta pipel bilong em.

Na mekim gutpela wankain wok wantaim ol pipel bilong em. Kain pasin bilong wansait i no gutpela tumas long ai bilong mipela ol pipel.

Sapos lida i mekim wansait pasin, mi askim em nau long lusim dispela pasin nogut na helpim mipela olgeta pipel bilong Sandaun. Las yia i go pinis, mipela mas stat gut wantaim gutpela yia.

Mipela sampela pipel husat i votim gavana we em i holim opis long 5-pela yia i go pinis, mipela i no kisiin wanpela bekim liklik

long wok developmen. Olsem na nau mi autim dispela komplek bilong mi.

Yu husat brata susa i laik sapatim ol egensim dispela leta bilong mi, yu welkam tasol. Tasol bikpela tru em mi laikim wanpela bekim o tok klia i kam long opis bilong gavana, em bai mi amamas tru. Na bai save olsem em i trupela gavana, na save putim yau long komplek o wari bilong ol pipel bilong em.

**Benjamin A. Wep
VANIMO**

Olpela yia 1997 i no gutpela long Wewak taun na Is Sepik

Dia Edita,
Long lukluk bilong mi olsem Praivet Bisnis Konsalten long Wewak taun, 1997 i bin wanpela nogut na bagarap yia bilong Wewak taun na Is Sepik provins. Planti samting i wok long kamap. Na bagarapim nem bilong taun na provins.

Hia em sampela bilong ol dispela samting nogut:

- Pasin pamuk we sampela yangpela meri na marit meri long ol taun na setelmen save go salim skin bilong long ol Malasia man, husat i wok i stap long ol bikpela sip bilong painim pis, em i save sua long Wewak bris;

- Ol hotel em ol meri save yusim olsem ples bilong painim mani man na salim skin bilong ol;

- Smok mariwana o spak brus i bikpela tru olsem ol yangpela i save salim long strit na kisiin mani;

- Hombru o stim alkohol tu em bikpela long ples we ol man i save wokim long ol banana na painapol i sting pinis;

- Pasin bilong yusim gan long banisim haiwe na hensapim ol PMV ka na pasindia we plis i no save bihainim gut ol dispela ripot;

- Ol mangi i save raunim ol mama na kisiin ol kumu na gaden kaikai ol i salim long Wewak taun maket;

- Long ol bas stap dispela pik poket pasin i kamap bikpela tumas;

- Ol pablik sevis wokman i save pilai hos res na poki pilai tumas na nogat sevis i go long ol distrik;

- Nogat planti bikpela projek i kamap long provins bikos pasin bilong Sepik pipel i no senis;

- Nogat inap dinau mani em ol haus mani o benk olsem PNGBC, Westpac na Agrikalsa Benk i givim long pipel long kirapim bisnis;

- Prais bilong ol Hotel bisnis olsem Winjama na Peninsula Hotel i dia tumas na i no pulim planti turis;

- Plis long provins i no mekim inap wok long lukautim lo na oda; na

- Hevi bilong biksan i stap longpela taim i mekim planti ples i drai, we ol pipel i sot long kaikai.

Dispela em sampela samting nogut we i bin kamap long las yia na taun na provins i no kisiin gutpela nem.

Gavana bilong Is Sepik, Sir Michael Somare na Wewak Open Mema, Bernard Narakobi i save toktok planti taim long nius na radio long ol pipel i mas senisim pasin bilong ol. Na welkamim developmen i kam insait long provins.

Mi bilip na hoo olsem dispela nupela yia 1998 em Wewak taun na Is Sepik bai gat bikpela senis tru long planti bikpela projek i kamap. Hia em sampela bilong ol dispela projek:

- Wewak Storm wota projek we bai kos K12 milien;

- Fopela nupela klinik, tripela nupela plis stesin, na nupela Eben Kaunsil senta bai kamap;

- Wok bilong stretim eria na planim flaua long ples balus na taun eria bai kamap we bai kos K800,000;

- Nupela 5 Sta hotel bai kamap we bai kos K10 milien;

- Tinfis faktori we bai kos K125 milien

long sanapim em Starkist USA kampani bai sanapim; na

- Toktok long Hides Ges paipain em bai kam long Is Sepik.

Dispela ol projek bai stat long dispela yia 1998. Na olgeta pipel bilong Is Sepik i mas amamas na larim ol dispela wok i kamap, we bai givim wok long ol skul liva insait long provins. Na bai ol i noken tingting long mekim raskol pasin. Na sapatim long wanem kain wok developmen i kamap long provins.

Em tasol toktok bilong mi. Plis yu husat i laik sapatim mi, yu mas rait i kam bai mi ken lukim.

**John Sebastian Kriosaki
WEWAK**

Makim gutpela pesiden bilong Wantoat

Dia Edita,
Mi yet wanpela mangi bilong Wantoat long Morobe provins, husat i stap nau long biksiti bilong provins, Lae. Na mi laik tok olsem ol lokol gavman kaunsil long Wantoat i mas makim gutpela stretpela man long kamap pesiden. Na noken pasim ai na makim man nating long mani, kago na gris toktok bilong em. Bikos kain man i no inap long stretim wari bilong mipela ol pipel bilong ples. Olsem na tingim gut na makim man we i stap klostu long pipel. Na i ken tok pait strong long helpim ol trangu manmeri na pikinini bilong ples.

Noken makim man husat i pasim maus long toktok long ol arapela bikman bilong Lae. Makim wanpela man bilong toktok, husat i ken kisiin luk-save na holim wanpela sinia minista opis long provinsal kabinet. Em bai em i helpim ol wod

mema na ol manmeri long ples aninit long nupela rifom sistem, na bringim sevis long pipel.

Sapos mipela i no makim stretpela man, mipela mas tingting nau long we yu na mi bai go antap long lata long pinisim antap na malolo nogat. Olgeta taim bai yumi hatwok na yumi pilim olsem sampela bilong yumi inap em tasol bai i stap antap long leta. Olsem na mobeta yumi mas save nau em i taim bilong yu na mi long developim ples. Na yumi noken aipas, na mas opim strong na lukluk i go inap yia 2002.

Em tasol na yu husat brata susa laik bekim o egensim dispela pas, yu ken rait tasol long dispela niuspepa na bai mi ken ritim.

**Ishmael Batu
LAE**

Dei memba mekim rait muv long sanapim distrik opis

Dia Edita,
Mi wanpela mangi bilong ples. Mi laik sapatim memba bilong Dei. Long wanem em lu tok long wokim wanpela distrik opis long eria bilong mi long Dei.

Mi laik tok olsem long bipo i kam inap nau, mipela i nogat wanpela distrik opis we mipela i ken go lukim ol gavman opisa. Na toktok long wanem kain developmen wok mipela i laikim, bai ol i ken helpim mipela.

Olsem na sapos memba i bihainim tok bilong em na mekim dispela opis, em bai gutpela tru. Na mi ken tok em bai stap memba yet bilong mipela long Haus Palamen.

Bilong wanem na bai mipela makim nupela memba, taim memba nau i laik helpim na bringim sevis long mipela. Memba, mi laik tok olsem yu mekim rait muv stret. Mi sapatim yu tru long wanem samting yu toktok long mekim.

Em tasol na yu husat man o meri i laik sapatim dispela pas, yu welkam tasol.

**Steven Owa
MT HAGEN**

Kampani mas givim haus long ol wokman

Dia Edita,
Mi save lukim planti wokman meri bilong ol praivet kampani olsem haus mani o benk, woksop, stua na plantasin em kampani i no save givim haus long ol. Ol i save slip nabaut na go long wok.

Planti bilong ol dispela wokman meri save slip wantaim ol wantok. Na i no rispektim papamama bilong haus. Na planti hevi i save kamap long komyuniti.

Mi lukim na dispela i no gutpela. Olsem na mi askim na ol praivet kam-

pani long mekim haus bilong wokman meri bilong ol.

Yupela ol kampani noken tingting long mekim mani tasol. Yupela mas save olsem ol wokman meri em bikpela samting. Sapos yupela nogat wokman meri, yupela i no inap mekim mani. Noken tingting long mekim mani tasol.

Em tasol na yu husat manmeri i laik sapatim dispela pas, plis rait long Wantok niuspepa na bai mi lukim.

**Emendi Firo
KAVIENG**

Autim stretpela gutnius bilong God na noken paulim pipel

Dia Edita,
Mi laik sapatim leta bilong brata Krisina Kawo, em i bin kamap long Wantok niuspepa bilong Desemba 4, 1997. Olgeta toktok bilong brata long mipela

ol manmeri bilong dispela graun i sakim tok bilong God papa i tru.

Mi laik skruim dispela toktok olsem mipela olgeta manmeri bilong dispela graun, God papa i wokim mipela. Olsem na long las de em yet bai kam na skelim mipela wanwan.

Tasol mi laik tok olsem bilong wanem na mipela ol wokman meri bilong wanwan sios i paulim ol manmeri bilong dispela graun. Mi laik askim sapos mipela save ritim Baibel tu o nogat? Plis ritim Baibel long Rom 16: lain 17 i go long 20, we i tokim mipela long bihainim pasin em God papa i laikim mipela long bihainim.

Mipela noken go tokim ol manmeri long kainkain toktok bilong brukim sios nabaut. Mipela mas stap wantaim bikos mipela olgeta i lotu long wanpela God papa tasol.

Mipela ol manmeri i go autim gutnius bilong God papa i mas tingting gut. Mipela i noken paulim ol manmeri long dispela graun. Mipela mas autim gutnius long stretpela we olsem Baibel i tok. Na noken tanim mining bilong ol toktok nabaut na paulim ol pipel, na tu brukim wok bilong wanwan sios.

Em tasol toktok bilong mi na yu husat i laik sapatim o egensim, rait i kam long Wantok na mi ken ritim.

**Peter Waigem
WABAG**

1997 em i wanpela bagarap yia bilong Papua Niugini

Dia Edita,
Las yia 1997 mi wok long lukluk i kam inap kantri bilong mipela Papua Niugini i go insait long planti taim ol lida i no lukautim yumi gut olsem ol i gat dispela grii pasin long ol yet. Hia em sampela samting em i bin kamap long las yia, we i bagarapim gutnem bilong yumi:

- Sandlain Ami i salim ol samting long pait we i kosim nesenel gavman K50 milien olgeta;

- I bin gat bikpela pret olsem olpela PNG Difens Fos komanda, Jerry Singirok i laik tekova long Chan/Haiveta gavman;

- I gat ripot olsem olpela Chan/Haiveta gavman i westim bikpela mani bilong ol POSF memba long baim dispela Konsevetori Bilding o haus long Kens, Ostrelia, we i kos K18 milien;

- Hevi bilong biksan we ples i

drai na ais i pundaun, na klostu long wan milien pipel i sot long kaikai long olgeta hap bilong kantri;

- I gat ripot long Praim Minista Bill Skate na Plis Minista Thomas Pelika i stap insait long braiberi ripot wantaim olpela poroman bilong Skate, em wanpela bisnisman bilong Ostrelia, Mujo Sefa;

- Praim Minista Bill Skate i rausim ol Pangu na PPP memba long gavman

bilong em, bihainim dispela ripot bilong braiberi wantaim Ostrelia bisnisman, Mujo Sefa; na

- Kantri i sot long mani bilong pasim 1998 Baset, olsem na Palamen i pasim tasol K800 milien Saplai Bil.

Dispela olgeta samting i soim olsem ol lida bilong kantri i tingim ol yet, na i no tingting long ikonomi bilong kantri. Ol i laik kamap mani

man long wanpela nait tasol.

I gat ripot long Praim Minista Skate i mekim planti senis we i no stret long ai bilong ol saveman meri, na tu long ol liklik manmeri bilong dispela kantri. I gat ripot tu olsem praime minista i laik kamap wanpela dikteta long mekim ol gavman disisen long laik bilong em yet. Na tu em tasol i makim em yet olsem Difens Minista na siasman bilong Nesenel Sekyuriti Kaunsil, we planti manmeri wantaim ol lida i no amamas.

Mi laik tok olsem dispela yia 1997 i no gutpela yia. Na planti pipel i bin pret na toktok planti olsem nogut las de i kam. Mi ting mipela mas tanim bel na askim God papa long helpim mipela, em bai kantri i go het gut long yia 1998.

**John Sebastian Kriosaki
WEWAK**

Memba bilong Kabwum i stap long Kabwum

Dia Edita,

Mi wanpela mangi Timbe long Kabwum insait long Morobe provins. Mi laik bekim pas bilong brata James Mai, em i bin kamap long Wantok niuspepa namba 1218. Long leta bilong em, em i tok Memba bilong Kabwum long Haus Palamen, i no mekim gutpela wok kamap long ilektoret bilong en.

Mi laik tok olsem ating brata ya i mas go lukluk raun pastaim long Kabwum bipo em i raitim leta long niuspepa na toktok.

Sapos man ya i laik save long hevi na wok em memba i mekim long ilektoret bilong en long 5-pela yia i go pinis, em i mas raitim pas long mi. Na tok stret long wanem samting i rong. Na noken bagarapim gutpela nem bilong Kabwum.

Yu toktok long hevi bilong biksan we helpim saplai i no go gut long pipel, mi ken tok olsem asua i stap long wanpela o tupela man tasol long Kabwum. Tupela i pasim rot bilong helpim. Dispela ol man i rong pinis long ai bilong ol pipel bilong Kabwum. Na i no memba bilong Kabwum.

Sapos yu laik save moa long dispela, mobeta yu rait stret long mi o long Kabwum na save gut. Na noken bagarapim nem Kabwum long niuspepa. Mi wet long pas bilong yu.

**Robbie Bofeng
Timbe Nanang
MOROBE**

Tenkyu Taku long helpim ol Woda

Dia Edita

PLANTI taim mi save ritim long niuspepa, harim long redio na lukim long EMTV ol lida na kainkain manmeri i komplem long ol raskol. Nius i save kamap olsem ol raskol i brukim wanpela haus kalabus na ronowe.

Namba bilong ol kalabus lain i go antap tasol i nogat inap haus kalabus bilong lukautim ol. Mi save harim tu ol gavman i putim bikpela mani long helpim ol plisman long stapim hevi bilong lo na oda. Wan wan taim tasol mi save harim bikpela nius i kamap olsem gavman i glasim hevi bilong ol woda na traim long helpim ol.

I no long taim i go pinis mi harim olsem Gavana bilong Nesenel Kapitol Distrik, Philip Taku i givim sampela helpim i go long ol woda bilong Bomana. Mi bilip ol arapela woda long ol arapela provins tu i wetim wantaim taim ol tu bai kisim kain sapot olsem.

Mi save nau long dispela taim gavman i bungim kainkain hevi na mani

bilong kantri i sot long stretim olgeta hevi long wankain taim. Tasol mi bilip tu olsem sapos gavman i wari tru long hevi bilong lo na oda, ating ol woda i mas kisim namba wan luksave tu. Bikos ol i tok na ol kalabus lain i stap insait long haus kalabus. I tru ol plisman i wok hat long painim ol raskol na kotim ol na kot i kalabusim ol, tasol husat tru bai lukautim ol insait long haus kalabus.

Sapos ol woda i belhat na mekim ol paul pasin na lusim ol kalabus i go aut, gavman bai kisim moa hevi long yusim bikpela mani long painim na holim pas ol dispela kalabus lain.

Olsem na bikpela askim bilong mi i go long gavman na ol gavana bilong wan wan provins long givim sampela helpim i go long ol woda. Em tasol wari bilong mi na sapos yu husat i laik sapotim o agensim mi plis rait i go long Wantok niuspepa bai mi ken ritim.

**Leo Bamera
MOSBI**

Prea long bel isi long Bogenvil

Dia Edita

MI LAIK askim yumi olgeta pipol bilong Papua Niugini long daunim het na prea long bel isi long Bogenvil. Ol lida bilong yumi nau i go bung long KraiSios long Niu Silan bilong paitim toktok na bringim bel isi long Bogenvil.

Long tingting bilong mi, maski ol i wok hat long painim bel isi, sapos blesing bilong Papa God i no stap insait long ol dispela kibung, ol i no inap painim bel isi.

God wanpela tasol i ken givim gutpela tingting long ol lida bilong Bogenvil Interim Gavman (BIG), Bogenvil Trensisinol Gavman (BTG), Bogevil Revelusineri Ami (BRA, na ol deligesen bilong Gavman na Oposisen.

Olsem na mi askim yumi olgeta long prea bai God yet i ken go pas long dispela ol kibung.

**Fidelmai Weimu
WEWAK**

Noken tromoi pipia long baret long rot

Dia Edita

TAIM OL bikpela kampani olsem 'Curtain Brothers' na Habou i mekim rot ol i save mekim baret long sait bilong rot bilong wara long rot i ken ron i go daun long ol dispela baret na mekim rot i drai bai ol ka i ken ron gut na noken bungim birua.

Ol i no mekim ol dispela baret bilong yumi long karim ol pipia long haus i go na troimoi i go insait. Planti pipol long Mosbi na long Lae na long ol arapela bikpela siti na taun long Papua Niugini i no klia yet long lukautim gut rot na rot bai lukautim ol.

Mi lukim olsem yumi no wari tumas long ol pablik toksave ol lain i wokim rot i save putim aut. Nogat. Yumi mekim samting long laik bilong yumi. Na taim yumi bungim birua, husat bai karim hevi. Ating i gutpela yumi olgeta i mas bihainim sampela lo i stap long bihainim. Ol i no mekim ol lo nating.

Ol i putim ol lo bilong yumi ken bihainim na lukautim laip bilong yumi yet na ol arapela. Olsem na mi askim olgeta pipol maski long wanem provins yu stap, sapos yu lukim ol baret long sait bilong rot noken tromoi pipia i go insait. Klinim baret sapos yu lukim ol pipia i stap insait na mekim rot bilong yumi i gutpela. Em tasol wari bilong mi. Na tenkyu long yupela i ritim na bihainim dispela liklik toksave bilong mi.

**Gibson Yobon
LAE**

Gavman rong long bungim MVIT, PNGBC, na POSF

Dia Edita

MIPELA i amamas long Gavman bilong Praim Minista Bill Skate long planti ol gutpela samting em i mekim kamap insait long dispela sotpela taim em i kisim gavman.

Tasol sampela samting em i mekim we i no klia long tingting bilong mipela em i mekim mipela i no amamas. Wanpela bilong ol dispela samting em disisen bilong bungim 'Motor Vehicle Insurance Trust' (MVIT), 'Papua New Guinea Banking Corporation' (PNGBC), na 'Public Officers Supermuatation Fund' (POSF).

Long liklik save bilong mipela, MVIT em wanpela bodi bilong em yet na i gat wok bilong wari long ol lain i gat ol ka. PNGBC i gat wok bilong lukautim ol lain i save lukautim mani bilong husat ol lain i save go benk wantaim ol. Planti taim PNGBC i save givim dinau i

go long ol politisen na ol bisnis man tasol.

Ol liklik man olsem mipela ol grasrut i nogat sans bilong kisim dinau mani long PNGBC. Na POSF i gat wok bilong lukautim ol wokman bilong gavman husat i memba bilong POSF. Taim Gavman i bungim MVIT, PNGBC, na POSF dispela i paulim mipela olgeta. Nau mipela i no save husat tru i gat wanem kain wok. Na husat i bosim dispela nupela grup.

Inap PM Skate i tok klia long mipela ol grasrut long tok Pisin na Motu bai mipela ol lain i no save long tok Inglis i ken kisim klia dispela nupela disisen bilong em. Tenkyu tru na yu husat i laik bekim pas bilong mi, plis rait i go long Wantok bai mi ken ritim.

**Justin Kamboa
HAGEN**

Konsuma Afeas mas sekim 777 tin pis

Dia Edita

INAP Konsuma Afeas Kaunsel i sekim 777 tin pis? Mi lukim olsem ol lain i save mekim 777 tin pis i no moa save mekerel brend insait long 777 tin pis.

Planti taim mi baim 777 tin pis na go opim mi save lukim pis insait long tin i no wankain olsem mekerel pis bipo mi save baim. Olsem wanem ol lain i wokim 777 tin pis i laik paulim tingting bilong mipela ol konsuma o olsem wanem.

Mi save i gat Konsuma Afeas Kaunsel i stap.

Olsem na mi askim Konsuma Afeas Kaunsel long glasim dispela hevi na stapim dispela. Planti taim mipela ol konsuma i save bringim hevi i go long Konsuma Afeas Kaunsel na ol i no save mekim wanpela samting. Em olsem wanem.

Yupela noken giaman na kisim mani nating na i no mekim gutpela wok. Em tasol bel hevi bilong mi na sapos yu husat i laik bekim pas bilong mi orait rait i go long Wantok bai mi ken ritim.

**Thomas Wai
WABAG**

Ol palamen memba mas bekim pas long Wantok niuspepa

Dia Edita,

MI WANPELA mangi bilong Kilipau ples Sandaun provins. Nau mi laik sapotim tingting bilong BraTa John Kamb i bin kamap long Wantok Niuspepa long namba 8 de bilong mun Disemba.

Yes i tru tumas i luk olsem ol palamen memba i no save long tok pinis olsem na ol i no inap ritim Wantok niuspepa na bai ol i ken save gut tru wanem ol komplem bilong ol grasrut.

Olsem wanem yupela ol memba i skol tasol long Inglis skol na i no save long Tok Pisin.

Plis nau mi laik tokim yupela ol memba olsem yupela mas traim na baim Wantok Niuspepa na ritim bai yupela ken save long wanem ol komplem bilong ol grasrut o bai yupela i ken save na bihainim ol gutpela rot bilong wok bung wantaim ol pipol bilong yupela long wan wan ilektoret na provins bilong yupela.

Plis ol palamen

memba nau yupela i mas opim ai bilong yupela na i mas tingting long baim tok pigin Wantok Niuspepa na bai yupela ken save long wanem komplem bilong ol raita i putim kamap long Wantok Niuspepa.

**Benjamin A. Wep
Kilipau Ples
Vanimo, Sandaun
provins
Wes Sepik provins.**

Sekim wok bilong ol NGO

Dia Edita

I GAT planti ol non gavman ogenais-esen (NGO) i kam wok insait long Papua Niugini. Sampela i stat na wok i go liklik taim tasol na bihain i stop olgeta. Sampela i ron gut tru tasol mipela i no lukim kaikai bilong wok bilong ol.

Mipela lukim olsem ol i gat gutpela ka, ol gutpela opis na ol wokman bilong ol i kisim bikpela pe. Sampela ol NGO i wok hat tru na kaikai bilong ol i kamap ples klia. Na nau sampela lain i tingting long kamapim ken ol nupela NGO.

Olsem wanem, ol waitman i laik yusim PNG olsem pilai graun bilong ol bilong kam pilai o wanem. Mi no kros

long ol gutpela NGO. I gat planti ol gutpela NGO i stap long kantri na mipela i amamas long wok bilong ol.

Tasol i gat sampela ol NGO ol i tok ol i stap bilong helpim mipela ol grasrut tasol we stap helpim bilong ol. Inap ol dispela NGO i pasim opis bilong ol na go bek long kantri bilong ol.

Sapos nogat, inap gavman i kamapim wanpela bodi bilong sekim gut wok bilong ol NGO. Em tasol wari bilong mi na mi bai amamas long lukim bekim bilong pas bilong mi long Wantok niuspepa.

**Alfred Koboni
GOROKA**

Rausim tu ol arapela setelmen long ol arapela provins

Dia Edita,

MI LAIK sapotim tru dispela nius i bin kamap long Disemba 25, 1997, we i toktok long Madang Gavana Jim kas i laik rausim sampela setelmen insait long provins bilong en. Mi gat bikpela amamas na mi sapotim tru dispela.

Em i tru olsem, laip bilong setelmen em i narakain tru long laip bilong asples bilong yumi wan wan. Apsles bilong yumi em i olsem as bilong laip bilong olgeta manmeri tude.

Yumi i gat grasrut, bus, wara, abus na olgeta samting, God papa i putim ol long han bilong yumi long lukautim (Gen: 1:28-29) na kaikaim sampela bilong ol dispela samting. Long ples i gat planti ol kainkain wok bilong wokim. Tasol long setelmen, i nogat wok. Manmeri i sindaun, silip na raun raun nating na blokim spes bilong developmen.

Planti les manmeri tude i wok long painim isi-pela rot bilong kisim mani na bilas. Ol i save ting olsem laip bilong ples em i hat tumas. Taun laip em isi na yu ken kisim nating ol samting. Olsem na planti yangpela manmeri i pulap long ol setelmen tude na kisim samting long pasin pamuk, stil, pilai laki na sampela arapela pasin nogut.

Sampela kranksi man i save salim meri na pikinini meri bilong ol long kisim mani long rot bilong mekim

dispela famili i stap laip. Ol pikinini man i joinim raskol na kisim samting long stil pasin. Sampela man i sutim het i go insait long gavman graun na wokim haus na planim ol samting na i kamap olsem graun bilong em yet.

Dispela em i sem pasin tru. Kamap olsem man i no gat graun long asples bilong en.

Ol kainkain pasin nogut i kamap insait long siti na ol taun bilong yumi long PNG, em ol les manmeri i hait insait long setelmen tasol i mekim. Mi gat bilip olsem, sapos pasin bilong rausim setelmen insait long olgeta provins na distrik tu, bai i katim daun sampela bikpela hevi olsem raskol, pasin pamuk, kilim man na sampela arapela pasin nogut tu.

Mi nau laik apil long ol arapela gavana bilong provins, long rausim olgeta setelmen, we i blokim developmen na tu setelmen i save kamapim planti bikhet pasin. Pipol insait long setelmen, ol i as bilong olgeta pasin nogut. Rausim ol i go bek na mekim wok long ples.

Em tasol toktok bilong mi. Yu husat, manmeri i laik sapotim o egensim, yu welkam tasol long rait i kam long dispela niuspepa. Na bai mi ken lukim.

**Lukas Apinur
Ambunti**

Noken yusim drif net long PNG solwara

Dia Edita

GAVMAN i mas glasim gut ol bikpela pis kampani i wok long kam insait long PNG na kesim pis. Mi harim tok win olsem sampela bikpela kampani i wok long yusim drif net bilong kesim pis long solwara bilong yumi.

Long liklik save bilong mi, drif net bai kisim kainkain pis. Sampela ol pis i pas long drif net em ol dispela bikpela kampani bilong pis i no inap yusim.

Olsem na ol bai dai nating na ol i troimoi i go. Sapos yumi larim ol bikpela kampani i kam long PNG na yusim drif net long laik bilong ol na gavman i no mekim sampela wok painim aut, mi bilip sampela de yumi bai sot long sampela pis, yu no inap painim long arapela solwara long wol.

Em tasol liklik wari bilong mi, na sapos yu laik bekim pas bilong mi na sapotim mi orait rait i go long Wantok niuspepa bai mi ken ritim.

Clement Kepson, KAVIENG

long arapela ol kantri long wol.

I tru yumi i no kamap yet long mak bilong resis long wol na winim ol biknem kantri olsem Amerika, Inglen, Ostrelia, na ol arapela biknem kantri tasol mi bilip sapos yumi stat long skulim ol pikinini bilong yumi long pilai nau bai ol i kamap sampela namba wan ol pikinini long ol yia i kam bihain.

Na long taim bilong ol mi bilip ol inap bringim planti moa gol i kam long kantri bilong yumi. Long dispela rot kantri bilong yumi bai kisim biknem na planti ol bisnis lain inap kam tu long kantri bilong yumi na mekim mani na bringim sevis na wok i kam.

Olsem na mi askim gavman bilong yumi long glasim dispela eria na putim moa saveman na samting i go insait long helpim pikinini spot long olgeta provins insait long kantri. Em tasol na God i ken blesim yumi olgeta. Sapos yu husat i laik sapotim mi, plis rait i go long Wantok bai mi ken ritim.


**James Colin
KIMBE**



Adres i kam long
HON. MICHAEL NALI MP

NAMBA TU PRAIM MINISTA
NA MINISTA BILONG TRED NA INDASTRI
I GO LONG GOROKA
CHAMBER OF COMMERCE NA INDASTRI

TRINDE JANUARI 14, 1998



Steven Layton, Presiden bilong Goroka Chamber of Commerce na Industri, Gavana bilong Isten Hailens Provins, Hon. Mathias Karani, ol memba bilong Chamber of Commerce, ol opisa bilong Gavman, ol gutpela meri na ol gutpela man.

Mi givim bikpela tok tenkyu na amamas i go long Goroka Chamber of Commerce na Industri long askim mi long kam na givim toktok long yupela nau nait olsem namba tu Praim Minista na Minista bilong Tred na Industri.

Long namba wan lukluk raun bilong mi i go long Lufa bilong opim Masrum Projek, na long kamap long dispela kaikai long nait i olsem namba wan taim bilong mi taim mi kisim opis olsem lida bilong pati bilong mi na Minista bilong Tred na Industri.

Pastaim mi gat tingting long kam na givim toktok long yupela ol gutpela nius i kam long Nali. Tasol ol samting i wok long kamap long sampela wik na mun i go pinis i pasim dispela tingting bilong mi.

Olsem na sapos yupela i tingting long mekim fani long toktok bilong mi, mi askim yupela long stap isi pastaim na mi hop taim mi pinisim olgeta toktok bilong mi olsem ol bisnis man, yupela bai amamas long toksave bilong mi bilong mekim ol praivet sekta i strongim ol wok bilong ol insait long kamapim gutpela wok developmen long yangpela kantri bilong yumi.

Mi amamas tu long kam long taun bilong yupela na provins bikos long wanpela taim Goroka i stap olsem bikpela senta bilong gavman na ol wok bisnis bilong olgeta hailens provins.

Insait long bisnis, provins bilong yupela i opim windua bilong ol pasin bilong wok agrikalsa long PNG olsem long planim kopi na ti. Mi amamas long tok olsem Goroka i bringim planti gutpela senis long hailens na long ol arapela ol hap bilong Papua Niugini.

Ol gutpela meri na ol gutpela man, gavman bilong mi i laik lukim ol praivet sekta o bisnis lain i go pas long helpim Papua Niugini kamapim ol gutpela samting bilong helpim kantri bilong yumi i gro na kamap gutpela.

Mipela i laik lukim dispela samting i kamap tru. Mipela i laik lukim em i kamapim gutpela sindaun bilong ol pipel bilong yumi. Mipela i laik lukim olsem yumi kamapim ol gutpela samting wantaim ol samting long bus, graun, wara, solwara na olgeta samting yumi gat long kantri bilong yumi, bai planti pipel bilong yumi long Papua Niugini i ken painim rot bilong kamapim gutpela sindaun bilong ol.

Kantri bilong yumi tude i bungim planti sosel na politikel hevi, maski liklik mani bilong kantri bilong yumi i ron gut stat long 1995.

Hevi bilong biksan, ol praivet ami bilong Sandlain, na ol tok i kamap bilong pasin nogut i traim bel isi pasin bilong ol pipel bilong yumi na strongim ol long bungim ol kainkain traim bilong stretim na senisim yumi.

Long dispela taim strong bilong mani bilong yumi (Kina) i pundaun i go daun. Tasol mi amamas long tok olsem em i no pundaun i go daun tumas olsem ol arapela kantri long dispela rijen.

Mista Presiden, wok nau i stap long yumi olgeta insait long gavman na praivet sekta long stiaim Papua Niugini long dispela ol hatpela taim.

Ministri bilong mi bai mekim wok bilong em long bungim ol dispela hevi. Mipela bai putim ol praivet sekta olsem Praioriti eria long developim ol namel tem polisi streteji o rot bilong namel taim na longpela taim long mekim i go bikpela wok misin bilong mipela.

Long stretim gut ol wari bilong ol praivet sekta long gro i go bikpela na i go long olgeta hap, gavman i bungim tupela dipatmen, dipatmen bilong Komes na Industri wantaim Tred na mekim ol i kamap wanpela dipatmen, Tred na Industri.

Kain pasin olsem i kamap bilong wokim pasin bilong yusim save bilong yumi wan wan bilong mekim kamap ol nupela samting na mekim kamap gut ol pasin bilong bringim sevis i go long ol praivet sekta long kantri bilong yumi na long ol arapela kantri.

Yumi noken lukim dispela pasin olsem sans bilong kamapim ol nupela wok. Tasol, yumi no inap wetim pablik sekta long kamapim ol wok.

Mi laik lukim gutpela na trupela pasin i kamap long:

- Emploimen;
- Developmen bilong Agrikalsa;
- Trening bilong ol wokman bilong yumi;
- Daunim pasin bilong baim ol samting long arapela kantri na;
- Opim na strongim pasin bilong salim ol samting i go long arapela kantri.

Dispela rot tasol i ken kamap long ol praivet sekta i gat bilip long ol yet na i wok hat long kamap moa bikpela.

Long helpim ol praivet sekta long bisnis bilong wokim ol samting long fektori, invesmen, na tred na long liklik bisnis, mipela i kamapim sampela gutpela rot, na i no long taim mi bai tokaut long ol dispela samting wantaim nesenel invesmen polisi.

Bai mipela tokaut long ol dispela rot insait long tripela polisi dokumen long karamapim industrial developmen; Nesenel invesmen na liklik entaprais developmen. Mipela bai salim dispela ripot i go long nesenel eksekutiv kaunsel bilong ol i ken givim tok orait bipo long mipela i go het na mekim wok.

Mista Presiden na ol memba bilong bisnis komyuniti, gavman bilong mi i bilip olsem namba wan wok bilong mipela long ol praivet sekta developmen em long kamapim gutpela ekonomi, politik na sosel envairenmen.

Mi amamas long ol gutpela sosel kondisen bilong lo na oda. Dispela em ol bikpela samting bilong ol praivet sekta long gro. Olsem namba tu praim minista, mi gat laik long lukim olsem kain sindaun i mas kamap ples klia bilong lukim yupela i mekim wok long sait bilong yupela long bungim ol bikpela wok mi toktok long en pastaim.

Ministri bilong mi i no inap putim aut ol gaidlain, na i no tokaut long wanem samting mipela i laik lukim bilong helpim kantri bilong yumi i mekim mani.

Long ol industri developmen, "Beyond the mineral boom" o go moa long bikpela mani yumi save kisim long ol samting olsem gol, wel na petrol, polisi dokyumen bai i stap namel long ol wok bisnis insait long Papua Niugini.

Rot bilong dispela gavman insait long dispela polisi em long ol industri bilong en long kamapim tupela bikpela samting long yia 2000. Ol dispela samting em olsem:

- Long kamapim 35% bilong gros domestik prodak na;
- Long kamapim moa long 80,000 wok o 20% wok insait long ol fomel sekta bilong ekonomi.

Dipatmen bilong mi na ol industri senta developmen koporesen bai kamapim sampela rot bilong mipela i ken lukim ol dispela toktok i karim kaikai.

Insait long nesenel invesmen, polisi bilong mipela bai lukluk long hapim level bilong invesment insait long PNG long wan wan yia. Aninit long ekonomik rikaveri program,

ol polisi bai i no strongim tasol posisen bilong kantri bilong yumi, tasol olsem wanpela kantri we ol ausait bisnis lain i ken kam na inves.....Na tu painim aut na rausim sampela bilong ol samting we i bagarapim ol lain long kam inves o mekim bisnis long PNG.

Wanpela ki eria bilong dispela polisi em bilong dispela gavman long promotim stretpela pasin insait long olgeta wok wantaim ol praivet sekta.

Mipela bai strongim wok bilong mekim ol samting long ol bikpela fektori na ol wok bilong mekim ol liklik samting wantaim ol samting yumi gat long bus, graun, wara, na solwara bilong yumi. Na sapos ol kain bisnis inap ron gut long ples, bilong kamapim wok bilong ol pikinini bilong yumi long bhain taim, mipela bai go het na sapotim.

Mi askim pinis invesmen atoriti long glasim dispela na kamap wantaim ol trupela plen bai mipela i ken go het na kamapim dispela plen. Mipela bai mekim olsem insait long pasin bilong wokbung wantaim olgeta wan wan provins we i gat planti ol samting bilong bus, graun, wara, na solwara i stap bilong mekim mani na tu wantaim ol praivet sekta.

Wanpela eria mi laik toktok wantaim yupela we mi gat bikpela wari na amamas long en, em long ol liklik entaprais o liklik bisnis developmen.

Planti ol pipel bilong PNG i save go pas long ronim ol kain bisnis olsem. Ol liklik bisnis i bringim planti mani long kantri bilong yumi na kamapim gutpela sindaun long ples bilong yumi.

Tasol stat long indipendens i kam inap nau olgeta gavman klostu i lus tingting olgeta long ol dispela liklik bisnis. Na i no long taim i go pinis ol i laik karamapim ol olgeta wantaim tingting bilong kamapim ol risev ektiviti.

Olsem minista bilong Tred na Industri, mi bai askim Invesmen Promosen Atoriti long glasim ken ol risev ektiviti lis, olsem bai ol liklik bisnis ektiviti we ol pipel bilong PNG i ken ronim i noken bungim hevi olsem ol ausait lain inap kam insait na tekova.


Insait long dispela sotpela taim mi holim dispela opis, mi luksave planti slek pasin na gutpela polisi wok i kamap bilong helpim ol liklik entaprais developmen. Na mi bilip dispela i stapim ol sampela gutpela bisnis we inap kamap bikpela long kantri bilong yumi.

Mi askim pinis dipatmen bilong mi na Liklik Bisnis Developmen Koporesen long wok long wanpela Polisi Dokyumen we bai promotim na givim hop long ol liklik bisnis bilong yumi i ken kamap strong.

Insait long narapela faivpela yia, gavman bilong mi bai developim wanpela liklik na namel entaprais (SME) polisi wantaim rot bilong kamapim 100 nupela liklik bisnis long wanpela yia. Long mekim dispela mipela bai givim ol pipel bilong PNG ol pikinini diwai bilong planim, gutpela skul na ol gutpela ekstensen sevis.

Ol gutpela meri na ol gutpela man, mi tokaut pinis long sampela bilong ol polisi na tingting mi gat long mekim. Tasol long lukim ol dispela tingting i karim kaikai, mi laikim sapot na helpim bilong ol pipel olsem yupela insait long ol praivet sekta. Olsem na mi askim yumi olgeta long wok bung wantaim na painim rot bilong kamapim ol gutpela samting yumi olgeta i gat laik long kamapim.

Long pinisim toktok bilong mi, mi laik tok tenkyu ken i go long yupela long givim mi dispela taim long toktok long yupela nau nait, gut nait na God i blesim yupela olgeta.



NATIONAL CAPITAL DISTRICT COMMISSION

Nius i kam long Siti Hol



NATIONAL CAPITAL DISTRICT COMMISSION CLASSROOM CONSTRUCTION SCHEDULE - 1998

CONTRACT NO	SCHOOL	DESCRIPTION	SUBURB / VILLAGE
E0198	Pari Community School	1x Double Classroom (Top & Bottom)	Pari
E0298	Taurama Community School	1x Double Classroom (Top only)	Taurama Barracks
E0398	Holy Rosary Community School	1x Double Classroom (Top only)	6 Mile
E0498	Hohola Demo School	1x Double Classroom (Top only)	Hohola
E0598	Kila Kila Community School	1x Double Classroom (Top only)	Kila Kila
E0698	Kila Kila Community School	1x Double Classroom (Top & Bottom)	Kila Kila
E0798	Wardstrip Community School	1x Double Classroom (Top & Bottom)	Gordons
E0898	Ted Diro Community School	1x Double Classroom (Top only)	Murray Barracks
E0998	Wildlife Community School	1x Double Classroom (Top only)	8 Mile
E1098	Saint Theresa Community School	1x Double Classroom (Top only)	Badili
E1198	Eki Vaki Community School	1x Double Classroom (Top & Bottom)	Hohola
E1298	Saint Pauls Community School	1x Double Classroom (Top only)	Gerehu Stg 4/5
E1398	Saint Peters Community School	1x Double Classroom (Top only)	Erima
E1498	Koki Administration School	1x Double Classroom (Top & Bottom)	Koki
E1598	Hagara Community School	1x Double Classroom (Top & Bottom)	Hanuabada
E1698	Hagara Community School	1x Double Classroom (Top only)	Hanuabada
E1798	June Valley Community School	1x Double Classroom (Top & Bottom)	June Valley
E1898	Sacred Heart Community School	1x Double Classroom (Top only)	Hohola
E1998	Waigani Community School	1x Double Classroom (Top & Bottom)	Waigani/UPNG
E2098	Evedahana Community School	1x Double Classroom (Top & Bottom)	9 Mile
E2198	Gerehu Community School	1x Double Classroom (Top & Bottom)	Gerehu Stg 1
E2298	Gerehu Community School	1x Double Classroom (Top only)	Gerehu Stg 1

Nesanel Kapitel Distrik Komisen i askim long tenda long ol lokol kampani em 100 pesen Papua Niugini pipel i papa long en long wokim ol top ap klasrum insait long Nesanel Kapitel Distrik. Ol kampani i laik aplai mas i gat tu rekot bilong wankain wok em ol bin wokim bipo, na tu wantaim gutpela mani rekot.

Ol pepa o dokumen bilong waim dispela tenda em yupela ken kisim long Bilding Divisen long Tengdui Depot (bipo em Trensport) long 4 Mail. Taim yupela laik kisim dokumen, yupela mas soim pastaim risit bilong dokumen fi.

Yupela mas baim fi long mak bilong K40 long wanwan klasrum long kesia long graun floa, Siti Hol.

Ol tenda em yupela mas putim insait long wanpela envelop na putim long tenda bokis i stap long Enjinerig Divisen Opis long Tengdui Depot.

Ringim Bilding Menesa long telipon namba 3240568, 3240562 o feks namba 3240569.

POSITION VACANT

WORKS ENGINEER - (GRADE 16 - K26,369.00 PER ANNUM)

The National Capital District Commission is seeking a suitably qualified and experienced person for the position of Works Engineer. We offer an opportunity to contribute to a progressive, rapidly expanding city and work with a team of dynamic people.

This position is accountable to the Deputy City Administrator (Operations) and is responsible for the direction, co-ordination and monitoring of construction, works and maintenance functions. The major duties include developing and implementing plans and objectives affecting the Division, preparation and submission of management reports, annual reports, periodic budgets and control expenditure, preparation and submission of tenders on contracts relating to plant hire, minor civil works, capital acquisitions of plants and equipment.

This is a senior management position and the incumbent must be able to demonstrate adequate knowledge and experience on this field and must work closely with the management and the residents.

Qualifications and Experiences:

The desirable candidate must:

- possess a Bachelor's Degree in Civil Engineering with minimum of second class honours or better.
- be a member of the Papua New Guinea Institute of Engineers of at least five (5) years standing.
- have a minimum of five (5) years experience in Municipal Engineering with practical hands on experience in Civil Engineering and some Design Experience an advantage, and be capable of controlling and administering the work force of over 150 workers.
- possess proven leadership qualities in large engineering organizations or similar.
- be capable of being on call on a 24 hour basis, seven (7) days a week and be able to adhere to normal NCDC working hours.
- be medically fit without any physical or mental restrictions.

NCDC offers pleasant working conditions, a friendly working environment and competitive salary. This position is subject to three (3) years performance based contract and acquires competitive allowances and benefits.

Only Nationals need apply.

Written applications with curriculum vitae, copies of certificates and names and contacts of three recent referees to be addressed to:-

The personnel Manager
National Capital District Commission
P O Box 7270
BOROKO
National Capital District

Further details may be obtained by contacting the Recruitment Officer on telephone 324 0727 or 324 0722. Applications close at 4:06 pm on 6th February 1998.

The National Capital District Commission is committed to equal opportunity in employment. Selection will be on the basis of merit.

NCDC Pablik Afeas Divisen i autim dispela tok

Oi spot eksen poto long Mosbi



• Em i strongpela pilai namel long Karanas na PNGbc bilong sofbal resis bilong oi meri long Mosbi sofbal resis. Lukaut long long dispela wiken gen webai oi i kirapim das gen. Oi meri i stat nau long seken raun bilong resis ya.




ANTAP • Pilaia bilong Mobil i rausim bal hariap bikos tupela lain bilong EFM i kamap long kisim em.

ANINIT • POSF pilaia i saitim bal long lek tasol pilaia bilong Habas (raithan) i kamap long kisim em. Dispela pablik sevans soka resis long Mosbi.




• Susa ya bilong EFM tim i kisim bal na painim poro bilong em long pasim bal. Dispela em i pilai bilong praiwet netbal resis long Mosbi.




ANTAP • Oloboj, Susa long lephan ya i namba tu ya .. em i bilong EFM i laik skoa long mak tasol pilaia bilong Mobil i kamap long stopim em. Dispela em stail pilai bilong praiwet netbal resis.

RAITHAN • Meri i go pas long skorim gol bilong Mobil i laik traim mak EFM long netbal salens bilong tupela kampani ya.






• Takol! Nogat rot long go.



• Pasim bal...Boi nogut i redi long pasim bal.



• Tekov! kas nogut pinisim spit na tekov wantsim bal.



• Givim we long fowet i kam.



• Hap bek i autim bal long dami.

GORDENS ANDA 13 TAS RESIS



• Nogat rot ...Tripela biruai blokim kas ya wantaim bal.



• Raitman! Baga nogut i jikjek wantaim bal tasol nogat bek-ap.

Morobe soka federesen tonamen redi long kik ov long Ista wiken

BUSTIN ANZU i raitim

NAMBA foa soka federesen kap tonamen bai kamap long Lae Futbol Asosiesen (LFA) long Lae long Ista wiken long dispela yia. Na dispela tonamen bai pulim olsem 22 tim olgeta i kam long Morobe provins yet.

Dispela Morobe soka federesen kaptonamen i bin stat long 1995 we Lahi i bin winim. Na bihain long dispela, Lae i winim tupela taim wantaim. Dispela tonamen i save kamap insait long olgeta yia i go

yet. Long bung bilong LFA enuel jenerel miting, ol bosman bilong LFA i tok orait long dispela tonamen. Kos bilong ronim dispela 4-pela de tonamen bai klostu olsem K14,680. Dispela mani em ol bai yusim long baim ol tropi na sil, haiarim ples bilong pilai, bal, haiarim ol referi, trenspot, kaikai na haus slip, redio na nius na arapela kos we i bihainim.

Teknikol opisa bilong Lae Futbol Asosiesen (LFA), John Peka i bin tokaut olsemani hat tru long painim dispela mani. Tasol ol i bilip ol bai kisim helpim. Bikpel rot bilong

kisim mani em long hapim rejistrsen fi. Pastaim em long K250. Nau i bin surik i go anap long K300. Geit fi, helpim bilong Morobe provinsel edministresen na ol politisen. Narapela em long ol kampani long Lae. Smok kampani, B&H i bin helpim long tripela krismas i go pinis na nau bai ol i helpim yet.

Ol tim husat bai pilai insait long dispela tonamen em,

Lae, Lahi, KBSA, Gaifar, Boana, Wau, Bianga / Mandiks, Makam Bris, Morobe Nots, Morobe Saut, Kuat / Pindiu, Samba, Deka,

Siassi, Wasu, Kabwum, Finsafen, Menyamy, Garaina, Salamaua, Mawakasu na Wantoat.

Morobe Spot Federesen em wanpela asosiesen insait long Morobe provins we i traim long bungim olgeta distrik wantaim long promotim soka insait long Morobe provins. Dispela i wankain tu long olpela nem, Morobe Kantri Soka Asosiesen bipo we i save kamap olgeta yia.

Wankain pilai bilong ol Anda 19 na meri tu bai kamap long tupela mun bihain long dispela Ista wiken tonamen bilong ol man.

Morobe soka federesen kap bilong Anda 19 em namba wan taim bilong kamap na bilong ol meri em namba tu taim. Las yia em namba wan taim bilong ol meri i bin holim tonamen bilong ol long Wau.

Teknikol opisa, John Peka i tok klap husat i redi long stat baim ol rejistrsen fi bilong ol i ken stat long baim nau. Ol i ken baim fi bilong ol i go long Bank of Hawaii pasbuk namba, 345-32-203 70. Ol i mas holim risit na givim long James Kabi o em yet.

LFA makim ol nupela eksekutyiv

LAE Futbol Asosiesen (LFA) i makim pinis ol nupela eksekutyiv bilong ronim wok bilong soka insait long Lae. Long las wik Sande, ol i makim ol nupela eksekutyiv bilong LFA.

Igorium Kauliong bilong Finsafen na wanpela olpela brens menesa bilong Agrikalsa benk i kisim sia bilong presiden. Dispela em namba tu taim Igorium i kisim bek sia bilong LFA presiden. Andy Taku i no soim pes wantaim waipresiden long teknikel sait bilong LFA. Nobert Taio na vais presiden long sait bilong teknikel na Veronica Masi olsem tresera i no bin kamap maski ol i bin kisim toksave tripela wik i go pinis.

Tera Gauba bilong Garaina husat i wok long Morobe Provinsel edministresen i kamap olsem vais presiden (edministresen). Olpela teknikel opisa John Peka i kisim bek sia bilong em olsem vais presiden teknikel. Sia bilong jenerel seketeri i go long han bilong wanpela bisnismen Toky Mambare bilong Garaina.

Justin Helele, olpela presiden bilong Lahi Soka Asosiesen (LSA) i kisim wok olsem tresera bilong LFA. Em bai givim risain pepa bilong em i go long Lahi eksekutyiv bihain.

James Kabi, Morobe Provinsel Spots na Rekriesen opisa husat i siaman long dispela miting i tok olsem em i laik lukim gutpela wok bung wantaim long pilai na ol pablik i mas pilai olsem ol i bin lukautim ol. Tu em i tok dispela miting i bihainim stret mama lo na bai-bilong asosiesen yet.

LFA i wanpela olpela soka asosiesen insait kantri na i bin bungim planti kain kain hevi long pastaim. Tasol em i wok hat long taim kisim bek gutpela nem na strong bilong em bek.

LFA i gat nem tu long kamapim planti gutpela stori long laip bilong soka insait long Papua Niugini long bipo i kam. Em i bungim hevi long 1992 taim ol klap bilong em i bruk na fomim nupela soka asosiesen, Lahi Soka Asosiesen. Tasol em i sanap strong yet long ronim soka i go het yet insait long Lae na Morobe provins.

Ol lapun bilong Defence bomim NPF



• Susa bilong Habours Board i kisim bal na tekov. Pilaia bilong POSF i kamapklostu long kisim em. Dispela em soka resis bilong ol meri long Mosbi Pablik Sevans. Foto: Ivan Bayagau.

PABLIK SEVANS SOKA

NCD Pablik Sevis soka resis i stat gen long nu yia na las wik i bin namba tu wiken bilong propa sisen. Olgeta tim i bin mekim save long traim mekim nem bilong ol long las wiken gem.

Bikpela na strongpela pilai bilong ol man i bin kamap namel long ol boi bilong NPF na Defence long las Sarere las wiken. Dispela i bin wanpela strongpela gem tru bikos ol boi bilong NPF i gat ol gutpela yangpela pilaia na ol i gat olgeta spit na strong bilong ronim bal long graun na tu long antap.

Long sait bilong Defence em ol lapun bilong ami husat i bin lusim soka long-

pela taim pinis na nau ol i laik traim lek gen. Kik bilong ol lain lapun ya i no nogut tumas. Ol i bin winim planti bal long midfil eria na i wok long traim painim lek bilong straiika. Tasol ol boi bilong NPF i save muv hariap-tumas olsem na ol i oltaim givim opsait long ol lapun bilong Defence.

NPF i bin kisim planti gutpela sans long ronim bal i go insait long golmak bilong Defence. Tasol planti gutpela bal i wok long go abrus na i no kisim gut golmak. Dispela sans bilong NPF i bin kamap long namba wan hap bilong kik na tu long namba tu hap bilong pilai, moa sans i kamap yet. Tasol lek bilong ol i wok long popaia na i no kikim gut bal i go long golmak stret.

Olsem na ol lapun bilong Defence i no laik westim

taim. Olpela biknem pilaia bilong PNG, Martin Laviong i kisim wanpela gutpela bal long midfil eria na pasim i go stret long lek bilong Paul Ananias. Paul i no westim taim. Em i salim dispela bal long rait kona i kam long namel long lep midfilda bilong Defence i no westim taim. Em i tromoi lek antap na bal ya i abrusim golkipa bilong NPF na i go pas long umben.

Defence i luksave olsem em i no inap strong tumas long ron na salensim ol boi NPF. Olsem na em taitim tasol banis bilong em na rausim bal hariap long lek na holim taim i go inap long fultaim we ol i autim tiket bilong ol boi NPF wantaim 1-0 skoa.

Long arapela gem bilong ol man long Sarere, Air Niugini i autim tiket bilong ol boi NCDC wantaim 2-1

skoa long fultaim. Dispela tu i bin wanpela gutpela na strongpela gem. Ol wokman bilong NCDC i mekim planti top stail bilong ol long pretim golmak bilong ol balus boi bilong Air Niugini. Tasol gutpela gem bilong Air Niugini i soim em i strongpela tim long dispela gem olsem na em win long fultaim.

Long gem bilong ol meri, ol susa bilong Air Niugini tu i no isi long mekimsave long ol susa bilong Teachers. Ol meri Air Niugini i mekim ol skul tisa i ron i go i kam long bikpela hot san na nek drai olgeta. Taim strong bilong ol skul tisa i pinis, ol balus meri i stat long bomim golmak bilong Teachers we fultaim skoa i bin 5-0.

Wantok i no kisim skoa bilong arapela gem long Sarere na Sande.

Spot resis kamap long Goilala long helpim skul

TIM KAITOK i raitim

MONDO Komyuniti Skul insait long Goilala, Sentrel provins i bin kamapim bikpela spot pilai long skul so bilong em. Dispela spot tonamen bilong skul so i bin kamap long Januari 17 i go long 19, dispela mun.

Ol spot pilai we i bin kamap em ragbi, basketbal na volibal. Ol man i kamap wantaim 6-pela ragbi tim, 6-pela basketbal tim na volibal tim tu. Na ol meri tu i putim kamap tim bilong ol long pilai insait long dispela skul so. Ol meri i resis tu long basketbal na volibal.

Long ragbi sait, ol tim bilong ol man em, York Eagles, Wagi Brothers, Diga Royals, Fidinas, Kua Raiders na Tolukuma Nagets.

Ripot i tok dispela so bilong skul i bin kamap long pulim na painim sampela mani bilong helpim skul long mekim ol wok mentenens bilong em na tu skul i ken baim sampela saplai em i sot long em long helpim skul.

Dispela so i bin ron gut wantaim arapela pilai tu, ol kaikai na laip ben musik bilong ol boi long Mekeo.

Ripot i tok dispela skul so bilong Mondo Komyuniti Skul i bin kamap gut tru na pinis gut tru long Mande apinun Januari 19, 1998.



• Ol stail meri bilong Komes na Industri Dipatmen. Luk olsem sampela save putim dak gras tu na pilai wantaim ya.



• Dispela em ol 'serious' lain stret ya. Em stret, em ol tisa ya. Ol i save minim binis oltaim.

**OL TIM
BILONG
MOSBI
PABLIK
SEVAN
NETBAL
RESIS**

- Ol poto:
Joe Ivaharia



• Em ol PTC meri husat i wilwilim ol meri PX 24-18 long gem bilong las wiken.



• ANTAP: Em ol NBC meri bilong 5 Mail. Sampela bilong ol i mas gat wari na i no smail.



• LEPHAN: Chase Enjinerig tas tim em i bin pilai long 'Soco' Koporet Kampani tas resis gren fainal long las wiken. Ol i winim Trensport/DCA 9-7 long gren fainal bilong namba tu divisen.

WANTOK

Wantok niuspepa i gat posisen bilong wanpela

RIPOTA

long joinim nius tim bilong em.

Sapos yu laik wok wantaim namba wan niuspepa bilong yumi ol Papua Niugini, raitim aplikesen, na salim wantaim ol skul setifiket na wanpela stori long tok pisin i kam nau.




Salim aplikesen bilong yu i kam long:

The Acting General Manager
Wantok Niuspepa
P.O. Box 1982,
BOROKO - NCD

Aninit long dispela adres antap long fran bilong envelop, yu mas raitim:

Subject: Wantok Ripota

WANTOK SPOT



NSI ken kamap trening senta bilong Pasifik rijon

PEPSI PUBLIC SERVANTS SOCCER DRAWS

Saturday 24/01/98		
Bisini One		
7.50	NBC vs Works	M1
9.10	Transport vs Elcom	W2
10.30	Telikom vs Defence	M1
11.50	Meeting: Referees and Executives	
13.10	IRC vs NPF	W1
14.30	PMGH vs IPA	W2
15.50	UPNG vs Air Niugini	M1
Bisini Two		
7.50	Diwai vs CMB	M2
9.10	NBC vs Works	W1
10.30	Transport vs Elcom	M2
11.50	Meeting Referees and executives	
13.10	Defence vs Telikom	W2
14.30	UPNG vs Air Niugini	W1
15.50	PMGH vs IPA	M2
Sunday 25/01/98		
Bisini One		
7.50	NCDC vs Education	M1
9.10	NCDC vs Finance	W2
10.30	Fisheries Authority vs POSF	M1
11.50	Attorney General vs DCA	W2
13.10	PNGBC vs DCA	M1
14.30	NSO vs DAL	W2
15.50	IRC vs NPF	M1
Bisini Two		
7.50	Finance vs Teachers	M2
9.10	Education vs Teachers	W1
10.30	Harbours Board vs A/ General	M2
11.50	Harbours Board vs PNGBC	W1
13.10	NSO vs DAL	M2
14.30	Fisheries Authority vs POSF	W1
15.50	C&I Industry vs Post PNG	M2
Bye: M1 ICPNG, W1 BPNG, M2 BPNG and W2 ICPNG: Commerce/Industry and DIWAI.		
Mid-week games		
Bisini One		
Monday 26/01/98		
4.20pm	ICPNG vs Air Niugini	M1
Tuesday 27/01/98		
4.20pm	UPNG vs Education	M1
Wednesday 28/01/98		
4.20pm	NCDC vs NBC	M1
Thursday 29/01/98		
4.20pm	IRC vs Telikom	M1
Bisini Two		
Monday 26/01/98		
4.20pm	Bank of PNG vs Air Niugini	W1
Tuesday 27/01/98		
4.20pm	UPNG vs Education	W1
Wednesday 28/01/98		
4.20pm	Teachers vs NBC	W1
Thursday 29/01/98		
4.20pm	IRC vs Telikom	W1
Mid-week games		
SJS One		
Monday 26/01/98		
4.20pm	Defence vs POSF	M1
Wednesday 28/01/98		
4.20pm	Fisheries Authority vs DCA	M1
Thursday 29/01/98		
4.20pm	PNGBC vs NPF	M1
SJS TWO		
Monday 26/01/98		
4.20pm	Defence vs POSF	W1
Tuesday 27/01/98		
4.20pm	A/General vs E/Commission	W2
Wednesday 28/01/98		
4.20pm	Fisheries Authority vs PNGBC	W1
Thursday 29/01/98		
4.20pm	Harbours Board vs NPF	W1
SJS MP1		
Monday 26/01/98		
4.20pm	Bank of PNG vs CMB	M2
Tuesday 27/01/98		
4.20pm	Commerce & Industry vs DAL	M2
Wednesday 28/01/98		
4.20pm	Transport vs Teachers	M2
Thursday 29/01/98		
4.20pm	Finance vs IPA	M2
SJS MP2		
Monday 26/01/98		
4.20pm	Pom General Hospital vs DCA	W2
Tuesday 27/01/98		
4.20pm	DAL vs Commerce & Industry	W2
Wednesday 28/01/98		
4.20pm	Transport vs NCDC	W2
Thursday 29/01/98		
4.20pm	Finance vs IPA	W2
Bye: M1- Works, W1 Works, M2 NSO and W2 ICPNG; DIWAI and NSO		

PAPUA Niugini Spot Komisn bai redim wanpela pepa i go long Nesenel Eksekutyutiv Kaunsil long wokim Nesenel Spot Institut long kamap trening senta insait long Saut Pasifik rijon.



• John Kambuou.

Eksekutyutiv dairekta bilong Spot Komisn John Kambuou i autim dispela toktok bihain long em na minista bilong Spot, Titus Philemon i mekim lukluk raun long NSI, Goroka las wik.

Kambuou i tok dispela plen long stretim NSI i stap bipo yet tasol i nogat wanpela minista i strong long mekim ol wok. Arapela samting tu em bikos gavman i wok long senis klostu na i no gat wanpela minista i toktok long NEC.

NSI olsem wanpela trening senta long Pasifik i mas gat gutpela ples bilong trening,

Pasifik. Long statim dispela projek, Nauru gavman i tromoi K1.5 milien na bihain long en gavman nau i pulim olsem K2.5 milien i go insait long kantri. Moa kantri i wok long kapsait i go long Nauru long redim ol yet long Sydney Olympik Gems long yia 2000.

Sapos NSI i gat dispela trening senta, PNG o Spot Komisn i nap pulim planti mani long kisim ol pipel i kam trening long Goroka.

PNG nau bai i no inap wokim mani bikos em i no gat ol gutpela samting long NSI long pulim ol spotman na meri bilong arapela kantri.

Kambuou i tok NSI yet i nap long wokim K1 milien long wanwan yia sapos em i gat gutpela ol trening samting.

Planti ol ovasis kantri i tingting long yusim NSI long redim

ol yet long Sydney 2000 Gems tasol NSI i nogat ol gutpela trening fil.

Minista Philemon yet i no amamas long ol samting long NSI. Em i askim pinis Kambuou husat bai redim ol pepa long NEC long askim long moa mani.

Minista i laik NSI i mas gat gutpela fil, swimming pul, ples bilong weitlifting na tu gutpela klasrum bilong skol. Goroka em i rait ples we planti ol spotman na meri i ken trening long em.

Kambuou i sapatim tu tingting bilong Minista Philemon. Em i tok gavman i nap long wokim planti mani tru long NSI. Sapos ol gavman i givim taim long spot, dispela i ken helpim tru nem bilong Papua Niugini ya.



• Spot Komisn netbal tim long Mosbi Pablik Sevans Netbal resis. Kain stail bilong sanap ya i brukim tru lewa bilong planti ol arapela sapota long Bisini netbal graun. Photo JOE IVAHARIA.

Kikboksing i stretim kalenda bilong en

SEMPION bilong Kikboksing long Papua Niugini Stanley Nandex i gat bikpela wok long mekim long dispela yia.

Nem bilong Nandex i kamap ples klia taim em i winim taitel

bilong kikboksing long Australia na Asia. Em i winim laitwet taitel.

Insait long intanesenel tonamen, Nandex i kamap namba 5 taim em i stap

insait long kikboksing resis long Dubun, Ireland las yia.

Presiden bilong PNG Kikboksing Ower Illa i tok hap-taim bilong Nandex we em bai

ino inap raun long ovasis, em bai stretim kalenda ya.

Bikpela astingting bilong stretim kalenda em long mekim kikboksing long kamap bikpela spot insait long kantri.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.